

Je'ej tì tyo'yú'xaca' a'íjna i San Marcos

Juan pu tyihuá'ixaatye' a'ájna jo'tij quee já'tyi'tij

(Mt. 3:1-12; Lc. 3:1-9, 15-17; Jn. 1:19-28)

1 ¹A'yaa pu éenye'que' huatyóochej i nyúucarij tì jaxaj a'íjci i Jesúus i Ciríistu!, yójra' tì pué'een i Dios.

²A'yaa pu tyo'yú'xaca' a'íjna i Isaías i tì arí á'tyeej tì tyí'xajtaca'aj i Dios jitze ma'can tijin:

A'tij nu huata'ítij anaquéecan ta'aj a jíme' tyu'taxáj,
ti'líj tyámua' tyimuáa'uurijtze'.

³A'áa pu ja'vá'namuajre' i nyúucarij jo'tij quee já'tyi'tij, a'yan tijin:
"Tyámua' xu jáa'uurej i juyáara' i tavástara',
xaatajé'yitzi'tye' i juyáara'."

⁴A'áa pu jo'tóosejrataca' i Juan i tì huá'íiraca'aj a'ájna jo'tij quee já'tyi'tij, a'yaa pu néijmi'caa tyú'ixaaj maj tyá'antzaahuatye'en i Dios jimi majta je'en huái'huaj, ti'líj i Dios tyihuo'tú'uunyi' i maj quee xá'pui' huaríj a'íjci jimi.

⁵Néijmi'i i tyeítyee a'áa maj tyaja'ránamuaj a judea majta a Jerusalén a'íi mu aje're'nyinyiica'aj mej mij jáanamuaj. Mati'ij mij jaataxájtaca' i maj quee xá'pui' huaríj i Dios jimi, aj pu'ij i Juan huo'íiri' a'ájna i játya'naj jitze tì a'yan tya'rátayapuaj tijin Jordán.



© 1996 David C. Cook

San Marcos 1:4-8

⁶Ajta a'líjna i ti tyí'chajca'aj i Juan a'íj pu jin tyí'taavijhuaca'aj i caméeyuj ju'xa' jime', ajta navíj jin ahuoojí'ca'ca'aj, ajta vítzi'cii ci'macaria'aj, ajta sarátyee cua'caria'aj itzitáj maj huáxoo. ⁷A'yaa pu tyihuá'ixaatya'ca'aj tijin:

—Síjj pu ooj yaja've'mej ti jéetze! va'cán jin tyi'tyéjvee nyeqee nyáaj, capu nyéetzij a'yan tyí'nyaci'puaj nyej nyij ja'ajta'í'pu'xi'in i ca'quéera'an. ⁸Nyáaj nu nyeríj jamuáa'iiri' i jájtyij jime', ajta a'líjna a'íj pu jin já'mua'iiran i júuricama'ra' i Dios.

Jesús pu huái'huaca'

(Mt. 3:13-17; Lc. 3:21-22)

⁹A'yaa pu a'ájna tyu'ríj, Jesús pu a'áa ja'rájraa a Nazaret, chájta' a'áa ti ja'ajtyáma'can a Galileea, aj pu'ij i Juan jáa'iiri' i játya'naj jitze ti a'yan ántyapuaj tijin Jordán. ¹⁰Tí'ij na'aj i Jesús tye'táraa i jáata', aj pu'ij jaaséj ti antacúj i tajapuá tí'ij ij a'íj huaséj i júuricama'ra' i Dios ti aje'cáma'ca'aj, a'yaa pu huasé'rihua'aj tí'ij cúcui!. ¹¹Ajta je'en nyúucarij huánamuajri' ti uje'cánamuajrej u tajapuá, ti a'yan tyí'xajtaca'aj tijin:

—Muáaj paj a'lín pué'een i nyiyóoj i nyaj jéehua jaxie've', i nyaj nyajta ja'antyíhuojoj.

Tí'ij i Jesús a'áa jo'tyávaaca'aj jo'tij quee já'tyi'tij

(Mt. 4:1-11; Lc. 4:1-13)

¹²Tí'ij a'yan tyu'ríj, aj pu'ij i júuricama'ra' i Dios yo'ví'tij i Jesús a'ájna jo'tij quee já'tyi'tij. ¹³A'áa pu'ij huá'puatyej xícáj já'tyeej, jo'maj tyi'tyán jo'cí'ca'aj simuáruunyij,



© 1996 David C. Cook

San Marcos 1:12-13

ajta i tyiyáaru' tyí'tyasa'ca'aj ti'líj i Jesús ootyá'ítzeere'en i Dios jimi, capu a'yan tyá'raa a'íí mu jaatyáhuii i maj tyí'huiire' i tajapuá Dios jimi.

Jesús pu huatyóochej tì tyu'muárie'en a'ájna a Galileea

(Mt. 4:12-17; Lc. 4:14-15)

¹⁴Ti'líj eetyanámi'huacaj i Juan, aj pu'ij i Jesús ajo're'nyej a Galileea a'áa pu huojó'ixaa i Dios nyuucaaj. ¹⁵A'yan tijin:

—Pu'ríj tyá'rál'aj a'ájna i xicáara' jitze i tì a'yan tyí'iteeria'ca'aj ti'líj i Dios tyu'ta'íjtaj i cháanacaj japua. Siata'aj tyá'antzaahuatye'en i Dios jimi siajta jitzán tyú'ca'nyej i nyúucaria'ra'!

Jesús pu muáacuacaa huatajé i maj cue'tzi'puacaa

(Mt. 4:18-22; Lc. 5:1-11)

¹⁶Ti'líj Jesús a'áa ja'ajtyama'caj a'ájna véjri' jo'tij ja'vá'asej i jájtyij ti a'yan tyá'rátjyapuaj tijin Galileea, aj pu'ij a'íí huaséj i Simón ajta i Andrés ihuáaria'ra' tì pué'een. A'íí mu a'íin pué'eenye'ej i maj cue'tzi'puacaria'aj, a'áa mu mij jo'hua'naaj i tápi'narij. ¹⁷Jesús pu a'yan tyihuo'tajé tijin:

—Musio'té'yí'ij nyaj jamuán, nyáaj nu já'muamua'tyej siata'aj huo'tájeevej i tyeítyee nye jimi.

¹⁸A'áa mu mij tyojopííj i tápi'narij mati'líj mij jamuán jo'cíj i Jesús.

¹⁹Ti'líj té'ej áyee jo're'nyej, Jesús pu a'íí huaséj i Santiago ajta i Juan ihuáaria'ra' tì pué'een, a'íí pu hua'yojmua' i Zebedeo, a'áa mu ja'rátaya'ca'aj i báarcuj jitze tyámua' metyi'uuriáaj i tápi'narij. ²⁰Aj pu'ij i Jesús huo'tajé, a'áa mu mij yooriéej i jutáataj Zebedeo i séecan jamuán i maj jahuiíria'ca'aj, mati'líj mij Jesús jamuán jo'cíj.

A'íjna i tyévij tyiyáaru' tì tzajta' ú'sejria'ca'aj

(Lc. 4:31-37)

²¹Aj mu mij a'áa ja'rál'aj i chájta' tì a'yan tyá'rátjyapuaj tijin Capernaúm, a'ájna i xicáara' jitze mati'líj juso'pii, aj pu'ij i Jesús utyájrupij i tyeyúuj tzajta', tì'quij huatyóochej tì tyihuó'mua'tyej.

²²Majta i tyeítyee je'ej mu tyityo'tóomuajtacyaca' je'ej tì tyihuá'mua'tyajca'aj, ji'nye a'ya pu tyi'tyáxajtasima'aj ti'líj i tì va'cán jin tyi'tyéjvee, capu a'yan mati'líj i maj tyihuá'mua'tyajca'aj a'íjci jitze i yu'xarij i maj jin tyí'ijta. ²³A'úu pu síij tyáati' jo'tyávaaca'aj i tyeyúuj tzajta' i tyiyáaru' tì tzajta' séjria'ca'aj, a'íí pu'ij a'yan tyu'tanyúuj ²⁴tijin:

—¿Ji'nye tyi'tíj pa'uurej tajimí Jesús Nazaret paj já'ma'can? ¿Nyi a'íj jin mu po've'mej paj ta'antyipuá'ritye'en? Nyámuamua'tye a'tíj paj pué'een, nyajta jamua'reej paj a'íin pué'een i paj néijmi'i jin tyámua' een i Dios jimi.

²⁵ Aj pu'ij Jesús jajtyá'xij i tyiyáaru', a'yan tye'ixáatye'ej tijin:
—Capáj ave'nyuuca'an iirájra' mu tyévij tzajta'.

²⁶ T'i'quij i tyiyáaru' jaatacá'tzij i tyévij ca'nyiin jime', aj pu'ij ca'nyiin huajíhuaca' i tyiyáaru' ti tzajta' ú'sejria'ca'aj i tyévij ti'quij iirájraa. ²⁷Néijmi'i mu tyu'tátziin, majta a'yan tyúu'ihuo'raca'aj séej jamuán ajta séej a'yan tijin:

—¿A'tanyij pué'een a'mújna? Ti'ij jájcuan jin tyí'mua'taj, ajta je'en naa tyu'xáxa'aj ti'ij i ti va'cán jin tyi'tyéjvee. A'fi mu majta ja'tzaahuatye' i tyiyáaru' je'ej ti ye'ej tyihuó'tájeevij.

²⁸Ajta je'en jiye'tzín néijmi'que' huámua'reeri'huaca' ti'ij na'aína a'ájna a Galileea je'ej ti tyi'tij huáruuj i Jesús.

Jesús pu tyáahuaj i mu'nyáara' a'íjci i Simón

(Mt. 8:14-15; Lc. 4:38-39)

²⁹Mati'ij iiráacij i tyeuyúuj tzajta', Jesús pu hua' jamuán jo'mej a'íjma i Santiago ajta i Juan jo'maj ja'chej i Simón ajta i Andrés.

³⁰A'fi pu a'áa jóoca'tyii i mu'nyáara' i Simón, tyí'cui'ca'aj a'íjna puístaca'aj. Aj mu mij jaaté'exaa i Jesús, ³¹a'fi pu'ij ajtyáxiiriaca' jimi, ti'ij ij jajví i muáca'ra'an jitze ajta je'en ja'ajriáj, aj pu'ij jiye'tzín huatyápua'riaca' i ti puístaca'aj ajta je'en huatyóochej ti'ij tyihuó'cue'tyej.

Jesús pu jéehua tyihuó'huaaj i maj tyí'cucui'ca'aj

(Mt. 8:16-17; Lc. 4:40-41)

³²Ti'ij huaré'chuixarij aj mu mij néijmi'caa ajóovi'tijxi i Jesús jimi a'íjma i maj tyí'cucui' majta i tyiyáaru' maj hua' tzajta' ú'sejria'ca'aj,

³³Néijmi'i mu mati'ij mana'aj a'áa maj jo'cháatimée a'áa ja'tyúusii a pua'quéj jo'tij je'tyényinyi'ij, ³⁴Jesús pu néijmi'caa tyú'huaaj i tyeítyee i maj tyí'cucui'ca'aj, ajta jéehua hue'rá'ityaca' i tyiyáaru'uj i maj hua' tzajta' ú'sejria'ca'aj, capu ajta hua'tá'caria'aj maj huatányuunyij i tyiyáaru'uj, ji'nye a'fi mu jamua'ajcaa a'tij tì pué'eenye'ej.

Jesús pu huó'ixaaj i Dios nyuucaaj a'ájna jo'maj jóosi'rri

(Lc. 4:42-44)

³⁵Iiya' pu'uj, ti'ij óoche' huatíca'caj, Jesús pu ájchej ti'quij eerájraa a'ájna a chajta' ta'aj ij jusíij huatyényuunyij a'ájna jo'tij quee já'tyi'tij. ³⁶Ajta a'íjna i Simón majta i maj jamuán huajú'ca'aj, a'fi mu uyó'huoosij i Jesús, ³⁷ajta mati'ij jáatyoj a'yaa mu tyaaté'exaa tijin:

—Néijmi'i mu muahuoo.

³⁸Ajta a'íjna a'yaa pu tyihuó'té'exaaj tijin:

—Che'rej tyiche' áyee jo'ré'nyej a'áa ti véjri' huaca'aj, a'áa nu nyajta huojo'té'exaaty'ej i nyúucarij, ji'nye a'íj nu jin mujo've'mej.

³⁹ Jesúس pu'ij néijmi'que' huáraa a'ájna a Galileea, hua'ixáatya'aj i nyúucarij jo'maj jóosi'rii ti'ij na'aj a'láa ti huaca'aj, ajta tyihua'huáatya'aj i tyiyáaru'uj ti hua' tzajta' séjria'ca'aj.

Jesúś pu séej tyú'huaaj ti cá'atzaj

(Mt. 8:1-4; Lc. 5:12-16)

⁴⁰ Síij pu i tyáati' ti tyí'cui' ti cá'atzaj a' uré'nyej i Jesúś jimi, tyitunútaj pu'ij ti'ij a'yan tyaaté'exaa tijin:

—Tipua'aj a'yan petya'ajxie'vi'ra'aj, tyináahuaatye' i nyaj tyí'cui'.

⁴¹ Jesúś pu ja'ancu'vaxij, ti'quij jumuáca' jin ja'ajtamuáriej ajta a'yan tyaaté'exaa tijin:

—A'yaa nu tya'ajxié'vi'ra'. Pata'aj huarúj.

⁴² Aj pu'ij huatyápu'a'riaca' i ti jin tyí'cui'ca'aj, ti'quij naa éenye'ej ta'raj. ⁴³ Ajta je'en i Jesúś jaata'ityaca' a'yan jéehua tye'íicatye'ej tijin:

⁴⁴ —Cásí!, capáj a'tíj ixaatye'ej, sulu áricuj pata'aj huatá'sejrataj a'líci jimi i puaaríj, pajta tyu'támu'vejritaj, a'yájna ti'ij tyu'ta'líjtaca' i Moisés, mata'aj mij a'líimaj jáamua'reeja i puaaríj tijin papu'ríj huarúj.

⁴⁵ Ajta a'líjna i tyévij ti'ij jó'raa je'en pu huatyóochej ti yo'xáatajra'nyij je'ej ti tyí'tíj jimi huaríj. A'líj pu jin quee che' i'riitaca'aj ti i Jesúś utyájrutyej i ti huachájta'tajmee, sulu a'áa pu jó'yi'caaj jo'tij quee ja' a'tíj, majta i tyeítivee a'náj tina'aj mu a'áa je're'nyinyiica'aj jo'tij je'ej jé'eenye'ej i Jesúś mej mij jaaséj.

Jesúś pu séej tyú'huaaj i ti quee tyéchavaaj


(Mt. 9:1-8; Lc. 5:17-26)

2 ¹Tyoomá'caj a'chu pua'an xicáj, Jesúś pu ajtáhua'aj a'áa jo'tyájrupij a Capernaúm. Matí'ij jáamua'reeri' ti a'áa je'rácattyii i chi'táj, ²jéehua mu i tyeítivee tyúusij, camu che' á'vejrica'aj a'ájna a ti je'tyényinyi'ij, ajta i Jesúś huá'ixaatya'ca'aj i nyúucaria'ra' i Dios.

³ Aj mu mij mamuáacuaj i tyeítivee séej ajo're'nyijtye i ti tyí'cui' ti quee tyéchavaaj. ⁴Ajta jéehua mu i tyeítivee eetyóosíria'ca'aj a ti je'tyényinyi'ij a'líj pu jin quee i'riitaca'aj maj ajtyáxiirej jo'tij i Jesúś jo'tyávaaca'aj, aj mu mij antyicíj i chi'ij japua, matí'ij mij ja'náacuj aj mu mij ju'cántoo i ti tyí'cui'. ⁵Ti'ij i Jesúś huo'séj maj tyá'tzaahuatya'ca'aj, a'yaa pu tyaaté'exaa i ti tyí'cui' tijin:

—Nyiyóoj, pu'ríj i Dios tyimuaatú'uunyi'ri' i paj jin quee xá'pui' huaríj.

⁶ Séecan mu a'áa ja'ajtyá'ca'aj i maj tyihuá'mua'tyej i yu'xarij jitze i maj jin tyí'ijta, a'líi mu mij a'yan tyi'riá'mua'aj tijin: ⁷“¿Ji'nye tyóoca'nyej ti'ij a'yan tyí'xajtaj a'mújna? Nyúucaria'ra' pu je'ej pua'aj namuajre' i Dios jimi. A'líi pu'uj i Dios jaayí'tin ti'ij tyihuo'tú'uunyi' i maj jin ootyá'itzee.” ⁸Ajta i Jesúś pu jáamua'reeri' je'ej maj ye'ej tyí'mua'ajcaa, a'yaa pu'ij tyihuo'ta'íhuo'ri' tijin:



San Marcos 2:1-12

—¿Ji'nye siaj sij a'yan tyí'mua'tzej? ⁹ ¿Tyi'tanyí quee tyési!, nyi nyaj a'yan tyaaté'exaa tyaaté'exaa a'íjci i ti quee tyéchavaaj tijin: “Nu'ríj tyimuaatú'uunyi'rí i paj jin quee xá'pui' huaríj i Dios jimi”, nusu nyaj a'yan yee: “Ájchesij, pajta ja'antyil'iij mua' utáatzij pajta je'en jó'ra'nyij”? ¹⁰ A'yaa nu nyij tyajamuaatasératye'sij tì i yójra' i Dios ajta a'íjna jin antyúumua'reej íiyan i cháanacaj japua tì'ij tyihuo'tú'uunyi' i maj jin ootyá'ítzeerej i Dios jimi.

Aj pu'ij a'yan tyaaté'exaa a'íjci i ti quee tyéchavaaj tijin:

¹¹ —A'yaa nu muéetzij tyí'mua'ixaatye!, ájchesij, pata'aj ja'antyil'iij mua' utáatzij, áricuj jo'paj ja'chej.

¹² Aj pu'ij i ti tyí'cui' ájchej, aj pu'ij jatyíj i ju'utáatzij ti'quij jó'raa, néijmi'i metyi'séeracaj i tyeítyee. Aj mu mij néijmi'i je'ej tyityo'tóomuaajtyaca' majta tyaatatyójtzi'rej i Dios, a'yan metyi'xáataj tijin:

—Catu a'náj tyi'tíj a'yan tyu'séj.

Jesús pu jaatajé a'íjci i Leví

(Mt. 9:9-13; Lc. 5:27-32)

¹³ Aj pu'ij ajtáhua'aj i Jesús a'áa jo'mej jo'tij ja'val'ástimee i jájtyij, majta i tyeítyee jimi mu ajtyáxiiriaca', a'íi pu'ij tyihuá'mua'tyajca'aj. ¹⁴ Ti'l'iij a'áa joomá'caj a'íj pu huaséj i Leví, yójra' ti pué'een a'íjci i Alfeo, a'úu pu je'rácatyií jo'maj huaja'ljiive' i maj tyí'ti'l'íjcicaria'aj i Roma pujmua!. Jesús pu a'yan tyaaté'exaa tijin:

—Pata'aj nyaj jamuán jo'cha'canye'en.

Aj pu'ij i Leví ájchej ti'quij jamuán jo'mej.

¹⁵ Aj pu'ij a'yan tyu'ríj ti'ij i Jesús a'áa tyaja'cuaj'cáj jo'tij ja'chej i Leví, majta jéehua i maj huá'ljiiva'ca'aj i maj tyí'ti'l'íjcicaria'aj,

majtáhu'a'j séecan i tyeítyee i maj je'ej pua'aj tyí'tyetyeityee, a'íi mu majta tyí'cua'ajcaa i méesaj japua, jamuán i Jesús majta i maj jamuán huacíj, ji'nye jéehua mu i maj Jesús jamuán huajú'ca'aj. ¹⁶Séecan mu i maj tyihuá'mua'tyej i yu'xarij jitze i maj jin tyí'ijta, i maj fariseos pué'een, mati'ij jaaséj ti i Jesús hua' jamuán tyí'cua'ajcaa, a'yaa mu tyihuo'ta'íhuo'ri' i maj jamuán huacíj i Jesús tijin:

—¿Ji'nye een jíme' a'íjna i ti tyaja'muamua'tyej tyí'cua'caa a'íijma jamuán i maj tyí'tyejjive' ajta hua' jamuán i maj jéehua já'ítzeere?.

¹⁷Jesús pu huó'namuajri', aj pu'ij a'yan tyihuo'té'exaaj tijin:

—A'íimaj i maj quee tyí'cucui' camu a'íjci jimi ajo'ré'nyesij i ti tyí'hua'tacaa, sulu a'íimaj mu ajo'ré'nyej i maj tyí'cucui!. Canu nyáaj a'íjci jin mu jo've'mej nyej nyij a'íjma huatájeevej i maj tyámua' een, sulu a'íjma i maj jéehua ootyá'ítzee i Dios jimi.

A'íj mu jaata'íhuo'ri' i Jesús je'ej maj tyityahuó'o'itzi've'en

(Mt. 9:14-17; Lc. 5:33-39)

¹⁸Séej mu a'yan tyúu'itzi'va'ca'aj a'íimaj i Juan maj jamuán huací'ca'aj, majta i fariseos, aj mu mij séecan i tyeítyee aje'ré'nyej i Jesús jimi mati'ij mij a'yan tyaaa'íhuo'ri' tijin:

—A'íimaj mu ju'itzi'vee i Juan maj jamuán huací'ca'aj majta i fariseos, ¿ji'nye mej mij quee ju'itzi'vee i maj ajamuán huaci'ij?

¹⁹Jesús pu a'yan tyihuo'té'exaaj tijin:

—¿Nyiquij i'ríj maj ju'ítzi've'ej i maj huo'tá'inyej mej mij tyu'yé'estej a'íjci jíme' ti síij huatyénysiichij, ti'ij i ti huatyénysiichij ooj hua' jamuán ajo'tyávaacaj? Tipua'aj ooj hua' jamuán ajo'tyávaacaj i ti huatyénysiichij, capu je'ej tyí'rij maj ju'ítzi've'ej. ²⁰Ajta a'yaa pu atyojo'ré'nyesij i xicáara' i maj jitzán já'ví'tin i ti huatyénysiichij, ti'ij a'ájna atyojo'ré'nyej, aj mu mij ju'itzi've'en.

²¹Capu a'tíj jaacu'nya'puan i cáanarij ti mí'ma'can i cáanarij jíme' ti jácuaj, ji'nye huatyátzu'taj i cíixurij ti jácuaj ti'ij huatyáo'sinyi'huaj, aj pu'ij ja'násujta'naj i ti mí'ma'can, ti'quij jéetze' va'tíj anasúutza'nyij ja'mej. ²²Camu majta i nahuáj ti jácuaj ucáto'sij i cíxo'rij tzajta' ti uriá'cue'rijhua, ji'nye a'íi pu újmu'e'rij ti'quij ootátzaanyij i cíxo'rij ti uriá'cue'rijhua, aj pu'ij jó'vesij i cíxo'rij ajta i nahuáj. A'íj pu jin juxie've' maj ju'cáto'nyij i cíxo'rij tzajta' ti jácuaj i nahuáj ti ajta jácuaj.

A'íi mu jí'ijtzaanaxij i tyeríicuj i Jesús maj jamuán huacíj a'náj mati'ij pua'aj juso'pii

(Mt. 12:1-8; Lc. 6:1-5)

²³A'ájna xicáara' i maj jitzán juso'pii, Jesús pu a'áa jooma'ca'aj jo'tíj tyeríicuj ja'huasti', majta a'íimaj i maj jamuán huacíj, mati'ij a'áa jooju'uj, a'íi mu huatyóohuij maj jí'ijtzaanaxi'in i muéeya'ra' i tyeríicuj. ²⁴Majta i fariseos a'yaa mu tyaaa'íhuo'ri' i Jesús tijin:

—Cásí!, ¿ji'nye mej mij a'yan ricij i maj ajamuán huaci'ij je'ej tiquee tyíl'rij ti a'tíj a'yan rijcaj a'ájna i xicáara' jitze i maj jitzán juso'pii?

²⁵Ajta i Jesús a'yaa pu tyihuo'té'exaaaj tijin:

—¿Nyi sequée mua'aj a'náj jo'jívej i yu'xarij jitze je'ej ti huaríj i David ti'ij huataí'cuataca', majta i maj jamuán huacíj? ²⁶Ti'ij a'íjna i Abiatar puaaríj jin tyl'tyaváacaj, David pu utyájrupij i tyeyúuj tzajta' ti'quij jáacuaj i páan i maj jaatámu'vejritaca' i Dios jimi, i maj a'íi mana'aj jacua'caria'aj i puaaríij, ajta je'en a'íijma huacue'ej i maj jamuán huajú'ca'aj.

²⁷Ajtáhua'aj pu i Jesús a'yan tyihuó'ixaaj tijin:

—A'íjna i xicáara' i maj jitzán juso'pii a'yaa pu tyo'xá'pui'intari'huaca' ti'ij huo'tyáhuiire'en i tyeítyee, camu mej mij i tyeítyee jaatyáhuiire'en a'íjci i xicáara' i maj jitzán juso'pii. ²⁸A'íj pu jin i yójra' i Dios a'íjna jin antyúumua'reej i xicáara' i maj jitzán juso'pii.

A'íjci jime' i a'tíj ti ciyáaxara' i jumuáca' jitze

(Mt. 12:9-14; Lc. 6:6-11)

3 ¹Aj pu'ij i Jesús ajtáhua'aj a'úun jo'tyájrupij i tyeyúuj tzajta', siij pu tyáati' a'úun jo'tyávaaca'aj ti ciyáaxara'ca'aj i jumuáca' jitze. ²A'íi mu mij i fariseos ja'eeva'ca'aj a'íjci i Jesús mej mij jaaséj tipua'aj tyáahuaatye'en a'íjci xicáara' jitze i maj jitzán juso'pii, mej mij a'íjci jin tyl'tíj jitzán ujpuáritye'en. ³Aj pu'ij Jesús a'yan tyaatajé a'íjci i ti ciyáaxara' i jumuáca' jitze tijin:

—Ájchesij iiye'ej jé'ta' huatyéjchaxij.

⁴Ajta je'en a'yan tyihuo'ta'íhuo'ri' i séecan tijin:

—¿Tyl'tanyí jin je'ej tyíl'rij ti'líj a'tíj a'yan huárinyij a'ájna xicáara' jitze i maj jitzán juso'pii, nyi ti tyámua' huárinyij, ca' ti je'ej pua'aj huárinyij? ¿Nyi maj séej tyú'huatyé'en ca' maj séej antyipuáritye'en?

Majta a'íimaj camu je'ej tyu'taxájtaca!. ⁵Aj pu'ij Jesús huo'séerajraa nyu'camu'iij, ajta huatóoxaamujrityej a'íijma jimi i maj quee jaxie'va'ca'aj maj jáanamuaj, ti'quij a'yan tyaatajé a'íjci i tyáataj tijin:

—Huatátzaaraj mua' muáca'!

Aj pu'ij i tyáati' jaatátzaaraca' i jumuáca' ti'quij huarúj.

⁶Aj mu mij a'íimaj i fariseos iiráacij, mati'ij mij huatyóohuij maj jaaxá'pui'intare'en a'íijma jamuán i maj Herodes jitze ajtyáma'can je'ej maj ye'ej huárinyij mej mij jaajé'caj a'íjci i Jesús.

Jéehua mu tyeítyee a'áá ja'tyúusii jo'tij ja'vá'asej i jájtyij

⁷Aj pu'ij i Jesús jó'raa, hua' jamuán i maj jamuán huacíj, a'áá pu'ij ja'rál'aj jo'tij ja'vá'asej i jájtyij. Jéehua mu majta i tyeítyee i maj a'áá

huacháatima'caa a Galileea jamuán huajú'ca'aj. ⁸ Matí'ij jáamua'reeri' je'ej ti va'cán jin tyí'muarie'ca'aj i Jesús, jéehua mu ujo'vá'ju' a'áa maj ja'ráacij a Judea, majta a Jerusalén, majta a Idumea, majta a Tiro, majta a Sidón, majta i maj Jordán já'ma'can. ⁹ Aj pu'ij jin i Jesús a'íijma huatalíj i maj jamuán huacíj maj báarcuj jáahuaviitze'en, ti'ij jitzán atyéyixi'in mej mij quee i tyeítyee jatzínajyi'can. ¹⁰ Ji'nye pu'ríj jéehua tyihuo'huaatya'ca'aj i maj tyí'cucui'ca'aj, a'íj mu jin i maj tyí'cucui' ajtyáxiiriaca' mej mij ja'ajtamuárie'en a'íjci i Jesús.

¹¹ Ajta matí'ij i maj tyiyáaru'uj hua'tzajta' séjria'ca'aj jaaséj i Jesús, a'íi mu jimi tyítunutaxij majta a'yan tyí'tyejihuaca'aj tijin:

—Muáaj paj yójra! pué'een i Dios.

¹² Ajta i Jesús pu a'yan tyihuo'ta'íj maj quee jaxajta hua' tzajta' i tyeítyee a'tíj ti pué'een.

**Jesús pu hua'antyíhuojoj a'íijma i maj
tamuáamuata' japuan hua'puaj ará'asej**
(Mt. 10:1-4; Lc. 6:12-16)

¹³ Aj pu'ij i Jesús a'áan jo'ojnyéj i jiríj japua, aj pu'ij huo'tajé a'tyán maj ja'ránajchaca!. Matí'ij néijmí'i tyúusiji, ¹⁴ tamuáamuata' japuan hua'puácaa pu antyíhuo, mej mij jamuán huací'ca'an ajta ti'ij huo'ta'íjtye'en mej mij jaariá'xaj i Dios nyuuaaj. A'yaa pu'ij huo'tamua'aj tijin i maj tyu'ta'íjtyi'rej, ¹⁵ ajta a'íjna jin tyihuo'ta'íj mej mij antyúumua'reeriaj maj hue'rá'ityej i tyiyáaru'uj i maj hua' tzajta' séejre' i tyeítyee. ¹⁶ A'íi mu mij a'íin pué'een i maj tamuáamuata' japuan hua'puaj ará'asej i ti hua'antyíhuojoj: Al'íjci i Simón, i ti ajta a'yan jaatamua'aj tijin Pedro, ¹⁷a'íjci i Santiago ajta i Juan ihuáaria'ra' ti pué'een; a'íijma yojmua' i Zebedeo, i ti ajta a'yan huo'tamua'aj jíme' tijin Boanerges a'yaa ti'ij huatóomua'aj tijin, Yójmua'mua' i maj tyénuuvej; ¹⁸ ajta a'íjci i Andrés, ajta i Felipe, ajta i Bartolomé, ajta i Mateo, ajta i Tomás, ajta a'íjci i Santiago, yójra' a'íjci i Alfeo, ajta i Tadeo, ajta i Simón i maj a'yan jatamuá'muaj tijin cananeo, ¹⁹ ajta a'íjci i Judas i ti a'yan tye'entyímu'tacaa tijin Iscariote, a'íi pu a'íin pué'een i ti avíitzij jin tyu'tátuiirej a'íjci i Jesús.

Tyi'tíj mu jitzán ujpuá'rij i Jesús
(Mt. 12:22-32; Lc. 11:14-23; 12:10)

²⁰ Aj pu'ij té'ej i Jesús chi'táj jo'tyájrupij, majta mu jéehua tyúusiji i tyeítyee, capu ij i'riitaca'aj ti hua' jamuán tyú'cua'nyij i maj jamuán huacíj. ²¹ Matí'ij jáamua'reeri' i ihuáamua'mua' a'íjci i Jesús jo'tij je'ej jé'eenye'ej, a'íi mu a'áa jo're'nyej mej mij já'anvi'tij, ji'nye a'yaa mu tyí'xajtaca'aj ti arí huatyóotímue'r'i!

²² Majta a'íimaj i maj tyihuá'mua'tyej i yu'xarij jitze i maj jin tyí'ijta a'áa mu ja'ráacij a Jerusalén, a'yaa mu tyí'xajtaca'aj tijin: —

Beelzebú, a'íjna i ti tyihuá'ijtye' i tyiyáaru'uj, a'íj pu jitze juca'nyej a'mújna mu tyévij ti'ij huo'tamuáritye'en i tyiyáaru'uj.

²³ Jesúz pu huo'tajé, ti'quij a'yan tyihuo'té'exaaaj tijin: —¿Ji'nye tyí'rrij ti i tyiyáaru' jusíij huatóomuaritye'en? ²⁴ Tipua'aj i maj séej chájita'naj jitze aja'chej jé'ta' muáaciinyej, camu che' á'tyeeren, ²⁵ ajta tipua'aj i tyeítyeristyamua'me'en i a'tfj jé'ta' muáaciinyej, camu majta che' á'tyeeren. ²⁶ A'yaa pu cha'tána'aj, tipua'aj jé'ta' muáaciinyej i tyeítyeristyamua'me'en i tyiyáaru' majta je'en tyúucui'nyij, camu che' á'tyeeren, sulu a'íi mu antyipua'rij.

²⁷ Capu je'ej tyí'irij ti a'tíj utyájrutyej jo'tij ja'chej i tu'huájca'nyej ti'ij tyi'tíj jaanáhue!, tipua'aj quee anaquéej jaatyáji'que'en, ji'nye a'yaa pu tyu'tái'riitarij ti'ij tyi'tíj jaanáhue!.

²⁸ A'yaa nu tzáahuaty'i'ra'aj jin tyajá'mua'ixaaty'e' ti i Dios tyihuo'tú'unyi'raj néijmi'caa i tyeítyee i maj jin quee xá'pui' huaríj nusu tyi'tíj maj je'ej pua'aj tyu'taxájtaca!. ²⁹ Ajta tipua'aj a'tíj je'ej pua'aj tyaataxáj a'íjci i júuricama'ra' i Dios, capu i Dios a'náj tyaatú'unyi'raj, sulu a'íj pu jin jajpuéetzij ja'mej jusén jíme!.

³⁰ A'yaa pu i Jesúz tyu'taxájtaca!, ji'nye a'yaa mu a'íimaj tyí'xajtaca'aj tijin tyiyáaru' pu tzajta' ú'sejria'ca'aj.

I náanajra' majta ihuáamua'mua' a'íjci i Jesúz (Mt. 12:46-50; Lc. 8:19-21)

³¹ Aj mu mij a'áa ja'rá'aj i náanajra' majta i ihuáamua'mua' a'íjci i Jesúz, a'áa mu mij jére' jo'tyu'úuj mati'ij tyu'ta'íjtaca' maj uyo'tájeeevej. ³² A'íimaj i tyeítyee i maj a'áa ja'taquéetima'caa i Jesúz jimi, a'íi mu a'yan tyaaté'exaa tijin:

—A'íjna a náanaj, majta a'ihuáamua' mu mapua'quéj jo'tyú'uu, a'íi mu muahuoo.

³³ Jesúz pu a'yan tyihuo'té'exaaaj tijin:

—¿A'tanyíj a'íin pué'een i nyináana majta i nye'ihuáamua'?

³⁴ Aj pu'ij huo'séerajraa i tyeítyee i maj jimi ataquéetima'caj, ti'quij a'yan tyihuo'té'exaaaj tijin:

—A'íi mu a'íin pué'een i nyináana majta i nye'ihuáamua!. ³⁵ Ji'nye a'tíj ti tina'aj ti a'yan ricij je'ej ti i Dios tyá'xie've', a'íi pu a'íin pué'een i nye'ihuáara' ajta nyaj náanaj.

A'íjna i a'tíj ti tyí'huastyaa (Mt. 13:1-9; Lc. 8:4-8)

4 ¹ Ajtáhua'aj pu i Jesúz huatyóochej ti tyihuó'mua'tyej a'ájna jo'tij ja'vá'asej i jájtyij. Majta je'en jéehua i tyeítyee tyúusij, Jesúz pu'ij báarcuj jitze atyájraa a'áa ti jáata' ja'cáva'ca'aj, majta a'íimaj i tyeítyee a'áa mu ja'ajtyequéetima'caa a tij jó'o'asej i jájtyij. ² Aj pu'ij jéehua tyihuó'ixaaj séej jíme' i nyúucarij.



San Marcos 4:2-8

A'yaa pu tyihuo'muá'tyej tijin:

³—Xáanamuajri! a'l'jci: A'tíj pu a'áa jo'mej jo'tij tyajá'huaste!. ⁴A'áa pu jooma'ca'aj jatahua'náaj i ímue'rrij, séecan pu'iij a'áa jo'vatziíjraa i juyéj jitze, aj mu mij i pína'see jaaré'je'puj i ímue'rrij. ⁵Ajta séecan pu a'áa jo'vatziíjraa tyetyéj tzajta' jo'tij quee jéehua jo'choota', aj pu'iij jiye'tzín acáanyaxij i ímue'rrij, ji'nye capu a'chu huácatyiij i chuéj, ⁶ajta tí'ij i xicáj eeré'nyej, aj pu'l'ij huariá'taj i ti arí ajnyéj, ajta quee a'chu ajo'canáana'ajma'caaj, a'l'ij pu jin huarial'huj. ⁷Ajta séecan i ímue'rrij, a'áa pu jo'vatziíjraa i tzícare'ej tzajta', tí'ij i tzícare'ej huahuásej aj pu'iij ja'vá'naj i ti arí ajnyéj, a'l'ij pu jin quee huáciíriaca' i ímue'rrij. ⁸Ajta séecan pu a'áa jo'vatziíjraa jo'tij naa jo'éen i chuéj, a'l'ii pu'iij ajnyéj, ajta je'en jéehua huáciíriaca', séecan pu i ímue'rrij a'yan tyi'ca'tyé'tya'ajma'caa i cíuxa'aj jitze siij tina'aj ty'a'jtanyéj i ímue'rrij a'chu seityéj japuan tamuáamuata' i jatzíj, ajta séecan a'chu huéeicatyej, ajta séecan anxietyej.

⁹Jesús pu ajta a'yan tyihuo'té'exaaj tijin:

—I maj iityanamuáarajmee, miche' tyámua' naa tyáanamuaj.

Ji'nye een jíme' séej nyúucarij jin tyihuá'mua'tyej
(Mt. 13:10-17; Lc. 8:9-10)

¹⁰Tí'ij a'yan tyu'ríj, Jesús pu jusíij a'áa jo'tyá'itzee, majta i maj hua' jamuán ajo'tyú'uucal'aj i maj tamuáamuata' japuan hua'puaj ará'asej, a'l'ii mu a'yan tyaatal'íhuo'ri! je'ej ti huatóomua'aj a'l'íjna i nyúucarij ti jaaxájtaca!. ¹¹A'yaa pu'l'ij tyihuo'té'exaaj tijin:

—Mua'ajmaj pu i Dios tyajá'mua'ixaatye' je'ej ti tyí'een jo'tij a'l'ín tyejé'ijtaj, ajta a'l'íjma i maj jéjre' maj jo'tyú'uu, a'yaa pu séej

nyúucarij jin tyihuá'mua'tyen, ¹² mata'aj mij quee tyi'tíj huaséj tyij majta ma'unyéjnye'rij, majta je'en quee tyi'tíj huánamuaj, tyij majta iityanamuáarajme'nyij, camu mij majta ja'antzaahuaty'e'sij i Dios, ti'ij a'íin tyihuo'tú'uunyi'.

**Jesús pu huá'ixaatye' je'ej tì huatóomua'aj i
nyúucarij tì jaxaj a'íjci i a'tíj tì tyí'huastyaa**
(Mt. 13:18-23; Lc. 8:11-15)

¹³ Aj pu'ij i Jesús a'yan tyihuo'ta'íhuo'ri' tijin:

—¿Nyi sequée yo'ítéej xá'raa a'íjci i nyúucarij? ¿Ji'nye tyí'irij siaj sjy yo'ítéej xá'ra'nyij i séecan i nyúucarij? ¹⁴ A'íjna i ímuel'rij tì huaste', a'yaaa pu een ti'ij i a'tíj tì huá'ixaatye' i Dios nyucaaj. ¹⁵ Séecan mu i tyeítyee a'yan een ti'ij i ímuel'rij juyéj jitze tì huavatzíijraa: a'íi mu mij tyámua' naa tyá'namuaj i nyúucarij, ajta mati'ij janamuáaran a'íi pu i tyiyáaru' jiye'tzín huo'huáari'racaaj i nyúucarij i maj merij jú'mua'reeriaca'aj i jutzájta!. ¹⁶ Majta séecan a'yaaa mu een ti'ij i ímuel'rij tyetyéj tzajta' tì huavatzíijraa: a'íi mu tyámua' naa tyá'namuaj i nyúucarij majta jutyamua've'ej ja'ancuriáa'sij, ¹⁷ ajta camu jéehua ajo'canáana'ajmee, camu mij juca'nyej, a'íj mu jin jajpuéetzij a'íjci jime' maj hua'xaahuarí i nyúucarij, na'ríij je'ej pua'aj mahuá'uuriaj, aj mu mij jiye'tzín yo'huá'xij i maj jitzán tyá'tzaahuatye!. ¹⁸ Majta séecan a'yaaa mu een ti'ij i ímuel'rij tì tzícare'ej tzajta' huavatzíijraa: a'íi mu janamuaj i nyúucarij, ¹⁹ ajta jéehua pu hua' jitze juxie've' je'ej maj tyi'tíj tyí'muarie', a'yaaa mu tyá'xie've' maj jéehua tyí'toova'aj, majta jaxie've' maj néijmi'i tyí'ijcha'ij. A'íi pu hua' tzajta' huataséjre'sij, capu ij jaatá'sij tì jitzán huatyá'itzeere'en i nyúucarij. ²⁰ Séecan mu majta séejre' i maj janamuaj i nyúucarij majta ja'rá'astej, a'íi mu mij jéehua tyu'tyáhuiire'sij, a'yájna ti'ij i ímuel'rij tì huahuásti'huaca' jo'tíj jo'jí're'en. A'íi mu mij a'yan tyu'tyáhuiire'sij ti'ij i ímuel'rij tì huáciiriaca' a'chu seityéj japuan tamuáamuata' tì cure'tye'ejmee, majta séecan huéecatyej, majta séecan anxietyej sij ajta sij.

A'íjna i tatzárij tì antyítaa i huootyij jitze
(Lc. 8:16-18)

²¹ Jesús pu ajta a'yan tyihuo'té'exaaaj tijin:

—¿Nyiquij i tatzárij mua'antyítieeraj mej mij cajún jityej ye'rágchetyij, ca' mej mij utáatzij jityej ye'rágchetyij? Capu xaa nyu'uj, sulu áan mu imuáj yo'ojesij, ta'aj ij a' imuáj atányeeri'cij. ²² A'yaaa pu cha'tána'aj, capu tyi'tíj jusén jin avíitzi'huaj ja'mej, sulu huataséjre'sij, na'ríij tyi'tíj maj aviitzi'jin mua'reeij i jumua'tzíira'aj tzajta' a'íi pu ajta mua'reeri'huan. ²³ Mu siaj iityanamuáarajmee, tyámua' xu naa tyáanamuaj.

²⁴A'yaa pu ajta tyihuo'té'exaaj tijin:

—Xaaséj tyi'tij siaj namuaj. A'chu siaj mua'aj tyi'tij huo'tá'an i séecan, a'yaa pu cha'tána'aj i Dios mua'ajmaj tyajamuaatá'sij, ajta je'en jéetze' tyajamuaatá'sij. ²⁵Ji'nye a'íjna i ti tyi'tij cíi tyí'ijcha'ij, a'íi pu jéetze' tya'ancuriáa'sij, ajta i ti quee tyi'tij tyí'cha'ij, a'íj mu tyáa'ri'raj a'chu ti tyi'tij tyí'cha'ij.

I nyúucarij ti jaxaj a'íjci i ímue'rij ti huose'en

²⁶A'yaa pu ajta tyihuo'té'exaaj i Jesús tijin:

—A'yaa pu tyí'een a'ájna jo'tij i Dios tyejé'ijtaj ti'ij a'tij ti ímue'rij huahuástej i chuéj japua, ²⁷ti a'yan cha'tána'aj tye'mej tipua'aj tyáucusime'en a'íjna i a'tij, na'ríij atányeerij, capu jamua'reeren je'ej ti ye'ej tye'ejnyésij tipua'aj tíca' na'ríij tújca a'íi pu i ímue'rij acányesij ajta je'en huose'en. ²⁸A'íi pu i chuéj jusíij tyámua' joorej ti'ij acáanyej i ímue'rij, aj pu'ij ajnyésij i xámue'ra' ajta je'en huatámueeya'aj, ti'quij i muéeya'ra' jitze canyáatíra'sij i jatzíj. ²⁹Tipua'aj arí i jatzíj huáca'naj aj mu mij jaariá'siire'sij, ji'nye pu'ríj tya'rá'aj a'ájna xicáara' jitze i maj jitzán tyúutza'nyii.

A'íjna i nyúucarij ti jaxaj i mostáasaj jatze'

(Mt. 13:31-32; Lc. 13:18-19)

³⁰A'yaa pu ajta tyihuo'té'exaaj i Jesús tijin:

—Ji'nye ye'ej tyí'ríj tyej tyij a'yan tyaataxáj je'ej ti tyí'een jo'tij i Dios tyejé'ijtaj, tyi'tanyí tin a'yan huasé'rín? ³¹A'yaa pu een ti'ij i mostáasaj jatze' ti i chóota' atyáhuasti'huaca'. A'íi pu a'íin pué'een i jatzíj ti jéetze' cíleen ti síyan séejre' i cháanacaj japua, ³²ajta ti'ij atyáhuasti'huaj i jatzíj, a'íi pu'ij huose'en ti'quij jéetze' uhuatíti'ij ja'mej quee i ti tyí'huasti', tyámua' pu viváajma'aj tyi'tyáxamue'ej ja'mej, a'íj pu jin i'ríitaj ja'mej maj i pína'see jitzán tyi'huoo'ito'tye' a'íjci jityej i ti huáqueenyi'iste'.

Je'ej ti ye'ej een jíme' i Jesús tyihuá'mua'tyajca'aj séej nyúucarij jíme'

(Mt. 13:34-35)

³³A'yaa pu i Jesús tyihuá'mua'tyajca'aj i nyúucaria'ra' i Dios, jéehua pu tyihuó'ixaaj séej nyúucarij jíme', a'chu maj a'yan pújooriajva'aj mej mij yó'itej muá'ra'nyij. ³⁴Capu tyi'tij huá'ixaaty'a'ca'aj ti quee a'yan séej nyúucarij jíme', ajta a'íimaj i maj jamuán huacíj tyámua' pu amitéeria'can jin tyihuá'ixaaty'a'ca'aj jujíme'!

Jesús pu jaatyápu'a'rij i áacaj ajta i jájtyij ti tyúuta'hua'aj (Mt. 8:23-27; Lc. 8:22-25)

³⁵A'ájna xicáara' jitze ti'ij tyechúmua'risima'caj, Jesús pu a'yan tyihuo'té'exaaj a'íjma i maj jamuán huacíj tijin:

—Che'rej tyiche' antáciinyej után jitze pujmua!.

³⁶ A'áa mu'u jij huaja'ajhua'xíi i tyeítyee mati'ij mij yo'ví'tij i Jesús i báarcuj jitze a'áa ti jo'tyávaaca'aj, majtáchua'aj mu séecan hua' jamuán ujó'ju' séecan báarcuj jitze. ³⁷ Aj pu'ij ca'nyífin jin huatá'aacariaca', tyámua' pu apúutzarrij tyi'tyúuta'hua'aj a'íi pu'ij atyáxijrihua'aj i báarcuj jitze, pu'ríj ij tin avá'ajistisima'aj i báarcuj jitze. ³⁸ Ajta a'íjna i Jesús pu huatácu hua'huarita' pujmua' i tyeítyee tyi'ljmú'tzij pu huáca'tyii. Aj mu mij jaajístej majta je'en a'yan tyaaté'exaa tijin:

—Maeestro, ¿nyiquee a jitze juxie've' tyaj tyeríj tin atyácul'sij?

³⁹ Aj pu'ij i Jesús ájchej ti'quij jaata'íjmuejri' i áacaj, ajta i jájtyij a'yan tyu'tajé tijin:

—Capáj che' jujhua'naj. Huatyáapua'rrij.

Aj pu'ij huatyáapua'riaca' i áacaj ajta je'en naa tyo'riooje'yaca' i jájtyij. ⁴⁰ Aj pu'ij i Jesús a'yan tyihuo'té'exasaj a'íjma i maj jamuán huacij tijin:

—¿Ji'nye siaj sij tyí'tziinye? ¿Nyi sequée xu tyámua' tyá'tzaahuatye?

⁴¹ A'íi mu mij tyámua' tyu'tátziin, majta a'yan tyúu'ihuo'raca'aj séej jamuán majta séej tijin:

—¿A'tanyíj pué'een a'mújna, mej mij majta ja'astej i áacaj ajta i jájtyij?

A'íjna i a'tíj Gadara ti já'ma'can

(Mt. 8:28-34; Lc. 8:26-39)

5 ¹ Aj mu mij után jitze pujmua' ja'rál'aj, a'yaa pu tyá'rátjyapuaj tijin Gadara. ² Ti'ij na'aj tye'táraa i Jesús i báarcuj jitze, síij pu tyáati' jimi ajtyáxiiriaca' ti tyiyáaru' tzajta' ú'sejre!. A'íjna i tyáati' a'áa pu je'táraa jo'maj i mui'chityee já'ava'tacaa, ³ ji'nye a'áa pu já'chajca'aj. Capu i'riitaca'aj ti a'tíj jaatyáji'que'en, nyi cadéenaj jime!. ⁴ Mue'tíj mu'ríj ja'náji'ca'ca'aj i muáca'ra'an majta i icájra' jitze i cadéenaj jime!, je'en pu jajtzá'na'aj, capu je'ej tyíl'riitaca'aj ti a'tíj jaamué'tin. ⁵ A'náj ti na'aj pu a'áa jo'chá'canya'aj i jiríj jitze ajta jo'maj mui'chityee já'ava'tacaa tújca ajta tíca', antyijíihuajta tyetyej jin curióoto'xa'aj. ⁶ Ajta ti'ij a'íj huaséj i Jesús, aj pu'ij ootatéj, ti'ij ij tyítunutaca' a'ájna véjri' jo'tij jo'tyávaaca'aj i Jesús, ⁷ ti'quij a'yan tyaatajé ca'nyín jime' tijin:

—Capáj nyéetziж je'ej nyoo rej, Jesús, i paj yójra' pué'een i Dios ti néijmi'que' tyílijta. A'yaa nu tyímuahuavij i Dios jitze ma'can paj quee puéjtzij nyata'care'en.

⁸ A'yaa pu tyíxajtaca'aj, ji'nye Jesús pu a'yan tyaatájeevacaa'aj tijin:

—Tiyiyáaru' mu paj je'ej pua'aj metyóomua'rej, iirájra' mu tyévij tzajta!.

⁹ Jesús pu a'yan tyataa'íhuo'ríi tijin:



© 1996 David C. Cook

San Marcos 5:1-8

—¿Ji'nye pua'antyapuaj?

Aj pu'ij a'yan tyu'tanyúj tijin:

—A'yaa nu ántyapuaj tijin Legión, ji'nye tyámua' tu tyí'tyamui'ljj.

¹⁰ A'íi pu'ij a'yan jéehua tyá'huaviraca'aj a'íjci i Jesús tiquee hue'rá'ityacare'en a'ájna. ¹¹ Ajta a'ájna vérij, jéehua mu i tuíixuj a'áa tyojóohuiriaca'aj, ¹² a'yaa mu mij i tyiyáaru'uj tyaatáhuaviiri' tijin:

—Taata'ityij i tuíixuj jimi taatá' tyej tyij hua' tzajta' utyájrutyej.

¹³ Aj pu'ij i Jesús huo'ta', matí'ij mij iiráaci i tyiyáaru' i maj tzajta' séjria'ca'aj a'íjci i tyévij, aj mu mij i tuíixuj tzajta' utyájrupij. Majta i tuíixuj a'yaa mu ará'axcaa a'chu hua'puaj ví'ra'aj, a'íi mu mij jo'huáachajraa a'ájna pujmua' jo'tij ja'ancátyee, aj mu mij ujvátzij majta je'en jáata' atyáavatzij a'áa mu mij néijmi'i atyájcuii.

¹⁴ Majta a'íimaj i maj hua'cha'iica'aj i tuíixuj a'íi mu tyu'tátziin, matí'ij mij jó'ju' maj tyojo'taxáj i chajta', majta a'íjma i maj a imuáj antacháatimee. Aj mu mij aje're'nyej i tyeítyee mej mij jáamua'reej je'ej ti tyi'tíj huaríj. ¹⁵ Matí'ij a'áa jo're'nyej jo'tij je'ej jé'eenye'ej i Jesús, aj mu mij a'íj huaséj i tyévij i tyiyáaru'uj maj tzajta' ú'sejria'ca'aj, a'áa pu jo'tácatyii, capu che' jutimue'raca'aj, pu'ríj tyámua' éenya'ca'aj a'íjna i tyévij. Jéehua mu i tyeítyee tyu'tátziin, ¹⁶ majta a'íimaj i maj jaaséj je'ej ti tyi'tíj huaríj, néijmi'i mu huo'té'exaa i tyeítyee je'ej ti tyáaru i tyévij i tyiyáaru'uj maj tzajta' séjria'ca'aj, ajta je'ej ti tyi'tíj huó'ruuj i tuíixuj. ¹⁷ Aj mu mij huatyóohuuij i tyeítyee maj jaatáhuavij i Jesús t i jó'ra'nyij a'ájna.

¹⁸ Ti'ij i Jesús atyájraa i báarcuj jitze, a'íjna i tyévij tyiyáaru' maj tzajta' séjria'ca'aj, a'íi pu a'yan tyaatáhuaviiri' a'íjci i Jesús t i jaatá'an t i jamuán jó'me'en. ¹⁹ Ajta i Jesús capu jaatá', sulu a'yaa pu tyaaté'exaa tijin:

—Áricuj jó'ra! jo'paj ja'chej hua' jamuán a'ihuáamua', pajta je'en néijmi'i huo'té'exaatye'en je'ej tì muáaruuj i tavástara', ajta je'ej tì tyimuá'ancu'vaxij.

²⁰ Aj pu'ij jó'raa i a'tíj, ajta je'en huatyóochej tì huo'té'exaatye'en i maj a'áa jo'cháatimee a'ájna tì a'yan tya'rátjyapuaj tijin Tamuáamuata' tì Chájta'najmee, je'ej tì tyl'tíj huáruuj jimi a'íjna i Jesús, néijmi'i mu i tyeítyee je'ej tyityo'tóomuajtyaca!.

A'íjna i íiti' tì tyí'cui' ajta i yójra' a'íjci i Jairo (Mt. 9:18-26; Lc. 8:40-56)

²¹ Tì'líj i Jesús huariá'raa i báarcuj jitze a'áa pu ja'rá'aj után jitze pujmua', aj mu mij jéehua i tyeítyee ajtyáxiiriaca', ajta i Jesús a'áa pu jo'tyéechaxij jo'tij joo'asej i jájtyij. ²² Aj pu'ij siij ará'aj i tì va'cán jin tyl'tyávaaca'aj hua' tyeyúuj tzajta', a'yaa pu ántyapuaaca'aj tijin Jairo, tì'líj jaaséj i Jesús aj pu'ij tyítunutaca' a chóota' jo'tij jo'tyéjvee, ²³ jéehua pu a'yan tyaatáhuaviiri' tijin:

—Nyiyooj pu á'me'rej, mujo'té'yí'líj pata'aj ja'ajtamuárie'en ta'aj huarúj, ajta je'en júurij já'ra'nyij.

²⁴ Jesús pu'ij jamuán ujó'mej, majta jéehua i tyeítyee ujó'ju' hua' jamuán tyámua' mu mij tyityóotajchaca'aj. ²⁵ Ajta hua' tzajta' i tyeítyee íiti' tì tyí'cui' pu ajo'tyávaaca'aj, pu'ríj tamuáamuata' japuan hua'puaj nyinyi'ra'aj á'tyeevi'ca'aj tì tyí'cui', a'náj tina'aj pu anámui'yaca'aj i xúure'ej. ²⁶ Jéehua pu jajpuéjtzica'aj a'íjci jíme' tì arí jéehua huóolijtaca' i maj tyí'hua'tacaa jimi, pu'ríj ij néijmi'i tyaja'huóorieeca'aj, ajta capu tyl'tíj jarújtye!. Sulu a'yaa pu'u'j jéetze' tyl'líjcuí'nyaca!. ²⁷ Tì'líj tyú'namuajri' je'ej tì tyl'tíj huáruuj i Jesús, a'íjna íiti' pu hua'huarita' i tyeítyee aje're'nyéej tì'quij ja'ajtamuáriej i máancajra'an i Jesús. ²⁸ Ji'nye a'yaa pu tyí'mua'ajcaa tijin: "A'íj nu jin tyámua' rínyij tipua'aj nya'a'jtamuárie'en máancajra'an." ²⁹ Tì'líj a'yan huaríj aj pu'ij huatyápu'a'riaca' i tì anámui'yaca'aj i xúure'ej, ajta a'yan jaata'aj i tzajta' tì arí tyámua' huaríj. ³⁰ Jesús pu jáamua'reeri' tì a'tíj tyú'huaaj tì tyí'cui', aj pu'ij pu ájvej huo'séerajraa i tyeítyee, ajta je'en a'yan tyu'ta'íhuo' tijin:

—¿A'tanyíj na'ajtamuáriej i nyamáancaj jitze?

³¹ A'íimaj i maj jamuán huacíj mu a'yan tyaaté'exaa tijin:

—Muáaj paj hua'sej maj jéehua i tyeítyee mua'tajche, pajta a'yan tyl'ihuo' tijin: "¿A'tanyíj na'ajtamuáriej?"

³² Ajta i Jesús pu huo'séerajyi'caa i maj a'áa jo'váatima'caa, tì'líj jaaséj a'tíj tì ja'ajtamuáriej. ³³ Aj pu'ij i íiti' tyu'tátziin ajta tyóoviveesima'aj, ji'nye jamua'reeriaca'aj tyl'tíj tì je'ej jáaruuj, aj pu'ij ajtyáxiiriaca' jo'tij jo'tyéjvee i Jesús tì'quij jimi tyítunutaca', ajta je'en néijmi'i jaaté'exaa tzáahuatyi'ra'aj jíme!. ³⁴ Jesús pu a'yan tyaaté'exaa tijin:

—Nyiyóoj, a'íj paj jin tyámua' huaríj i paj tyá'antzaahuaj. Áricuj axáahuaj jó'ra' che' tyámua' mua'axcaj i paj períj huarúj.

³⁵ Óoche' pu tyi'tyaxáatasima'caj i Jesús, matí'ij séecan ará'aj a'áa maj ja'chej a'íjci jamuán i ti va'cán jin tyi'tyéjvee i hua' tyeyúuj tzajta', a'yaa mu mij tyaaté'exaa i yo'puáara'an i ti tyi'cui' tijin:

—Pu'ríj huamuí' a'yóoj. ¿Ji'nye pej pij pooj tyá'itzaaj mu maeestro?

³⁶ Ajta i Jesús, capu hua'antzaahuaj a'íimaj, a'yaa pu'ij tyaaté'exaa i yo'puáara'an tijin:

—Capáj tyi'tziinye'ej, a'íi pu'u'juxie've' paj tyá'antzaahuatye'en.

³⁷ Ajta quee a'tíj huatá' mej mij jamuán ujó'ju', sulu a'íj pu'u'j i Pedro, ajta i Santiago, ajta a'íjci i Juan, i ti ihuáaria'ra' pué'een i Santiago. ³⁸ Matí'ij a'áa ja'rál'aj jo'tij ja'chej i yo'puáara'an a'íjci i ti huamuí', jéehua mu i tyeítyee huaséj i maj ca'nyíin jin tyóoyiinyisime'ej, ³⁹ aj pu'ij utyájrupij uchi'táj ti'quij a'yan tyihuo'té'exaa tijin:

—¿Ji'nye mej mij je'ej uhuatyáhuaasij siajta jéehua juyiin? Capu mui'chij mu pá'ri'ij, sulu tyáucusij pu'u'j.

⁴⁰ Aj mu mij i tyeítyee jaatya'atzárraa a'íjci i Jesús, ajta a'íi pu néijmi'caa iirá'ityaca', aj pu'ij a'íjna jo'ví'tij i táatajra' ajta i náanajra' ajta a'íjma i maj jamuán huajú'ca'aj, aj pu'ij a'úun jo'tyájrupij jo'tij je'ráca'tyii a'íjna i pá'ri'ij. ⁴¹ Ti'quij jajví' i muáca'ra'an jitze ajta je'en a'yan tyaatajé tijin:

—Taliita, cuumi —a'íjna i nyúucarij, Taliita cuumi, a'yaa pu huatóomua'aj tijin: Pá'ri'ij, muéetzij nu a'yan tyi'mua'ixaatye', ájchesij.

⁴² Aj pu'ij ájchej i pá'ri'ij, ti tamuáamuata' japuan hua'puaj nyinyi'ra'aj jájcha'híca'aj ajta je'en huatyóochej ti ajo'cha'canye'en. Majta a'íimaj i tyeítyee jéehua mu je'ej tyo'taséj. ⁴³ Ajta i Jesús jéehua pu huo'ta'íj maj quee a'tíjixaatye'ej, ajta je'en tyu'ta'íjtaca' mej mij tyáacue'tyej a'íjci i pá'ri'ij.

Jesús Nazaret ti já'ma'can

(Mt. 13:53-58; Lc. 4:16-30)

6 ¹Aj pu'ij i Jesús jó'raa jo'tij jo'v'e'sej, majta jamuán a'íimaj i maj jamuán huacíj. ²Ti'ij atyojo're'nyej a'ájna xicáara' i maj jitzán juso'pii, aj pu'ij huatyóochej ti tyihuó'mua'tyej jo'maj jóosi'rii. Jéehua mu tyeítyee jáanamuajri' a'íjci i Jesús, aj mu mij je'ej tyo'taséj majta je'en a'yan tyuú'ihuo'raca'aj tijin:

—¿Jo'quíj yo'rí'rej a'mújna i nyúucarij? ¿Jo'quíj ye'tyá' i ti'ij huápui'ij tyojó'itej, ajta jaayí'tin ti tyi'tfj tyámua' tyu'tasére?

³ ¿Nyiquee a'íin pué'een i ti tyi'si'chacaa, yójra' i María, majta a'íin ihuáamua'mua' pué'een i Jacobo, i José, i Judas, ajta a'íjna i Simón?

¿Nyi mequee a'íimaj majta i ihuáamua'mua' i maj úucaa, tajamuán yéchej?

A'íj mu jin quee jimi tyá'tzaahuatya'ca'aj. ⁴Ajta i Jesús pu a'yan tyihuo'té'exaaj tijin:

—Jotij na'aj mu tyámua' yó'sej a'íjci i ti jaxaj i nyúucaria'ra' i Dios, majta i maj a'áa jo'cháatimee jo'tij ja'chej, majta i maj jamuán aja'chej, camu naa yó'sej a'íimaj.

⁵A'íj pu jin quee i Jesús jéehua tyu'muáriej a'ájna, séecan pu avá'muarie'xij i tyeítyee, ajta tyihuó'huua. ⁶Ajta je'ej pua'aj tyóomua'ajcaj ji'nye camu i tyeítyee jimi tyá'tzaahuatya'ca'aj.

Jesús pu huo'ta'ítyaca' a'íjma i maj jamuán huacíj mej mij jaariá'xaj i Dios nyuuaaj

(Mt. 10:5-15; Lc. 9:1-6)

A'áa pu i Jesús véjri' jo'chá'canya'aj, tyihua'mua'tyáaj. ⁷Aj pu'ij huo'tajé a'íjma i maj tamuáamuata' japuan hua'puaj ará'asej, ti'quij hua'relé'ityixij tyahua'puaj ma'can, ajta huo'ta'íj mej mij huo'tamuáritye'en i tyiyáaru'uj i maj hua' tzajta' séejre' i tyeítyee. ⁸A'yaa pu tyihuo'ta'íj maj quee tyi'tij a'aj i maj jin huatyóohuiire'en i juyéj jitze, sulu maj a'íj mana'aj antyichóoj i tyáxu'uj. Capu juxié'va'ca'aj maj tyo'ca'íne'ej nusu maj túmii antyi'á'aj. ⁹A'yaa pu tyihuo'ta'íj maj ajtóoca'queetya'xi'in, ajta capu huo'ta' maj hua'puácaa tye'entyicáanarij. ¹⁰A'yaa pu tyihuo'té'exaaj tijin:

—Siatil'ij mua'aj chi'táj u'tyájrutyej, a'áa xu jo'tyá'ítzeere'en a'chu siaj á'tyeeren a'ájna a chájita!. ¹¹Ajta tipua'aj majá'hua' mequee jamuaja'tá'care'en siaj utyájrutyej, nusu mequee já'muanamuajracuj, xii'raciinyij siajta jaatáca'tzij i juca'quéj ta'aj ij cáaxij i chuéj, a'yaa mu a'íimaj tyá'mua'reeren maj ootyá'ítzee i Dios jimi.

¹²Matil'ij mij eeráacij a'íimaj i maj jamuán huacíj, mej mij huo'relé'ixaatyee'en i tyeítyee maj tyá'antzaahuatye'en i Dios jimi.

¹³Jéehua mu hue'rálityaca' i tyiyáaru'uj maj hua' tzajta' séjria'ca'aj i tyeítyee, majta jéehua tyihuó'huua i maj tyí'cucui'ca'aj a'íj mu hua'vel'huatya'xij i aséityij i hua' mul'utze'!

Matil'ij jaajé'caj a'íjci i Juan i ti huá'íiraca'aj

(Mt. 14:1-12; Lc. 9:7-9)

¹⁴Ajta a'íjna i tajtúhuan i ti a'yan ántyapuaj tijin Herodes, a'íi pu tyú'mua'reeri' je'ej ti tyi'muarie'ca'aj Jesús, ji'nye pu'ríj néijmi'que'! mua'reeri'huaca'aj. Séecan mu a'yan tyí'xajtaca'aj tijin:

—A'íjna i Juan i ti huá'íiraca'aj a'íi pu huatájuuriaca', a'íj pu jin jaayí'tin ti a'yan tyi'muarie'ej.

¹⁵Majta séecan a'yan tyí'xajtaca'aj tijin:

—A'íi pu a'ín pué'een i Elfás i Dios nyuuaaj ti xajtaca'aj.

Majtáhua'aj séecan a'yan tijin:

—A'íi pu a'lín pué'een i ti tyí'xaj i Dios jitze ma'can, a'yájna mati'ij i maj ará'tyeej tyí'xajtaca'aj.

16 Ti'ij i Herodes a'yan tyú'namuajri!, a'yaa pu tyu'taxájtaca' tijin:

—A'íi pu a'lín pué'een i Juan. Nyáaj nu jaata'íjtaca' maj ji'ijvchéj i mu'úura' ajta ijíij arí huatájuuriaca'!

17 A'íi pu i Herodes jaata'íjtaca' maj ja'náji'que'en majta je'en je'tyáanaj a'íjci i Juan, ajta i sítí' ti a'yan ántyapuaaca'aj tijin Herodías, a'íi pu fíra'ra'an pué'eenye'ej i Felipe ti ihuáaria'ra' pué'eenye'ej a'íjci i Herodes, a'íi pu'ij i Herodes ja'ancuré'vi'tij a'íjci i íitaj i Felipe ti jatyévi'tinya'aj. 18 A'íj pu jin i Juan a'yan tyaaté'exaatay'ca'aj a'íjci i Herodes tijin:

—Capu a'yan tyi'tyéevijtij paj jatyévi'tinye'en mua' ihuáara' ti jatyévi'tinya'aj.

19 Herodías pu jájcha'íiria'ca'aj a'íjci i Juan, a'íj pu jin jaje'catamui'ca'aj, ajta quee pújooriajval'aj, 20 ji'nye Herodes pu jatziiinya'ca'aj, a'íi pu jamua'reeriaca'aj ti tyámua' tyí'tyevistaca'aj i Juan, ajta quee tyi'tíj jin á'itzeeria'ca'aj, a'íj pu jin jacha'íica'aj. Tyij ajta quee je'ej jájtyooove'ej je'ej ti huárinyij til'ijta janamuajraj, Herodes pu tyámua' naa tyá'namuajraca'aj a'íjci i Juan. 21 Ti'ij tya'rá'aj a'ájna xicáara' a'náj ti ma'can i Herodes, jéehua pu tyeítyee huatá'inyej, mati'ij mana'aj i maj tyí'ijta, ajta i tyeítyee i maj va'cán jin tyityetyúu'pu' majta i maj jéehua juxie've' a'áa maj huacháati'mee a Galileea. 22 A'íjna i yójra' i Herodías, a'íi pu utyájrupij u chi'táj ti'ij tyu'tyéeye'en jo'maj tyajá'cua'ajcaa, jéehua pu ja'ránajchaca' a'íjci i Herodes ti'ij tyu'tyéenyej, ajta a'íijma i maj jamuán tyí'cua'ajcaa, aj pu'ij i tajtúhuan a'yan tyaaté'exaa i íitaj tijin:

—Naatáhuavijj tyi'tíj paj je'ej tyí'xie've', nyáaj nu muaatá'sij.

23 Jéehua pu a'yan tyée'ixaaj ti jaatá'sij tyi'tíj ti jaatáhuaviiraj, ajta quee je'ej rinyij tipua'aj jaatáhuavijj jé'ta' jo'tij a'íin tyihuajá'ijtye!. 24 Aj pu'ij iirájraa a'íjna i íiti!, ti'ij ij a'yan tyaata'íhuo'ri' i junáanaj tijin:

—¿Tiy'tanyí nyaatáhuavijj?

Aj pu'ij i náanajra' a'yan tyaaté'exaa tijin:

—Huatáhuaviiri' i mu'úura' a'íjci i Juan i ti huá'íiraca'aj.

25 Aj pu'ij ajtáhua'aj jiye'tzín utyájrupij i íiti! jo'tij je'rácatyii i tajtúhuan, ti'quij a'yan tyaaté'exaa tijin:

—A'yaa nu tyá'xie've' paj naatí'tye'en túxa'aj jitze i mu'úura' i Juan i ti huá'íiraca'aj.

26 Aj pu'ij i tajtúhuan jéehua huatóoxaamujrityej, ajta arí a'yan tyu'taxájtaca' ti a'yan rinyij meeséeracaj a'íimaj i ti huo'tá'inyej, a'íj pu jin ja'rálastee i junyúucaa. 27 Ti'quij séej i xantáaru' huata'ítyaca' ti'ij jaajé'caj ajta je'en u uyo'ta'ítyej i mu'úura' i Juan. Aj pu'ij i xantáaru' ujó'mej jo'tij je'tyánami' i Juan, ti'quij ji'ijvchéjchaca' i

mu'úura! ²⁸ajta je'en uya'rájtii i túxa'aj jitze. A'íi pu'ij a'íj huati'ij i yójra' i Herodías; ti'ij ta'ij a'íin ayoof'tyej i junáanaj.

²⁹Mati'ij a'íimaj i maj Juan jamuán huací'ca'aj jáamua'reeri!, a'íi mu ajo'ré'nyej mej mij yo'chueenyij i muí'chij, majta je'en ja'lá'naj.

Jesús pu tyihuo'cue'ej i maj anxí ví'ra'aj ará'asej

(Mt. 14:13-21; Lc. 9:10-17; Jn. 6:1-14)

³⁰Ti'ij a'yan tyu'ríj, i maj tamuáamuata' japuan hua'puaj ará'asej, a'íi mu tyúusij jo'tij jo'tyávaaca'aj i Jesús, mati'ij mij néijmili jaaté'exaa je'ej maj tyi'tij huáruuj ajta je'ej maj tyihuó'mua'tyej.

³¹Jesús pu a'yan tyihuo'té'exaa tijin:

—Musio'té'yi'ij, tyiche' tajíimua'aj huátaso'pe'en majá'hua' jo'tij quee ja' a'tij.

Ji'nye jéehua mu i tyeítyee ajo'ré'nyinyiica'aj jo'tij jo'tyávaaca'aj i Jesús, majta jo'cf'ca'aj mamue'tij i tyeítyee, capu ij i'riitaca'aj maj tyú'cua'nyij a'íijma jamuán i maj jamuán huacíj. ³²Ajta i Jesús majta i maj jamuán huacíj a'íi mu jo'cij i báarcuj jitze, mati'ij mij a'áa ja'rá'aj jo'tij quee ja' a'tij. ³³Majta mue'tij mu huo'séj mati'ij jo'cij, majta je'en huo'muájtyaca', a'íj mu jin jui'icán ajo'ré'nyaxij jo'tij na'aj maj huacháatimee, a'íi mu mij anaquéej a'áa ja'rá'aj jo'maj ja'ra'íixajche'. ³⁴Ti'ij i Jesús eetáraj i báarcuj jitze, jéehua pu i tyeítyee huaséj, ti'ij ij huatóoxaamujri, ji'nye a'yaa mu huasé'rihua'aj mati'ij cánaya'xii tiquee a'tij huá'siiria'ca'aj, aj pu'ij huatyóochej ti jéehua tyihuó'mua'tyej. ³⁵Ti'ij huatyéchumua'riaca', a'íi mu i maj jamuán huacíj aje'ré'nyej mati'ij mij a'yan tyaaté'exaa tijin:

—Pu'ríj huachúmuá!, ajta quee a'tij ya' ja'chej iiye'ej véjri!.

³⁶Hua'ré'ityixi' mu tyeítyee, mej mij jo'cixi'in jo'maj jo'cháatimee ajta mej mij tyl'tij huánanan i maj jáacua'nyij.

³⁷Ajta i Jesús pu a'yan tyihuo'té'exaa tijin:

—Mua'aj setyihuó'cue'tyej.

A'yaa mu a'íimaj tyityaatanyúj tijin:

—¿Nyi a'yan petyá'xie've' tyaj ujó'ju' tyajta je'en a'yan tyeetyláxijtye'en i túmii a'chu ti jumue'tij hua'puaj anxietyej xícáj jitze tyej tyij i páan huánanan tyej tyij tyihuó'cue'tyej?

³⁸Jesús pu a'yan tyihuo'té'exaa tijin:

—Séricuj xáahuo. ¿A'chunyéj pua'mácan mua'aj séjcha'ij i páan?

Mati'ij jáamua'reeri!, a'yaa mu mij tyaaté'exaa tijin:

—Anxívij i páan majta hua'puaj i hue'tyée.

³⁹Aj pu'ij huo'ta'íjtaca' maj oorá'sej i tyeítyee metyamue'tijma'aj a'ájna i jo'tij jo'tu'píj, ⁴⁰a'yaa mu mij tyityo'rásaca', séecan anxietyej mu ara'ástima'aj, majta séecan huá'puatyej japuan tamuáamuata' mu ara'ástima'aj. ⁴¹A'íi pu'ij Jesús ja'ancurái'puj i páan ti anxívij ajta i hue'tyée i maj hua'puaj, jútye' pu'ij jo'nyéerij ti'quij tyaatatyójtzi'rej

í Dios, ajta je'en ja'antyítaaraxij í páan, ti'quij huo'rái'pu'uj a'íijma í maj jamuán huacíj mej mij a'íimaj huo'ráai'pu'tye'en í tyeítyee. A'íj pu ajta huo'rái'ij í hue'tyée. ⁴²Néijmi'i mu tyú'cuaa í tyeítyee, majta tyámua' naa tyityaatajú'xaj, ⁴³aj mu mij a'íimaj í maj jamuán huacíj jaariá'sii í páan ti avá'itzee majta í hue'tyée, tamuáamuata' japuan hua'puaj sicii mu mij tyá'vá'jistej. ⁴⁴Majta í tyétyacaa í maj tyú'cuaa, a'ya mu ará'axcaa a'chu anxi ví'ra'aj.

Jesús pu aja'vá'ma'ca'aj í jájtyij japua

(Mt. 14:22-27; Jn. 6:16-21)

⁴⁵Tí'ij a'yan tyu'ríj, Jesús pu huo'ta'íj a'íijma í maj jamuán huacíj maj atyáciinyej í báarcuj jitze mej mij a'íimaj anaquéej antáciinyej után jitze pujmua', a ti a'yan tyaja'rátjyapuaj tijin Betsaida, ajta í Jesús a'áa pu ajo'tyá'itzee tí'ij hua're'ityixi'in í tyeítyee. ⁴⁶Tí'ij hua're'ityixi'íj, aj pu'ij i jiríj jitze antyíraa tí'ij huatyényuunyij í Dios jimi. ⁴⁷Tí'ij huaré'chuixariaca', a'áa mu merij jé'ta' joojú'ca'aj í jájtyij japua í báarcuj jitze mua'rátaya'aj. Ajta í Jesús pu jusšíj ajo'tácatyii í jiríj japua, ⁴⁸aj pu'ij huo'séj ti hua'tyesi'hularitya'ca'aj í maj huaju'caj í jájtyij japua, ji'nye a pu ja'va'aacaca'aj. Tí'ij tapuá'risima'caj, Jesús pu aje'ré'nyej a'ájna jo'maj joojú'ca'aj í báarcuj jitze, a'áa pu ja'vá'ma'ca'aj í jájtyij japua, pu'ríj tñ hua'náje'yitye'sima'aj. ⁴⁹Mati'ij a'íimaj jaaséj ti jájtyij japua aja'vá'ma'ca'aj, a'ya mu tyu'muá'aj ti nyájcan pue'éenye'ej, aj mu mij huatyejíihuajra, ⁵⁰ji'nye néijmi'i mu jaaséej majta tyámua' tyu'tátziiñ. Aj pu'ij í Jesús a'yan tyihuó'té'exaaj tijin:

—Xaatyáapua'rij. Nyáaj nu a'íin pué'een, caxu tyí'tziinye'ej.

⁵¹Tí'ij atyájraa í báarcuj jitze, aj pu'ij huatyápua'riaca' í ti huá'aacaca'aj, aj mu mij je'ej tyo'taséj, ⁵²ji'nye capu je'ej huá'miteerasta'yca'aj je'ej ti huaríj tí'ij jaatámui'rej í páan, ji'nye jujíimua'aj mu tyóonaamuaj í jutzájta'.

Jesús pu tyihuó'huaa a'íijma í maj tyí'cucui'ca'aj a'ájna a Genesaret

(Mt. 14:34-36)

⁵³Mati'ij antacíj í jájtyij japua, a'áa mu mij ja'rá'aj a ti a'yan tyaja'rátjyapuaj tijin Genesaret, a'áa mu ye'ríá'tapej í báarcuj jo'tij ja'val'ástimee í jájtyij. ⁵⁴Mati'ij eetacíj í báarcuj jitze, jiye'tzín mu í tyeítyee jaamua'aj a'íjci í Jesús. ⁵⁵A'íj mu jin jiye'tzín ootyáhuaachaca' mej mij hua'ria'tixi í utáatzij japua í maj tyí'cucui' a'ájna jo'tij jo'tyávaaca'aj í Jesús. ⁵⁶Ajta jo'tij na'aj ti jo'ré'nyinyica'aj, ti chájta'najmee ti cíle'en na'ríij ti viváajma'aj, a'áa mu huojo'ráatzajyi'caa í cáayej jitze, aj mu mij jahuaviiraca'aj ti huo'tá'an maj ja'ajtamuárie'en í máancajra'an jitze, ajta néijmi'i í maj ja'ajtamuárie'xij a'íi mu huarúj.

**A'íjna i ti je'ej pua'aj joorej tzajta' i tyévij
(Mt. 15:1-20)**

7 ¹Aj mu mij i fariseos ajtyáxiiriaca' i Jesús jimi, majta séecan hua' jamuán i maj tyihuá'mua'tyej i yu'xarij jitze i maj jin tyí'litta a'áá maj ja'ráciij a Jerusalén. ²Mati'ij a'íimaj huo'séj a'íijma i maj Jesús jamuán huacíj maj quee anomuétya'xi'iij mati'ijita tyí'cua'ajcaj, a'yájna mati'ij tyeeyí'tihua'aj i maj Israel jitze ajtyáma'can, a'íi mu mij je'ej pua'aj tyihuá'xajtaca'aj. ³(Ji'nye a'íimaj i fariseos majta i maj Israel jitze ajtyáma'can, a'íi mu a'yan tyityaa'ca'aj je'ej maj i hua' huásimua' tyéejyi'raca'aj, maj anaquéej anomuétya'xi'in mati'ijita tyí'cua'ajcaj. ⁴Ajta tipua'aj umetyojo'vá'nanan, camu tyí'cua'nyij tipua'aj mequee anaquéej anóomuejtye'en. Majtáhua'aj séecan mui'caa tyi'ijyi'raj, metyí'jo'sica'aj i váasuj i maj jitzán ya'caa, majta i xá'rij, majta i tyúu'utaatzij.) ⁵A'íj mu jin i fariseos, majta i maj tyihuá'mua'tyej i yu'xarij jitze i maj jin tyí'litta, a'íi mu a'yan tyataa'íhuo'ri' a'íjci i Jesús tijin:

—¿Ji'nye mej mij quee ja'astej i tahuásimua' yi'ráj i maj ajamuán huaci'ij, sulu a'yaan mu ríciij maj xána'visi' tyí'cua'caa i jumuáca' jíme'?

⁶Jesús pu a'yan tyihuó'té'exaaaj tijin:

—Xá'pui' pu tyu'taxájtaca' i Isaías i ti tyí'xajtaca'aj i Dios jitze ma'can, siaj mua'aj quee tyámua' een i jutzájta', ti'líj a'yan tyo'tyéyu'xaca' tijin:

A'íj mu jin i tyeítyee naatyátzaahuatyej
maj tyámua' naa tyí'nyaxaj,
ajta i hua'xiéjnyu'caa
capu yevéjri' séejre' nye jimi.

⁷Capu tyi'tíj huiire' tipua'aj manaatyáanajche:

ajta i maj huá'mua'tyej juvíimua'aj mu jájtyo i jutzájta'.

⁸Ji'nye mua'aj xu seríj yo'huá'xiij je'ej ti i Dios tyu'ta'íjtaca' siaj sij a'yan huárinyij je'ej maj i tyeítyee tyá'xie've'.

⁹A'yaan pu ajta tyihuó'té'exaaaj tijin:

—Ajta siaj sij a'íjci jéetze' arál'astej i juyi'ráj, mua'aj xu quee ja'astej je'ej ti i Dios tyu'ta'íjtaca!. ¹⁰Ji'nye a'yaan pu tyu'taxájtaca' i Moisés tijin: "Tzáahuatyilra'aj paj jimi tyícha'íij a' táataj pajta a' náanaj", ajta a'yan tijin: "Siata'aj jaajé'caj a'íjci i ti je'ej pua'aj tyá'xaj i jutáataj na'ríij i junáanaj". ¹¹Siajta mua'aj a'yaan xu tyi'tá'caa ti a'tíj a'yan tyihuó'té'exaatye'en i juhuásimua' yee Corbán (a'yaan pu huatóomua'aj a'íjna i nyúucarij tijin mu'vejrij pu pué'een), ¹²siajta a'yan tyí'xaj tijin tipua'aj a'tíj a'yan tyihuó'té'exaatye'en, tiquee che' jitzán juxie've' ti'líj huo'tyáhuíire'en i juhuásimua'. ¹³A'íj xu jin mua'aj yó'hua'naj i nyúucaria'ra' i Dios a'íjci jíme' i ja'muaye'raj siajta je'en séecan a'yan cha'taj siana'aj tyí'mua'tyej. Siajta séecan tyi'tíj jin a'yan jéehua ríciij.

¹⁴Aj pu'ij i Jesús huo'tajé i tyeítyee, ti'quij a'yan tyihuo'té'exaa tijin:

—Néijmi'i sianáanamuaj, siajta yo'ítéej xá'ra'nyij: ¹⁵Tyi'tíj tina'aj ti jére' ma'can capu je'ej ja'uurej i tyévij. Ajta i ti tzajta' ma'can a'íi pu xaa je'ej pua'aj joorej. ¹⁶A'tíj ti iityánamuaj che' tyámua' naa tyáanamuaj.

¹⁷Ti'ij i Jesús a'áa huojo'tyáhuii i tyeítyee aj pu'ij chi'táj jo'tyájrupij, aj mu mij i maj jamuán huacíj a'yan tyaata'íhuo'ri' je'ej ti huatóomua'aj a'ína i nyúucarij ti huó'ixaaj. ¹⁸Aj pu'ij a'yan tyihuo'té'exaa tijin:

—¿Nyi sequée siajta mua'aj yo'ítéej? ¿Nyi sequée yó'itej tiqee je'ej joorej i tyévij tyi'tíj ti jére' ma'can, ¹⁹ji'nye capu tzajta' tyáru'pij i xiéjnyu'caria'ra' jitze, sulu xayáara' pu jitze aráyixaj, ajta je'en iiráamej i chuitiriáara'an jitze?

A'yaa pu'ij tyaataxájtaca' ti néijmi'i tyámua' tyí'een i ti tyí'cue'ri'.

²⁰A'yaa pu ajta tyu'taxájtaca' tijin:

—A'ína i ti tyévij jitze éejnyinyii, a'íi pu xaa je'ej pua'aj joorej.

²¹Ji'nye tzajta' i tyévij, i xiéjnyu'caria'ra' tzajta', a'úu pu je'rányinyij i mua'tzíira'aj ti je'ej pua'aj een, ti ca'nyíralaj jatá'caa i tyévij ti'ij jaataxié've'en ti séej jamuán huáhui'nyij tiqee jatyévi'tin, ti'ij tyu'náhua'an, na'ríij ti tyu'jé'caj, ²²ti séej jamuán huóoxana'cire'en ti quee jatyévi'tin, ti tyí'nyacu'a'tzaj, ti je'ej pua'aj rijcraj, nusu ti huá'cuanamuaj, ti je'ej pua'aj huojo'mua'raj, na'ríij ti je'ej pua'aj tyihuá'xajtaj, ajta ti jéehua óotzaahuatye'ej, ajta quee jitzán juxié'va'aj je'ej ti tyihuá'huiire' i séecan. ²³Néijmi'i pu a'ína tzajta' tyeje'rányinyij ajta je'en je'ej pua'aj joorej i tyévij.

I íiti' ti séej chuéj japua já'ma'can ti ajta tyá'antzaahuaj

(Mt. 15:21-28)

²⁴Aj pu'ij té'ej i Jesús a'áa jo'mej a'ájna a ti a'yan tya'rásyapuj tijin Tiro. A'áa pu chi'táj jo'tyájrupij, ji'nye capu jaxie'va'ca'aj ti a'tíj jáamua'reej ti a'áa jo'tyávaaca'aj, ajta capu huatái'riitariaca' ti huatyoo'avaaj. ²⁵Jiye'tzín pu íiti' jáamua'reeri' ti séej tyiyójca'aj tyiyáaru' ti tzajta' séjria'ca'aj, a'íi pu'ij aje'rél'nyej ti'quij tyítunutaca' a'ájna jo'tíj jo'tyávaaca'aj i Jesús. ²⁶Ajta a'ína i íiti' capu Israel jitze ajtyáma'cantaca'aj, sulu a'áa pu já'ma'can a ti a'yan tyaja'rásyapuj tijin Sirofenicia. A'íi pu'ij aje'rél'nyej ti'quij jéehua a'yan tyaatahuaviiri' a'íjci i Jesús ti ji'rámuarye'en i tyiyáaru' ti tzajta' séjria'ca'aj i yójra!. ²⁷Ajta i Jesús a'yaa pu tyaaté'exaa tijin:

—Tyu'tá' maj anaquéej tyú'cua'nyij i hua'yojmua', ji'nye capu xá'pui' maj huái'pu'raj i páan i ti'ríij mej mij tzi'cíij huataí'pu'tye'en.

²⁸A'yaa pu tyu'tanyúj a'ína i íiti' tijin:

—A'yaa pu tyi'ja'yájna, nyavástara', ajta a'ína i páan ti tye'nyíj i maj ja'cájhua'naj i ti'ríij a'íi mu jacua'nyij i tzi'cíij.

29 Jesús pu a'yan tyaaté'exaa tijin:

—A'líci jime' je'ej paj tyu'taxájtaca', áricuj axáahuaj jó'ra!. Pu'rí iirájraa i tyiyáaru' ti tzajta' séria'ca'aj a'yooj.

30 Ti'ij i sítí' a'áa ja'rá'aj a juchéj, a'íi pu jaaséj i juyój ti anjo'o'ca'tyii i utáatzij japua, ajta i tyiyáaru' arí iirára'ajcaa i ti tzajta' séria'ca'aj.

Jesús pu séej tyú'huaaj tiqee iityánamuaj ajta ti quee tyo'ríi'rej

31 Ajtáhua'aj pu eerájraa i Jesús a'ájna a Tiro, a'áa pu huatyéenyej a Sidón a'ájna a ti a'yan tya'rágtyapuaj tijin Tamuáamuata' ti a'chájta'tajmee, ti'quij a'áa ja'rá'aj i jájtyij ti já'ajmua a ti a'yan tyaja'rágtyapuaj tijin Galileea. **32** A'áa mu mij séej ayóotuiiri' i ti quee iityánamuaj ajta quee tyo'ríi'riajca'aj, aj mu mij jaatáhuaviiri' a'líci i Jesús ti japuan rámejca'aj a'líci i ti tyí'cui!. **33** Aj pu'ij i Jesús je'ráavi'tij a'ájna a tyeítyee tzajta', ti'quij juxityéj urújtya'xij i naxiéeta' ajta ju'l'rique' ja'antyméjri' i nyanuriáara' jitze. **34** Aj pu'ij jútyle' jó'nyeeriaca', ajta ucayáatíraa aj pu'ij a'yan tyaaté'exaa a'líci i tyáataj tijin:

—¡Efata! (A'lína i nyúucarij, a'yaa pu huatóomua'aj tijin:
“Antá'cuunaj”).

35 Aj pu'ij huarúj i ti tyí'cui'ca'aj, ti'quij ityanamuáaraj ja'raa, ajta huatáii'riitariaca' ti tyámua' naa tyu'taxáj. **36** Jesús pu a'yan tyihuo'ta'íj maj quee a'tfj ixaaty'ej, ajta camu a'yan huaríj je'ej ti tyihuo'ta'íj, sulu jéetze' mu huo'ré'ixaa. **37** Néijmi'i mu je'ej tyityo'tóomuajtyaca', a'yaa mu mij tyí'xajtaca'aj tijin:

—Néijmi'i pu tyámua' tyí'uurej. A'íi pu jaayí'tin ti tyihuó'huaty'e'en mej mij ityanamuáaraj muá'ra'nyij i nácxie'ej, ajta mej mij tyu'taxáj i maj quee tyo'ríi'réejmee.

Jesús pu tyihuo'cue'ej a'líijma i maj muáacuaj ví'ra'aj ará'asej

(Mt. 15:32-39)

8 ¹Tí'ij ooj i Jesús a'áa jo'tyávaaca'aj a'ájna a Galileea, jéehua mu tyeítyee tyúusij, majta quee tyi'tfj tyícha'íica'aj maj jáacua'nyij, Jesús pu'ij huo'tajé a'líijma i maj jamuán huacíj ti'quij a'yan tyihuo'té'exaa tijin:

2 —Nyényaxaamujritye' hua' jimi mu tyeítyee, ji'nye mu'ríj huéicaj xicáj á'tyeej maj nyaj jamuán yahuatyú'uj majta quee tyi'tfj tyícha'íj maj jáacua'nyij. **3** Ajta tipua'aj nyahua'rélityixi'lin mej mij jó'ciinyej i juchéj mequee xu tyu'cuá'an, camu tyo'táviicue'raj i juyéj japua, ji'nye séecan mu ímuáj curiá'cixij.

4 A'yaa mu mij tyityaatanyúj i maj jamuán huacíj tijin:

—¿Ji'nye tyíi'rij tyaj tyihuó'cue'tyej a'yájna jo'tij quee a'tíj ja'chej?

5 Jesús pu a'yan tyihuo'ta'íhuo'ri' tijin:

—¿A'chunyéj mua'aj pua'mácan xaa'pu'sij i páan?

Mati'ij mij a'yan tyaaté'exaa tijin:

—Arahua'puácaa.

⁶ Aj pu'ij jaata'íjtaca' maj oorá'sej i tyeítyee a chóota', ti'quij ja'ancurá'i'puj i páan ti aráahua'puaj ará'asej, ajta ti'ij tyaatatyóotzi'ria'aj i Dios, aj pu'ij ja'antyítaraxij, ajta je'en huo'rí'i'pu'i'tyej i maj jamuán huacíj, mej mij a'íimaj huo'rí'i'pu'i'tye'en i tyeítyee, a'yaa mu mij a'íjna jin huaríj. ⁷Majta mu je'cácaa i hue'tyée tyí'cha'íica'aj, Jesús pu ajta a'íjna jin tyaatatyójtzi'rej i Dios, ajta je'en huo'ta'íj maj huo'rí'i'tye'en i tyeítyee. ⁸Néijmi'lí mu tyú'cuua majta tyámua' tyityaataju'xaj, majta je'en aráahua'puaj sicíi jitze tya'vá'listya'xij a'íjci jime' i páan ti avá'itzee i ti antyítaraxij. ⁹Majta i maj tyú'cuua, muáacuaj ví'ra'aj mu a'chu ará'axcaa. Aj pu'ij Jesús hua're'ityixij i tyeítyee, ¹⁰ajta je'en i báarcuj jitze atyáraa hua' jamuán i maj jamuán huacíj, mati'ij mij jo'cij a'ájna a ti a'yan tyaja'rágjyapuaj tijin Dalmanuta.

A'íimaj i fariseos mu jaatáhuaviiri' ti i Jesús huo'taséjratye'en i maj jin je'ej tyo'taséj

(Mt. 16:1-4; Lc. 12:54-56)

¹¹ A'íimaj maj mu i fariseos aje're'nyej mati'ij mij huatyóohuij maj tyee'lhuo' a'íjci i Jesús. Ajta mej mij tyi'tíj jin ja'antyimué'tin, a'yaa mu tyaatáhuaviiri' ti tyi'tíj huo'taséjratye'en i maj jin je'ej tyo'taséj mej mij jáamua'reej ti i Dios jimi jo've'mej. ¹²Aj pu'ij i Jesús tyámua' naa tyo'cayáatíraa ti'quij a'yan tyu'taxájtaca' tijin:

—Ji'nye mej mij a'íimaj i tyeítyee a'yan tyí'nyahuavii nyaj tyi'tíj huo'taséjratye'en i maj jin je'ej tyo'taséj?

—A'yaa nu tyajá'mua'ixaatyel tzáahuatyil'ra'aj jime' nyaj quee tyi'tíj jamuaataséjratye'sij.

¹³Aj pu'ij ahuojooihuá'xij i tyeítyee, ti'quij ajtáhua'aj atyáraa i báarcuj jitze aj mu mij antacíj után jitze pujmua'.

A'íjna i huá'nyuucaa i fariseos i maj jin huá'cuanamuaj i tyeítyee

(Mt. 16:5-12)

¹⁴Majta a'íimaj i maj jamuán huacíj i Jesús, a'íi mu yo'huá'xij maj ya'ráai'pu'i'in i páan maj jáacua'nyij, séej mu'uj i páan hua'isima'aj i báarcuj jitze. ¹⁵Jesús pu'ij a'yan tyihuo'ta'íj tijin:

—Cásí!, tyámua' xu'uj a'íjci jime' i fariseos maj jajnájchi i páan, siajta a'íjci jime' maj jajnájchi i maj Herodes jitze ajtyáma'can.

¹⁶Majta i maj jamuán huacíj a'yaa mu tyúu'ixaatyac'a'aj maj quee páan tyíchá'íica'aj.

¹⁷Jesús pu jáamua'reeri' je'ej maj tyúu'ixaatyac'a'aj, a'yaa pu'ij tyihuo'té'exaa tijin:

—¿Ji'nye siaj sij a'yan tyí'xaj yee siaj quee páan tyícha'ij? ¿Nyi sequée xu yó'itej ca' sequée jamua'reej? ¿Nyi huápu'iij sequée tyi'tíj jó'itej? ¹⁸ ¿Nyi xa'val'jil'síjmee siajta quee tyi'tíj séej, siajta ajta naxiéjmee siajta quee tyi'tíj namuaj? ¿Nyi sequée che' jamua'reej? ¹⁹ Nyati'ij huo'ríipu'uj i páan ti anxi'vica'aj a'íijma i tyeítyee i maj anxi'ví'ra'aj ará'axcaa, ¿a'chunyéj pua'an sicii setya'vá'jistej a'íjci jime' i páan ti avá'ítzee?

Aj mu mij a'yan tyaaté'exaa tijin:

—Tamuámuata' japuan hua'puaj sicii.

²⁰—Arí nyati'ij huo'ríipu'uj i páan ti aráahua'puaj ará'axcaa a'íijma i tyeítyee i maj muáacuaj ví'ra'aj ará'axcaa, ¿a'chunyéj pua'an sicii setya'vá'jistej xij a'íjci jime' i ti avá'ítzee?

A'yaa mu tyaaté'exaa tijin:

—Aráahua'puaj sicii.

²¹Aj pu'ij a'yan tyihuo'té'exaaaj tijin:

—¿Nyi sequée xu yó'itej?

Jesús pu ta'rácuun tyú'huaaj a'ájna a Betsaida

²²Mati'ij támij a'áa ja'rá'aj a'ájna a Betsaida, aj mu mij ta'rácuun ajoovi'tij i Jesús jimi, mati'ij mij jaatáhuaviiri' ti ja'ajtamuárie'en.

²³Jesús pu jajví' muáca'ra'an jitze a'íjci i ta'rácuun ti'quij je'ráavi'tij ajére' a'ájna jo'tij ja'chajta!. Aj pu'ij ju'íriquie' ja'rámehraxij a jíisa', ajta je'en ja'ráamuariej ti'quij jaata'líhuo'ri' tipua'aj arí ma'únyeerij

²⁴Aj pu'ij i ta'rácuun atányeeriac!, ti'quij a'yan tyu'tanyúij tijin:

—Tyétyacaa nu séej. A'yaa mu huasé'rín cucáa ciyéj maj pué'een i maj mahuaci'ij.

²⁵Jesús pu'ij ajtáhua'aj ja'ráamuariej a jíisa'an i ta'rácuun, aj pu'ij i tyáati' atányeeriac! ti'quij huarúj. Pu'ríj tyámua' naa néijmi'i tyí'sejraca'aj. ²⁶Aj pu'ij i Jesús jaata'ítyaca' ti'ij jó'ra'nyij i juchéj, ajta a'yan tyaaté'exaa tijin:

—Capáj utyáru'piche'en a chajta' pej pij a'tíj huaté'exaatye'en.

Pedro pu jaataxájtaca' ti i Jesús a'íin pué'een i Ciríistu'

(Mt. 16:13-20; Lc. 9:18-21)

²⁷Ti'ij a'yan tyu'ríj, a'íjna i Jesús majta i maj jamuán huacíj, a'áa mu jó'ju' a'ájna a ti a'yan tyaja'rátayapuaj tijin Cesarea de Filipo. Juyéj jitze mu ajooju'craj, ti'ij i Jesús a'yan tyihuo'ta'líhuo'ri' a'íijma i maj jamuán huacíj tijin:

—¿Ji'nye metyí'xaj i tyeítyee a'tanyíj nyaj pué'een?

²⁸Aj mu mij a'yan tyu'taxájtaca' tijin:

—Séecan mu a'yan tyí'xaj paj muáaj a'íin pué'een i Juan i ti huá'líracá'aj, majta séecan a'yan tyí'xaj paj a'íin pué'een i Elías, majta séecan a'yan tyí'xaj paj síij a'íin pué'een i ti Dios jitze ma'can tyí'xaj.

²⁹Aj pu'ij a'yan tyihuo'ta'íhuo'ri' tijin:

—Arí mua'aj, ¿ji'nye setyi'xaj a'tanyíj nyaj pué'een?

Pedro pu'ij a'yan tyu'taxájtaca' tijin:

—Muáaj paj a'fin pué'een i Círiistu'!

³⁰Ajta i Jesús pu huo'tá'íjmuejri' maj quee a'tíjixaatye'ej.

Jesús pu jaataxájtaca' ti mui'nyij

(Mt. 16:21-28; Lc. 9:22-27)

³¹Jesús pu'ij huatyóochej ti tyihuó'mua'tyej ti i yójra' i Dios jéehua jajpuéetzij ja'mej, majta quee jaxie'va'aj muá'ju'un i huáasij, i maj va'cán jin tyityatatyíj i tyeyúuj tzajta', majta i maj tyihuá'mua'tyej i yu'xarij jitze i maj jin tyí'ijta. A'yaa pu tyihuo'té'exaaj maj jaje'catan, ajta je'en huéecaj xicáj jitze huatájuuritaj. ³²A'yaa pu tyámua' naa tyihuó'ixaaj a'huo'itéerican jime'. Aj pu'ij i Pedro je'ráavi'tij ajta huatyóochej ti jajtyá'xi'in. ³³Ajta i Jesús pu juhuárita' cacháacajra, huo'séerajraa a'fíjma i maj jamuán huacíj, aj pu'ij jajtyá'xij a'íjci i Pedro a'yan tye'ixáatye'ej tijin:

—Ajtára' nye jimi, mu paj a'yan tyí'xaj ti'ij i tyiyáaru!. Capáj muáaj a'yan tyí'sej je'ej ti i Dios tyá'xie've', sulu je'ej maj tyá'xie've' i tyeítyee.

³⁴Aj pu'ij i Jesús huo'tajé a'fíjma i maj jamuán huacíj ajta i tyeítyee, ti'quij a'yan tyu'taxájtaca' tijin:

—Tipua'aj a'tíj jaxie'va'aj ti nyaj jamuán jo'cha'canye'en, a'yaa pu tyúuxie've' ti quee a'yan rijcaj je'ej ti jusíij tyá'xie've', sulu che' ja'antyichóoj i jucúruuj nyaj jamuán jo'cha'canye'en. ³⁵Ji'nye a'tíj ti tyúutyesi'ria'aj ti'ij quee huámui'nyij, a'fi pu yo'riésij i ju júuricamej, ajta i ti huámui'nyij a'íjci jime' ti nyaj jamuán jo'cha'canye'en, nusu ti ja'antzaahuaj i nyúucaria'ra' i Dios, a'fi pu júurij ja'mej jusén jime'. ³⁶¿Tyl'tanyí je'ej tyeetyáhui're'ej i tyévij tipua'aj néijmi'i huamué'tin i cháanacaj, ajta je'en yó'rreenyij i ju júuricamej? ³⁷Nusu a'yájna ¿a'chúquij tyí'najchitan i tyévij ti'ij jáahui're'en i júuricama'ra'? ³⁸Ji'nye tipua'aj a'tíj nyetyevi'ra' nyéetzij na'ríij a'íjci i nyúucaria'ra' i Dios hua' tzajta' i tyeítyee i maj quee tyámua' een majta jéehua já'litzere', a'yaa pu ajta tyu'tóotyevi'ra'astaj i Yójra' i Dios a'ájna xicáara' ti'ij jitzán yava'cánysesij i cháanacaj japua va'cán jin tyí'tyaváaj i Dios jimi, majta jamuán i maj tajapuá tyí'hui're'.

Tí'ij i Jesús seequéj éenye'ej huatasére

(Mt. 17:1-13; Lc. 9:28-36)

9 ¹Jesús pu ajta a'yan tyihuo'té'exaaj tijin:

—A'yaa nu tyajá'mua'ixaatye' tzáahuatyil'ra'aj jime' maj séecan i maj yahuatyú'uj iiyel'ej, a'fi mu quee jaxie've' maj huácui'nyij 'asta mana'aj quee jaaséj ti'ij yatanyéj i Dios ti'ij tyu'ta'íjtaj íiyan i cháanacaj japua a'íjci jime' i ti néijmi'i jin putyí'uurej.

Tí'ij i Jesúس seequéj éenye'ej huataséjre
(Mt. 17:1-13; Lc. 9:28-36)

²Tí'ij aráseej xicáj tyoomá'caj, Jesúś pu a'áan jo'ojnyéj i jiríj japua, a'íjma pu jo'ví'tij a'íjci i Pedro, ajta i Santiago ajta a'íjci i Juan. A'áa pu'ij hua' jíisa' seequéj huatóosejrataca' i Jesúś. ³Tyámua' pu naa tyu'tyácueenariaca' i tyí'caanaria'r'a' a'yájna tí'ij quee a'tíj tyeeyí'tin ti cáanarij a'yan tyu'tyájo'sin tí'ij a'yan tyi'cuéenavi'ij já'ra'nyij.

⁴Majta a'íj huaséj i Elías majta a'íjci i Moisés, a'íi mu jamuán tyí'xajtaca'aj a'íjci i Jesúś. ⁵Pedro pu'ij a'yan tyaaté'exaa a'íjci i Jesúś tíjin:

—Maeestro, xá'pui' pu naa tyaj yahuatyú'uucaj a'yájna. Tyiche' huéecacaa huátaahuaj i ináamuaj, síij ti muéetzij mua' arí ja'mej, ajta síij a'íjci i Moisés ajta síij a'íjci i Elías.

⁶Ji'nye a'íimaj mu tyu'tátziin i maj jamuán, ajta i Pedro capu jamua'reeriaca'aj je'ej ti tyu'taxáj. ⁷Aj pu'ij jéetirij huataséjre tí'quij hua' japua acáví'rixij. Ajta i jéetirij tzajta' pu nyúucarij huatánamuajre ti a'yan tyu'taxájtaca' tijin:

—A'íi pu nyiyooj pué'een i nyaj jaxie've', xáanamuajri!. ⁸Aj mu mij, mati'ij ajoonyéjnye'riaca', camu che' a'tíj huaséj jamuán, a'íi pu'uj jusíij i Jesúś ajo'tyávaaca'aj.

⁹Mati'ij aje'cajú'caj i jiríj jitze, Jesúś pu huo'ta'íj maj quee a'tíjixaaty'ej je'ej maj tyi'tíj tyu'séj, 'asta na'aj quee i Dios yójra' huatájuuritaj. ¹⁰A'íj mu jin a'íin mana'aj jamua'reeriaca'aj, tyij majta a'yan tyúu'ihuo'raca'aj je'ej ti huatóomua'aj i ti huatájuuritaj. ¹¹A'yaa mu tyaata'íhuo'ri' i Jesúś tijin:

—¿Ji'nye mej mij a'yan tyí'xaj i maj tyihuá'mua'tyej i yu'xarij jitze i maj jin tyí'ijta ti i Elías anaquéej ya'uvé'nyesij?

¹²Aj pu'ij a'yan tyihuoté'exaa tijin:

—A'yaa pu tyi'ja'yájna ti i Elías anaquéej uvé'nyesij, ajta a'íin néijmi'i tyámua' tyí'uuren. ¿Ajta ji'nye tí'ij a'yan tyá'xaj i yu'xarij jitze ti i yójra' i Dios jajpuéetzij ja'mej majta je'en jaatyáxaahuataj? ¹³Ajta nyáaj nu a'yan tyajá'mua'ixaaty'e' ti i Elías arí yatanyéj, majta i tyeíttee a'yaa mu jáaruuj je'ej maj tyaaxié'va'ca'aj, a'yájna tí'ij tyé'yu'si'huaca'aj i yu'xarij jitze je'ej ti tya'ra'nyíche' jimi.

Jesúś pu tyamuéej tyú'huaaj tyiyáaru' ti tzajta' ú'sejria'ca'aj
(Mt. 17:14-21; Lc. 9:37-43)

¹⁴Mati'ij aje're'nyejo'maj je'ej je'eenye'ej i séecan i maj Jesúś jamuán huacíj, a'áa mu huojo'tyoj majta jéehua i tyeíttee aja'tyúusíiria'ca'aj hua' jamuán, majta séecan i maj tyihuá'mua'tyej i yu'xarij jitze i maj jin tyí'ijta a'íi mu tyihuá'ihuo'raca'aj menyínyu'cacuj. ¹⁵Mati'ij jaaséj a'íjci i Jesúś, néijmi'i mu

ootyáhuaachaca' mej mij jaatatyójtye'en muutyámua'va'aj. ¹⁶A'íí pu'ij a'yan tyihuo'taíhuo'ri' tijin:

—¿Tyl'tanyí jin setyúu'ihuo' a'mújma jamuán?

¹⁷Síij ti a'áa jo'tyávaaca'aj pu a'yan tyu'taxájtaca' tijin:

—Maeestro, a'yaa nu a'jimi jave'ví'tij i nyiyóoj, jil'nye tyiyáaru' pu tzajta' séejre' capu ij jatá'caa ti huatánuunyij. ¹⁸Jo'tij na'aj je'ej jé'eenye', i tyiyáaru' pu játya'sacaa ajta je'tariésij a chóota', ajta jéehua éejcueemuxa'rij i jutyényij jitze, ajta ancurioci'máaj i jutaméj jíme', aj pu'ij té'ej huatyáciyaaxarij. Nu'ríj huo'táhuaviiri' i maj ajamuán huaci'íí maj jaatamuáritye'en i tyiyáaru', majta a'líimaj camu pu jáaruuj.

¹⁹Aj pu'ij i Jesús a'yan tyihuo'té'exaa tijin:

—Tyeítyee séej quee tyá'tzaahuatyé!. ¿A'chunyéj ooj juxie've' nyaj ja'mua jamuán yahuatyávaacaj? ¿A'chunyéj nyooj ja'mua jíme' a'vícue'ria'aj na'mej?

—Mese'vé'ví'tij i tyamuéej.

²⁰Aj mu mij aye've'ví'tij i tyamuéej jimi i Jesús. Ajta ti'íj i tyiyáaru' jaaséj a'íjci i Jesús, a'íí pu jaatacá'tzij i tyamuéej, aj pu'ij arájvej a chóota' putahui'tzil'íj ajta éejcueemuxa'riaca' i jutyényij jitze. ²¹Jesús pu a'yan tyaata'íhuo'ri' i táatajra' tijin:

—¿A'chunyéj arí á'tyeej ti a'yan tye'tyá'sacaa?

Ajta i táatajra' a'yaa pu tyu'tanyúj tijin:

—Tí'íj na'aj je'ej tyl'cíleenyel'ej. ²²A'íjna i tyiyáaru' ti tzajta' séejre', mue'tíj pu áan yo'tyájriej i tiéj tzajta' ajta a jáata', tí'íj jaajé'caj. A'yaa pu'ij, tipua'aj peeyí'tihua'an paj tyáahuatyé'en, tá'ancu'vaxí' ityájma pajta taatáhuire'en.

²³Jesús pu a'yan tyaaté'exaa tijin:

—¿Jil'nye pej pij a'yan tyí'xaj yee: tipua'aj peeyí'tihua'an? Néijmi'i pu tyí'rij a'íjci jimi i ti tyá'tzaahuatyé!.

²⁴Aj pu'ij i táatajra' i tyamuéej a'yan tyu'jíjhucá' tijin:

—Nyáaj nu tyá'tzaahuatyé!. Naatáhuire' nyej nyij jéetze' tyá'antzaahuatyé'en.

²⁵Tí'íj i Jesús huo'séj maj jéehua i tyeítyee ajtyáxiirisima'aj, aj pu'ij jajtyá'xij i tyiyáaru' ti tzajta' séejre' i tyamuéej, a'yan tijin:

—Tyiyáaru' mu paj quee iityánamuaj pajta quee atánuuvej, nyáaj nu a'yan tyí'mua'ijtye' paj jaatátoonyij mu tyamuéej pajta quee che' tzajta' utyáru'piche'en.

²⁶Aj pu'ij huajíjhucá' i tyiyáaru', ajtáhua'aj pu jaatacá'tzij a'íjci i tyamuéej. Aj pu'ij iirájraa, a'áa pu yóoriej cuxáa ti jaajé'caj, a'íí mu jin mue'tíj a'yan tyí'xajtaca'aj tijin huamuí!. ²⁷Ajta i Jesús, a'íí pu jajví' muáca'ra'an jitze, tyl'quij ja'ajriáj, aj pu'ij huatyéechaxij i tyamuéej.

²⁸Ajta je'en i Jesús chi'táj utyájrupij, aj mu mij i maj jamuán huacíj jujíme' a'yan tyaata'íhuo'ri' tijin:

—¿Ji'nye tyej tyij quee ityáj pu jáaruuj tyaj jaatamuáritye'en i tyiyáaru' ti tzajta' séjria'ca'aj?

²⁹Aj pu'ij i Jesús a'yan tyihuo'té'exaaj tijin:

—Siata'aj jaatamuáritye'en i tyiyáaru' ti a'yan een a'yaa pu tyúuxie've' siaj huatyényuunyij i Dios jimi.

Jesús pu ajtahua'aj jaataxájtaca' ti mui'nyij

(Mt. 17:22-23; Lc. 9:43-45)

³⁰Mati'ij a'áa jo'cíj, a'áa mu huatyénnej a'ájna a Galileea. Ajta i Jesúz capu jaxie'va'ca'aj ti a'tíj jáamua'reej, ³¹ji'nye avítzij pu jin tyihuá'mua'tyajca'aj i maj jamuán huacíj. A'yaa pu tyihuá'ixaatya'ca'aj tijin:

—A'íjna i Yójra' i Dios pu huatátuiiri'huaj a'íjma jimi i tyétyacaa, aj mu mij jaje'catan, ajta huéecaj xicáj jitze huatájuuritaj.

³²Majta a'íimaj camu yó'iteeca'aj tyi'ltíj ti huá'ixaatya'ca'aj, majta tyí'tziinya'ca'aj maj jaata'hhuo'!

¿A'tanyíj a'íin pué'een i ti jéetze' juxie've'?

(Mt. 18:1-5; Lc. 9:46-48)

³³A'áa mu ja'rá'aj chájta' ti a'yan tya'ráttyapuaj tijin Capernaúm. Mati'ij meríj chi'táj iiratyá'caj, Jesúz pu a'yan tyihuo'ta'íhuo'ríl tijin:

—¿Tyi'tanyí xúu'ihuo'raca'aj i juyéj jitze?

³⁴Ajta capu síij huatanyúj, ji'nye a'yaa mu tyúu'ihuo'raca'aj i juyéj jitze a'tíj ti a'íin pué'eenye'ej i ti jéetze' juxie've'. ³⁵Aj pu'ij i Jesúz ooyíxij, ti'quij huo'tajé i maj tamuáamuata' japuan hua'puaj ará'asej a'yaa pu'ij tyihuo'té'exaaj tijin:

—Tipua'aj a'tíj jaxie'va'aj ti a'íin pué'eenye' i ti jéetze' juxie've', a'yaa pu tyúuxie've' ti a'íin pué'eenye' i ti jéetze' cíléenye' jin tyi'tyávaacaj, ajta je'en néijmi'caa huatyáhuiire'en.

³⁶Ajta je'en pá'ri'ij a'áa jé'ta' jo'tyéjchej a'íjma jimi, aj pu'ij jájtii ti'quij a'yan tyihuo'té'exaaj tijin:

³⁷—A'tíj ti jaataxié've'en nyej jitze ma'can séej i pá'ri'ij ti'ij a'líjna, a'íi pu ajta nyéetzij naataxié've'ej, ajta i ti nyéetzij naataxié've'en, capu nyéetzij na'aj naataxié've'ej, sulu a'líj pu ajta huataxie'vej i ti unyojo'ta'ítyaca'.

A'íjna i tiqee tájcha'iire', tajitzé pu ajtyáma'can

(Lc. 9:49-50; Mt. 10:42)

³⁸Juan pu a'yan tyaaté'exaa tijin:

—Maeestro, séej tu huaséj ti a'nyúucaritze' huá'muaritya'ca'aj i tyiyáaru' i maj hua' tzajta' séejre' i tyeítyee, aj tutyij jaatá'íjmuejrí ti'ij quee a'yan rijcraj, ji'nye capu tajitzé ajtyáma'can.

³⁹Jesúz pu a'yan tyihuo'té'exaaj tijin:

—Caxu ja'ijmuezraj, ji'nye tipua'aj a'tíj a'yan ríjcaj i maj jin je'ej tyo'taséj nyej jitze ma'can, capu a'náj je'ej pua'aj tyi'nyaxáataj ja'mej. ⁴⁰ A'íjna i ti quee tájcha'hire', a'íi pu tahuire!. ⁴¹ A'tíj tina'aj ti cií tyajamuaatá'an i jájtyij siaj sij huaye'en a'líjcí jime' siaj nye jitze ajtyáma'can, a'yaa nu tyajá'mua'ixaatye' ti i Dios tyaanájchitye'sij.

**Tyi'tíj ti jin jajpuéjtzij ja'mej tipua'aj a'tíj
ootyá'ítzeere'en i Dios jimi**

(Mt. 18:6-9; Lc. 17:1-2)

⁴²—A'tíj tina'aj ti ca'nyíjra'aj jaatá'an ti'ij síij je'ej pua'aj huárinyij i tiquee xu a'chu tyá'tzaahuatye' nye jimi, jéetze' pu jatyáhui'rii maj ja'tyárieenyij i járij jitze tyetyéj va'cán ma'cave'ran i maj jin tyí'tixicaa. ⁴³ Tipua'aj mua' muáca' ca'nyíjra'aj muaatá'an pej pij tyi'tíj jin je'ej pua'aj huárinyij, pe'entyivéjche, jéetze' pu muatyáhui'rii paj séej pana'aj ajtamúa'ca'aj júurij puaatyá'ítzeere'en, quee paj hua'puácaa ajtamúa'ca'aj a'áa jo'tyá'ítzeere'en jo'paj ya'apuéetzij puál'mej, jo'tíj quee a'náj já'mui'nyij i tiéj. ⁴⁴ Jo'maj quee a'náj já'cui'nyij i chui'núuj, ajta i tiéj quee a'náj já'mui'nyij. ⁴⁵ Na'ríij mua' íicaj ca'nyíjra'aj muaatá'an pej pij je'ej pua'aj huárinyij, iiráavejchij, jéetze' pu muatyáhui'rii paj séej pana'aj iira'íicaj júurij puaatyá'ítzeere'en, quee paj hua'puácaa iira'íicaj a'áa po'tyá'ítzeere'en jo'tíj já'taa, ⁴⁶ jo'maj quee a'náj já'cui'nyij i chui'núuj, ajta i tiéj quee a'náj já'mui'nyij. ⁴⁷ Na'ríij mua' ji'ij ca'nyíjra'aj muaatá'an pej pij je'ej pua'aj huárinyij, eetátichij, jéetze' pu muatyáhui'rii paj séej pana'aj ari'lsij a'áa po'tyájrutye jo'tíj i Dios tyejé'ijtaj, quee paj hua'puácaa ava'ji'síjma'aj a'áa po'tyájrutye jo'tíj já'taa, ⁴⁸ jo'maj quee a'náj já'cui'nyij i chui'núuj, ajta i tiéj quee a'náj já'mui'nyij.

⁴⁹ Ji'nye néijmi'i xu japuéjtzitaren siaj sij tyámua' tyityeetyá'ítzeere'en i jutzájta!. ⁵⁰ A'yaa pu tyí'huiire' i unáj ti'ij tyí'me'ra'catye'ej i cue'rág, ajta tipua'aj rájxi'nyij i ti áncatzaj, ¿ji'nye tyí'rij ti'ij ajtahua'aj áncatzaj já'ra'nyij? Siata'aj mua'aj a'yan eeny'e' ti'ij i unáj siata'aj juxáahuaj séjre'ej séej jamuán siajta séej.

A'líjcí jíme' i maj huatóotonyij

(Mt. 19:1-12; Lc. 16:18)

10 ¹Jesús pu eerájraa a'ájna a Capernaúm ti'quij a'áa jo'mej a Judea ajta a'ájna pujmua' a Jordán. Majtáhua'aj mu tyúusiij i tyeftyee jo'tíj jo'tyávaaca'aj i Jesús, aj pu'ij huatyóochej ti tyihuó'mua'tyej, a'yájna ti'ij tyeeyí'tihua'aj. ²Aj mu mij séecan i Fariseos jimi ajtyáxiiriaca! i Jesús, ajta mej mij tyi'tíj jin jaatyámue'tin, a'yaa mu tyaaa'íhuo'ri' tipua'aj je'ej tyí'riitan ti i tyáati' jaatátoonyij i ju'íij. ³ A'yaa pu'ij tyihuo'té'exaaj tijin:

—¿Ji'nye mua'ajmaj tyajamuaata'íj i Moisés?

⁴A'yaa mu mij tyu'taxájtaca' tijin:

—Moisés pu tyu'tá' ti yu'xarij jaatapíjtye'en i ti jitzán á'yu'sil'ij je'ej ti een jin jaatátoj i ju'íij.

⁵Aj pu'ij i Jesús a'yan tyihuo'té'exaaaj tijin:

—Moisés pu a'yan tyajamuaata'íj a'íjci jime' siaj mua'aj quee tyihuojó'itej. ⁶Ajta jácuaj ímuáj ti'ij i Dios jaatyátaahuaca' i cháanacaj, “Dios pu huó'taahuaca' i tyáataj ajta i íitaj.” ⁷“A'íj pu jin i tyáati' mahúóohua'xij i juhuásimua', ti'ij ju'íij jamuán antyóonaxcaj, ⁸a'yaa mu mij éenye'ej muá'ju'un i maj hua'puaj ti'ij síij na'aj i tyévij.” A'íj mu jin quee che' hua'puaj, sulu síij pu'uj. ⁹A'yaa pu'ij tyúuxie've' ti i tyáati' quee hua'ajtaja'puana'an i Dios ti hua'antyásiirej.

¹⁰Mati'ij meríj chi'táj iiratyá'caj, majtahua'aj mu a'íj jime' tyaaa'huo'ri' i maj jamuán huacij. ¹¹Jesús pu a'yan tyihuo'té'exaaaj tijin:

—Tipua'aj a'tíj ju'íij huatátoonyij ajta je'en séej ancure'vi'tij, a'íi pu juxana'cire'en a'íjci jimi i ti anaquéej jatyévi'tinya'aj, ¹²ajta tipua'aj i íiti' jucíin huatátoonyij ajta je'en séej jamuán huatyéviche'en, a'íi pu ajta juxana'cire'!

Jesús pu hua' japua nyuu i ti'ríij

(Mt. 19:13-15; Lc. 18:15-17)

¹³Mati'ij mij ti'ríij aye've'vi'tichej i Jesús ti'ij hua'ajtamuárie'en, aj mu mij a'íimaj i maj jamuán huacij huo'tá'ijmuezri' a'tyán maj ahuaja've'vi'tiicaria'aj. ¹⁴Ti'ij i Jesús huo'séj je'ej maj rijcaj, aj pu'ij huatanyú'caca', ti'quij a'yan tyihuo'té'exaaaj tijin:



© 1996 David C. Cook

San Marcos 10:13-16

—Miche' yeve'ré'nyej mu ti'ríij nye jimí, caxu huá'ijmuezra, ji'nye jo'tij i Dios tyejé'ijtaj a'íimaj mu antyúumua'reeriaj muá'ju'un i maj a'yan een mati'ij mu ti'ríij. ¹⁵A'yaa nu tyajá'mua'ixaatye' tipua'aj a'tíí quee a'yan tya'rá'astej je'ej ti i Dios tyí'ijta a'yájna ti'ij siij i pá'rí'ij, capu a'úun jo'tyárutyij.

¹⁶Aj pu'ij xáxui'can tyí'ti'ijcii, ajta tyámua' tyihuo'tyájtoo i Dios jimi hua'va'muñihua'aj séej ajta séej.

I tyamuéej ti chíjtyaanyi' pu Jesús jamuán tyu'taxájtaca'

(Mt. 19:16-30; Lc. 18:18-30)

¹⁷Ti'ij i Jesús arí jo'yi'muñicaj siij pu a'tíj aje'ré'nyej huatéechisima'aj, aj pu'ij tyítunutaca' i Jesús jimi, ti'quij a'yan tyaata'íhuo'rí' tijin:

—Maeestro mu paj tyámua' een, ¿ji'nye náarinyij ti'ij náaci'tyij nyaj júurij ná'ra'nyij jusén jíme'?

¹⁸Jesús pu a'yan tyaaté'exaa tijin:

—¿Ji'nye een jíme' a'yan petyí'nyejee yee nyaj tyámua' een? Siij pu'uj séejre' i ti tyámua' een, a'íí pu a'íin pué'een i Dios. ¹⁹Papu'ríj jamua'reej je'ej ti i Dios tyu'ta'íjtaca!: “Capáj tyí'tyacui'care'en,” “pajta quee tyí'xana'cire'ej,” “capáj tyí'nahua'aj,” “capáj hue'tzij a'tíj taavijria'aj pajta quee a'tíj cuanamuaj,” “huo'tyátzaahuatye' a' táataj pajta a' náanaj.”

²⁰Aj pu'ij i a'tíj a'yan tyu'tanyúj tijin:

—Maeestro, néijmi'i nu nyeríj ja'rá'astej nyati'ij nyana'aj tyu'cíleenyi'tariaca'.

²¹Jesús pu jaaséj ajta tyámua' tyo'tóomua'aj i jutzájta!, aj pu'ij a'yan tyaaté'exaa tijin:

—Tyi'tíj pu ooj muá'itziitye', áricuj, néijmi'i tyu'tój i paj tyí'ijcha'ij pata'aj huo'rían i túmii i maj quee je'ej tyéejviicue!. A'yaa paj jéehua tya'ancuriáa'sij a'ájna jo'tij i Dios já'sejre'. Pajta je'en mujo've'mej pej pij nyaj jamuán jo'cha'canye'en.

²²Ti'ij jáanamuajri' a'íjci i nyúucarij, jéehua pu huatóoxaamujri a'íjna i tyáati', ji'nye jéehua pu tyí'ijcha'íica'aj.

²³Aj pu'ij i Jesús huanyéeriajraa, ajta a'yan tyihuo'té'exaaj i maj jamuán huacíj tijin:

—Tyámua' pu tyihuá'tyesi'huaryte' i chíjtyaanyi'ij maj utyájrutyej jo'tij i Dios tyejé'ijtaj.

²⁴Majta i maj jamuán huacíj je'ej mu jo'tánamuajri', a'íj pu jin i Jesús ajtáhua'aj a'yan tyihuo'té'exaaj tijin:

—Niyoojmua', tyámua' pu tyihuá'tyesi'huaryte' i maj jéehua tyí'ijcha'ij maj a'áa jo'tyájrutyej jo'tij i Dios tyejé'ijtaj. ²⁵Jéetze' pu quee tyési' ti i caméeyuj anájra'nyij i pí'se'ej jitze, quee tipua'aj ti chíjtyaanyi' a'áa jo'tyájrutyej jo'tij i Dios tyejé'ijtaj.

²⁶ Mati'ij a'yan tyáanamuajri', jéetze' mu je'ej jo'tánamuajri', a'yaa mu mij tyúu'ihuo'raca'aj séej jamuán majta séej tijin:

—¿A'tanyíj a'yan rinyij ti'ij jáahuiire'en i Dios jimi?

²⁷ Aj pu'ij i Jesús hua'rásaej ti'quij a'yan tyihuo'té'exaaaj tijin:

—A'íijma jimi i tyétyacaa capu je'ej tyí'rrij, ajta capu a'íjci jimi i Dios, ji'nye capu tyl'tjí jatyesi'hularitye' i Dios.

²⁸ Aj pu'ij i Pedro huatyóochej ti a'yan tyaaté'exaaatye'en tijin:

—Ityáj tu tyeríj néijmi'i tyu'tátoj i tyaj tyú'cha'íica'aj, tyej tyij ajamuán huací'ca'an.

²⁹ Jesús pu a'yan tyihuo'té'exaaaj tijin:

—A'yaa nu tzáahuatyil'ra'aj jin tyajá'mua'ixaatye' tijin tipua'aj a'tíj tyi'tjí jo'rieenyij nye jimi, na'ríij ti i Dios nyucaaaj á'tzaahuatyel', tipua'aj juchi'ij, na'ríij ju'ihuáamua', jutáataj nusu junáanaj, juyójmua' nusu juchuéj, ³⁰a'íi pu tya'ancuriáa'sij ti'ij ooj júurij siyan i cháanacaj japua, a'chu anxietyej tyi'tjí ti je'ej tipua'aj chi'ij, na'ríij ju'ihuáamua', junáanaj na'ríij jutáataj, juyójmua' nusu juchuéj, tyij ajta jajpuéetzij, ti'ij utyárutyej jo'tij i Dios tyejé'ijtaj, aj pu'ij ja'ancuriáa'sij i júuricamej ti'ij jusén jin júurij já'ra'nyij. ³¹Majta mue'tjí maj ijíij a'íin pué'een i maj anáatyij, a'íi mu uvé'tyajtirij, majta mue'tjí maj ijíij uvé'tyajtij, a'íi mu anára'sij.

Jesús pu ajtáhua'aj jaataxájtaca' ti mui'nyij

(Mt. 20:17-19; Lc. 18:31-34)

³² A'áa mu joojú'caj a Jerusalén, ajta i Jesús pu anaquéej huama'ca'aj a'íijma jimi i maj jamuán huacíj. A'íi mu jéehua jutyamua'va'ca'aj, majta i maj hua' cíjta' huajú'ca'aj a'íi mu tyí'tziinya'ca'aj. Aj pu'ij i Jesús ajtáhua'aj jujíme' huo'tajé i maj jamuán huacíj, ti'quij huatyóochej ti huo'té'exaaatye'en je'ej ti tyi'tjí ja'uurej. ³³A'yaa pu tijin:

—A'yájna siati'ij mua'aj seríj tyí'sej, ijíij tu'ríj jólju' a'ájna a Jerusalén, jo'tij jo'tátuiri'lhuaj a'íjna i ti ajta tyévij jitze huanie'huaca' a'íijma jimi i maj tyihuá'ijtye' i tyeýúuj tzajta', ajta a'íijma jimi i maj tyihuá'mua'lyej i yu'xarij jitze i maj jin tyí'ijta, a'íi mu tyu'tá'sij maj jaajé'caj, majta a'íijma jimi tyu'tátuiri'ej i maj séej chuej japua já'ma'can. ³⁴A'íi mu jaatyáxaahuari'raj, majta jaatyávaxi'ij, majta jaatyézti'tzique'muaxi'ij, majta jaje'catan, ajta huéecaj xícáj jitze pu huatájuuritaj.

A'íjna i Santiago ajta i Juan a'íi mu jaatáhuoj je'ej maj tyá'xie'va'ca'aj

(Mt. 20:20-28)

³⁵ A'íjna i Santiago ajta Juan, yójmua'mua' a'íjci i Zebedeo, a'íi mu aje're'nyej i Jesús jimi mati'ij mij a'yan tyaaté'exaa tijin:

—Maeestro, a'yaa tu tyá'xie've' paj a'yan huárinyij je'ej tyaj tyimuaatáhuaviiraj.

³⁶Aj pu'ij Jesús a'yan tyihuo'ta'íhuo'ri' tijin:

—¿Ji'nye setyá'xie've' nyaj a'yan huárinyij ja'mua jimi?

³⁷Aj mu mij a'yan tyaaté'exaa tijin:

—A'yaa tu tyá'xie've' paj taatá'an tyaj ajcára'sixi'in siij amuáca'ta' ajta siij a' útata' a'ájna pati'ij néijmi'i jin antyá'mua'reeriaj.

³⁸Jesús pu a'yan tyihuo'té'exaa tijin:

—Caxu mua'aj jamua'reej tyi'tij siaj nyahuavii. ¿Nyi a'yan setyé'viicue' siaj jajpuéetzij xá'ra'nyij nyati'ij nyáaj tya'ajpuéetzij na'mej, siajta jó'viicue' maj i tyeítyee je'ej pua'aj jamuáa'uurej a'yájna mati'ij nyéetzij nyooorej?

³⁹Aj mu mij a'yan tyu'taxájtaca' tijin:

—Ji'nye tyijtá putujoorej.

Jesús pu a'yan tyihuo'té'exaa tijin:

—Mua'aj xu jajpuéetzij xá'ju'un nyati'ij nyáaj tya'ajpuéetzij na'mej, majta je'ej pua'aj já'mua'uuren mati'ij majta nyéetzij nyooorej, ⁴⁰ajta canu a'íjci jin antyínyamua'ree nyaj jamuaata'an siaj ajcára'sixi'in siij nyamuáca'ta' ajta siij nya' útata', a'íjima pu ci'tyij i maj tyámua' een.

⁴¹Mati'ij huó'namuajri' i séecan i maj tamuáamuata' ará'asej, muaatanyínyu'cacuca' a'íjima jimi i Jacobo ajta i Juan. ⁴²Ajta i Jesús pu huo'tajé, ajta a'yan tyihuo'té'exaa tijin:

—A'yaa xu mua'aj tyá'mua'reej, je'ej maj ricij i maj tyí'ijta i cháanacaj japua, ca'nyiin mu jin tyihuá'ijtye' i tyeítyee, i maj va'cán jin tyityatatyij, a'íi mu tyihuá'ijtye' je'ej maj huárinyij i séecan. ⁴³Ajta ja'mua jimi capu a'yan tyúuxie've' ti a'yan tyí'rijcaa. Tipua'aj a'tij jaxie'va'aj ti va'cán jin tyi'tyaváaj já'ra'nyij, a'yaa pu tyúuxie've' ti néijmi'caa huatyáhuiire'en, ⁴⁴ajta i ti ja'mua jimi a'yan tyá'xie've' ti a'ífin pué'eenye' i ti anájcaj, a'yaa pu tyúuxie've' ti a'ífin huo'tyáhuiire'en néijmi'caa i séecan. ⁴⁵Ji'nye i yójra' i Dios capu a'íjna jin mujo've'mej mej mij jaatyáhuiire'en, sulu ti'ij huo'tyáhuiire'en ajta hua' jitze ma'can huámuí'nyij mui'caa i tyeítyee.

Jesús pu tyáahuaj a'íjci i Bartimeo i ta'rácuun

(Mt. 20:29-34; Lc. 18:35-43)

⁴⁶Mati'ij mij a'áa ja'rá'aj chájta' ti a'yan tya'rágtyapuj tijin Jericó. Ajta ti'ij i Jesús arí iiramá'caj a'ájna a chájta', majta cújta' huajú'ca'aj i maj jamuán huacíj, majta mue'tij i tyeítyee hua' jamuán huajú'ca'aj, a'áa pu siij ta'rácuun je'tyácatyij véjri' juyéj jitze, a'yaa pu ántyapuaaca'aj tijin Bartimeo, yójra' a'íjci i Timeo. ⁴⁷Ti'ij jáanamuajri' ti a'ífin aja'vá'ma'ca'aj i Jesús Nazaret ti já'ma'can, a'íi pu i ta'rácuun huatyóochej ti a'yan tyu'jíjhua tijin:

—Jesús, mu paj yójra' pué'een a'íjci i David, ná'ancu'vaxi' nyéetzij.

⁴⁸Mue'tíj mu i tyeítyee jaatá'ijmuezri' tiqee jijhuaj, ajta a'íjna jéetze' pu ca'nyín jin jijhuaca'aj a'yan tijin:

—Mu paj yógra' pué'een a'íjci i David, ná'ancu'vaxi' nyéetzij.

⁴⁹Aj pu'ij i Jesús oocháxij, ti'quij a'yan tyihuo'té'exaa tijin:

—Usio'tájee.

Aj mu mij uyo'tajé i ta'rácun, a'yan metye'ixáaty'ej tijin:

—Huatyá'ca'nyej a tzajta!, ájchesij, muachó've! i Jesús.

⁵⁰Aj pu'ij ayóoraaxij i jumáancaj, ti'quij ájtunaca' aj pu'ij aje're'nyej i Jesús jimi, ⁵¹Jesús pu'ij a'yan tyaata'líhuo'ri' tijin:

—¿Ji'nye petyaaxie've! nyaj tyl'tíj huá'uurej a jimí?

Ti'quij a'yan tyaaté'exaa a'íjna i ta'rácun tijin:

—Maeestro, nyáaxie've! nyaj atáyneerej.

⁵²Jesús pu a'yan tyaaté'exaa tijin:

—Pu'ríj paj jó'ra'nyij, papu'ríj huarúj a'íjci jime' i paj tyá'antzaahuaj.

Aj pu'ij jiye'tzín tyámua' huaríj i ta'rácun ti'quij atáyneeriaca', ajta je'en jamuán jo'mej a'íjci i Jesús jo'tij jooma'ca'aj i juyéj jitze.

Jesús pu utyájrupij a Jerusalén

(Mt. 21:1-11; Lc. 19:28-40; Jn. 12:12-19)

11 ¹Mati'ij meríj avéjri' joojú'caj a'ája a Jerusalén, a'áa mu ja'tanyéj jo'tij ja'chájta'najmee ti a'yan tya'rathyapuájmee tijin Betfagé, ajta a'ája Betania. A'áa pu ja'chajta' i jiríj jitze ti a'yan tya'rátjyapuaj tijin Aseitúunajrimi, aj pu'ij i Jesús hua'puácaa huata'ityaca' ²A'yan tyihuo'te'exáaty'ej tijin:

—Séricuj, siata'aj a'áa ja'tanyéj a chájta' a ti véjri' já'sejre', tipua'aj seríj a'áa ja'rá'astij, a'áa xu púuru' já'tyoonyij ti quee xu a'náj a'tíj japuan avá'caj, a'áa pu je'ejtápi'huaj ja'mej. Aj xu sij je'ejxista, siajta je'en uya'ráaja. ³Tipua'aj a'tíj a'yan tyajá'mua'íhuo'raj yee: “¿Ji'nye sijta tya'rátjxina mu púuru?”, a'ya xu tyaaté'exaatye'en yee: “A'íj pu jitzán juxie've! i tavástara!”, siajta a'yan tyaaté'exaatye'en tijin: “Jiye'tzín tu tyijtá yajavá'tosij”.

⁴Mati'ij mij ujó'ju', a'áa mu mij pua'quéj cáayej jitze yo'tyoj a'íjci i púuru', a'áa pu je'ejtápi'huaca'aj avéjri' puéertaj jitze, mati'ij mij je'ejxistaca'!

⁵Séecan maj a'áa jo'tyú'uucal'aj, a'íí mu a'yan tyihuo'ta'íhuo'ri' tijin:

—¿Tiy'tanyí je'ej sioorej? ¿Ji'nye een jíme' setye'ejxinaj mu púuru?

⁶A'ya mu tyu'taxájtaca' je'ej ti i Jesús tyihuo'té'exaa, majta a'íimaj huo'ta' maj ja'ajnáanan. ⁷Mati'ij mij yo'jáj i Jesús jimi a'íjci i púuru', mati'ij mij i tyúumaancaj tye'tyéveerej, ti'quij avé'yixij i Jesús i púuru' japua. ⁸Majta a'íimaj i tyeítyee jéehua mu i máancaj tyo'caváarajraa i juyéj jitze. Majta séecan xamuáj ucapiítiraa i juyéj jitze.

⁹Majta a'íimaj i maj anáatya'aj huajú'ca'aj, a'íi mu huatyóohuij maj huajíjhua, majta i maj cújta' huajú'ca'aj i Jesús, a'yaa mu tyí'tyejjihuaca'aj tijin:

—Pu'ríj xá'pui!, che' i Dios tyámua' tyeetyátoonyij a'íjci i ti yevé'mej nyúucaritze' i tavástara!. ¹⁰Pu'ríj xá'pui!. Che' Dios jaatyáhuire'en tyámua' naa a'íjci ti yevé'mej i ti tyu'ta'íjtaj ti'ij ará'tyeej ti tyu'ta'íjtaca' i tahuáacixa', a'íjna i David. Ajta a'íimaj i maj tyí'huiire' u tajapuá, miche' a'yan tyu'taxáj tijin a'yaa pu tyí'xa'pui!.

¹¹Tí'ij ij i Jesús ujo'tyájrupij a'ájna a Jerusalén ajta je'en i tyeeyúuj tzajta' jo'tyájrupij. Tí'ij néijmi'que' tyu'séerajra'aj aj pu'ij jó'raa a'ájna a Betania hua' jamuán i maj tamuáamuata' japuan hua'puaj ará'asej, ji'nye pu'ríj huachúmua'ca'aj.

Jesús pu je'ej pua'aj tyaatajé i xápuá' ti quee taca'ca'aj (Mt. 21:18-19)

¹²Yaa ariá'pua'aj, mati'ij uja'ráacij a'ájna a Betania, Jesús pu huataícuataca!. ¹³Tí'quij a'íj huaséj i xápuá' ciyéj ti a' imuáj ja'távaaca'aj ajta jéehua tyáxamue'ca'aj, aj pu'luj ujó'mej ti'ij jaaséj tipua'aj taca'aj, ajta capu taca'ca'aj jéehua pu'uj tyáxamue'ca'aj, ji'nye capu a'áá putyí'rijcaa tí'ij pua'aj taajcaa. ¹⁴Aj pu'ij a'yan tyaatajé a'íjci xápuá' tijin:

—Capu che' a'náj a'tíj jacua'nyij mua' táque!

Majta i maj ja'mua huacíj a'íi mu jáanamuajri' je'ej ti tyaatajé.

Jesús pu jaajájcuarej i tyeeyúuj (Mt. 21:12-17; Lc. 19:45-48; Jn. 2:13-22)

¹⁵Mati'ij a'áá ja'rá'aj a Jerusalén, Jesús pu tyeeyúuj tzajta' jo'tyájrupij ajta je'en huatyóochej ti hue'rá'ityej i maj a'úun tyó'tooca'aj ajta i maj a'úun tyó'nanaavej. Tye'tahuá'xij i tyihua' meesaj i maj japuan túmii hua'puata'tyi'raca'aj i tyeítyee, ajta jo'maj i cúcui'see ja'tooca'aj, ¹⁶ajta quee tyu'tá' ti a'tíj tyi'tíj ajóotisime'en a jé'ta' i tyeeyúuj tzajta!. ¹⁷Ajta je'en tyihuá'ajmua'tyájraa a'yan tijin:

—A'yaa pu tyé'yu'si' i yu'xarij jitze tijin: "A'yaa mu jaatámua'sij i nye chi'ij tijin chi'ij maj tzajta' huatyénuunyij i Dios jimi néijmi'i i maj séej chuéj japua ja'chej", siajta mua'aj a'yaa xu jáaruuj tí'ij jo'tíj já'tyasta' jo'maj náhua'rij je'ráatyij.

¹⁸Mati'ij a'yan tyáanamuajri', i maj tyihuá'ijtye' i puaaríj majta i maj tyihuá'mua'tyej i yu'xarij jitze i maj jin tyí'ijta, a'íi mu huatyóohuij maj jáahuoonyij je'ej maj huárinyij mej mij jaajé'caj i Jesús, ji'nye a'íi mu jatziiinya'ca'aj, a'íjci jime' maj néijmi'i naa yó'sejraca'aj je'ej ti a'fin tyihu'o'muá'tyej. ¹⁹Ajta tí'ij huariá'tica'riaca', i Jesús majta i maj jamuán huacíj a'íi mu eeráacij a'ájna a chájta!.

Huat yáahuaj a'íjna i xápu'a' (Mt. 21:20-22)

²⁰ Yaa ariá'pua'aj mu a'áa véjri' ja'tanyéj jo'tij ja'távaaca'aj i xápu'a', aj mu mij jaaséj ti arí huachica'aj tyétye! imuáj i junáana' jitze. ²¹ Aj pu'ij i Pedro, jo'támua'reeri' je'ej ti tyu'ríj, ti'quij a'yan tyaaté'exaa a'íjci i Jesús tijin:

—Maeestro, cásil!, pu'ríj huatyáahuaj i xápu'a' i paj je'ej pua'aj tyaatajé.

²² Jesúz pu a'yan tyihuo'té'exaaaj tijin:

—Setyá'antzaahuatye' i Dios jimi. ²³ Ji'nye a'ya nu tyajá'mua'ixaatye' tipua'aj a'tíj a'yan tyaaté'exaaatye'en i jiríj yee: "Tyíchesij a'májna atyárutyij i jájritze!", ajta quee seequéj tyi'mua'astíj, sulu ti tyá'tzaahuatye'ej ti a'yan tye'mej, aj pu'ij a'yan tye'mej. ²⁴ A'líj nu jin a'yan tyajá'mua'ixaatye' tijin tyi'tíj siaj mua'aj je'ej tyu'táhuoosij i Dios jimi, a'ya xu tyá'antzaahuatye'en siaj seríj ja'ancuriáa!, aj xu sij ja'ancuriáa'sij. ²⁵ Ajta siati'iij tyényuuusime'en i Dios jimi, setyihuo'tú'uunyi! a'tyán maj jamuájcha'íire!, ta'aj ij ajta i ja'muavástara' tajapuá ti já'sejre! mua'ajmaj tyajamuaatú'uunyi!. ²⁶ Ajta tipua'aj sequée tyihuo'tú'uunyi! i maj jamuájcha'íire!, capu ajta mua'ajmaj tyajamuaatú'uunyi'raj i ja'muavástara' tajapuá ti já'sejre! i siaj jin quee xá'pui! jimi huaríj.

I ti jin antyúumua'reej i Jesúz (Mt. 21:23-27; Lc. 20:1-8)

²⁷ Aj mu mij majtáhua'aj a'áa jó'ju' a Jerusalén. Ti'ij i Jesúz a'áa ja'ajcayi'cáacaj i tyeyúuj jitze, aj mu mij a'íimaj ajtyáxiiriaca' i maj tyí'ijta i tyeyúuj tzajta', majta i maj tyihuá'mua'tyej i yu'xarij jitze i maj jin tyí'ijta majta hua' jamuán i huáasij, ²⁸ mati'ij mij a'yan tyaata'íhuo'ri' tijin:

—¿Tyi'tanyí jin petyi'tyéjvee pej pij a'yan ricij? ¿A'tanyíj muaatá! pej pij a'yan rijc妖?

²⁹ Aj pu'ij Jesúz a'yan tyihuo'té'exaaaj tijin:

—Nyajta nu nyáaj séej tyajamuaata'íhuo'raj, tipua'aj sianaaté'exaaatye'en, aj nu nyij nyajta nyáaj jamuaaté'exaaatye'ej tyi'tíj nyaj jin tyi'tyéjvee nyej nyij a'yan ricij. ³⁰ ¿A'tanyíj ja'antyíhuo' a'íjci i Juan ti'ij huá'íiraca'aj i tyeítyee, nyiquij i Dios, ca'mij i tyeítyee? Sianaaté'exaaatye'!

³¹ Aj mu mij huatyóohuij maj tyi'huó'o'íhuo' séej jamuán majta séej a'yan tijin:

—Tipua'aj a'yan tyetyaaté'exaaatye'en yee Dios pu uyo'ta'ítyaca!, a'ya pu tyitaaté'exaaatye'ej yee: "¿Ji'nye een ji'me! sequée

ja'antzaahuaj je'ej tì tyu'taxájtaca?" ³²Ajta capu je'ej tyí'lrij tyaj a'yan tyaaté'exaatye'en yee i tyeítylee mu uyo'ta'ítyaca'.

A'yaa mu tyu'taxájtaca', ji'nye mahuá'tziinya'ca'aj i tyeítylee, majta néijmi'i i tyeítylee a'yan tyá'tzaahuatya'ca'aj tì i Juan a'fin pue'éenye'ej i Dios jitze ma'can tì tyí'xajtaca'aj. ³³Aj mu mij a'yan tyaaté'exaa a'íjci i Jesús tijin:

—Cantu jamua'reej.

Aj pu'ij Jesús a'yan tyihuo'té'exaaaj tijin:

—Canu nyajta nyáaj jamuaaté'exaatye'ej tyi'tij nyaj jin tyi'tyéjee nyej nyij a'yan ricij.

A'íjci jime' i maj tyí'muijhuacaa, i maj je'ej pua'aj huaríj
(Mt. 21:33-46; Lc. 20:9-19)

12 ¹Aj pu'ij i Jesús huatyóochej tì tyihuó'ixaatye'en séej jime' i nyúucarij. A'yaa pu tyihuo'té'exaaaj tijin:

—A'tij pu úuvaj huahuástej ajta je'en jariá'naj, aj pu'ij tyi'tij huatyátaahuaca' i tì jin jaatyájacha'xi'in i úuvaj, ajta tyi'tij ájtaahuaca' ajtyéevi' i maj japuan utyúuj muaal'íxie're'en i maj tyí'muijhuacaa. Ajta je'en séecan huatanyéjtye i chuéj mej mij tyaanájchitye'en cíira'tzuj, ti'quij jó'raa a'íjna i a'tij séej chuéj japua. ²Ti'ij tya'rá'aj a'náj maj jaju'racaaj i úuvaj, séej pu huata'ítyaca' tì jimi tyí'huiire' ti'ij huo'táhuavijj a'chu tì jací'puaj a'íjci i a'tij. ³Majta a'íimaj i maj tyí'muijhuacaa a'íi mu jaatyéevi' a'íjci i tì huata'íjtyi'rej, majta jaatyáavaxij a'yaa mu'uj tyaata'ítyaca' camu tyi'tij jaatá'. ⁴Aj pu'ij i tì jachuéj ajtáhua'aj séej huata'ítyaca', majta mu a'íjci huatyáto'sij tyetýej jime' mati'ij mij tyaapuéj i mu'úura' jitze, majta jajtyá'xij. ⁵Ajtáhua'aj pu séej huata'ítyaca', a'íj mu mij huajé'caj. Aj pu'ij ajtáhua'aj séecan huata'ítyaca', a'íijma mu majta huatyáavaxij, majta séecan huácuji.

—Óoche' pu sijj ál'itzeeria'ca'aj, yójra' a'íjci i a'tij, jéehua pu jaxie'va'ca'aj a'íjci. A'íj pu'ij huata'ítyaca' a'yan tyi'mua'astij tijin: "Ma'antzaahuatye'sij a'íjci i nyiyóoj." ⁷Majta i maj tyí'muijhuacaa a'yaa mu tyi'huóo'ixaaj tijin: "A'múu pu a'fin pue'een i tì néijmi'i tyá'ci'tyij, tyiche' jaajé'caj, ta'aj néijmi'i tyitáaci'tyij." ⁸Aj mu mij jaatyéevi' a'íjci i yójra', majta jaajé'caj, mati'ij mij ji'rájrie.

—¿Ji'nye tyajamuá'miteeraste' mua'ajmaj, ji'nye rinyij a'íjna i tì ja'a'rij i chuéj ajta i úuvaj? A'íi pu aja'va'ma'aj ja'mej ti'quij huá'cui'nyij i mej tyí'muijhuacaa, ajta je'en séecan huatapuéjve'sij i chuéj ajta i úuvaj.

¹⁰ ¿Nyi sequée a'náj jo'jíjvej i yu'xarij jitze a'íjci i nyúucarij? A'yaa pu tyá'xaj tijin:

A'íjci i tyetyéj maj ayoohuá'axij i maj chi'ij tyí'ta'huacaa,

a'yaa pu tye'rájraa tì a'fin pue'éenye'ej ja'raa i tì jéetze' juxie've!.

¹¹A'yaa pu jáaruuj i tavástara!,

a'íi pu a'íin pué'een i tí naa ta'sejratye'!

¹²Aj mu mij tyu'tatyései maj jaatyéevi' i Jesús, ji'nye a'yaa mu tyá'mua'reeriaca'aj tí a'íjma huataxájtaca' a'íjci i nyúucarij jíme'. Majta huá'tziínya'ca'aj i tyeítyee, a'íj mu jin jaatátoj, mati'ij mij jo'cij.

A'íjci jíme' i maj huá'jijva'ca'aj

(Mt. 22:15-22; Lc. 20:20-26)

¹³Mati'ij mij séecan huata'ítyaca' i Jesús jimi fariseos mu pué'eenye'ej majta séecan i maj Herodes jitze ajtyáma'can, mej mij tyi'tíj jaaté'exaatye'en i maj jin jitzán tyo'ojuá'ritye'en. ¹⁴A'íi mu mij jól'ju' mati'ij mij a'yan tyaaté'exaa tijin:

—Maeestro, tyáamua'reej paj tzáahuaty'i'ra'aj jin tyí'xaj, ajta quee ajitze juxie've' je'ej maj tyí'xaj i tyeítyee, ji'nye capáj a'íjna jin tyí'xaj mej mij tyámua' mojo'sejra. Muáaj paj tzáahuaty'i'ra'aj jin huá'mua'tyej i juyáara' i Dios. ¿Nyi xá'pui' tyej tyu'nájchitaj je'ej ti tyí'tajive' a'íjna i tí tyihuá'íjtye' i Roma maj já'ma'can?

¹⁵Ajta i Jesús pu jamua'reeriaca'aj maj quee huatoojé'yacan jin tyé'ihuo'raca'aj, a'yaa pu tyihuo'té'exaa tijin:

—¿Ji'nye siaj sij tyí'tye' siaj naatyéevi' hue'tzij jíme'? Séej túmii mesenyaja'vái'tye', nyej nyij jaaséj.

¹⁶Mati'ij mij aya'vái'tyej, aj pu'ij i Jesús a'yan tyihuo'ta'íhuo'ri' tijin:

—¿A'tanyíj pué'een i ta'cájcaj, ji'nye ántyapuaj i tá'yu'sil'?

A'yaa mu tyaaté'exaa tijin:

—A'íjna i tí tyí'ta'íjtye'.

¹⁷Aj pu'ij Jesús a'yan tyihuo'té'exaa tijin:

—Xaatátuiire' a'íjci i tí tyajál'mua'íjtye' tyi'tíj tí jaci'puaj, siajta jaatá'an i Dios tyi'tíj tí ajta jaci'puaj.

Majta a'íimaj tyámua' mu naa tyityo'tóomua'aj a'íjci jíme' je'ej tí tyu'taxájtaca'.

A'íjci i xicáara' i maj jitzán huatájuuritaj i mui'chítyee

(Mt. 22:23-33; Lc. 20:27-40)

¹⁸Aj mu mij séecan i saduceos aje'reé'nyej i Jesús jimi. A'íi mu a'yan tyí'xaj maj quee che' huatájuuritaj i maj meríj huácuij, a'yaa mu mij tyaata'íhuo'ri' tijin:

¹⁹—Maeestro, a'yaa pu tyo'yú'xaca' i Moisés tijin tipua'aj a'tíj nyei'ichej, ajta je'en quee eexúj tyiyóomua'caj tí'íj huámui'nyij, juxie've' tí i ihuáaria'ra' ja'ancuré'ví'tíj a'íjci i tí jatyévi'tinya'aj i tí huamuí', ta'aj ij a'íin tyiyóomua'aj já'ra'nyij a'íjci jitze ma'can i tí huamuí'. ²⁰A'yaa pu tyu'ríj, mua'ráahua'puaj i maj ju'ihuaamua'ca'aj, tí'quij i hua' jaatzí' huatyénysi'chaca', capu eexúj tyiyóomua'caj tí'íj huamuí'. ²¹Tí'quij i tí je'tyá'a'sej ja'ancuré'ví'tíj a'íjci i tí jatyévi'tinya'aj a'íjna i tí huamuí', a'íi

pu'ij ajta huamuí' quee jitzán tyiyóomua'aj. A'yaa pu cha'tána'aj tyáaru i siij i ti je'tyáa'sej, ²² ajta néijmi'caa a'yan tyú'ruuj i maj aráahua'puaj ará'axcaa i maj ju'ihiuáamua', capu siij jitzán tyiyóomua'aj ta'raa. Ajta je'en a'fin huamuí' i fít!. ²³ Arí a'ájna, mati'ij eetáciinye jo'maj ja'vá'nami! i maj huácuij, majta je'en majtáchua'aj júurij muá'ra'nyij, ¿a'tanyíj cína'ra'an pué'eenye'ej ja'mej a'ájna i xicáara' jitze, tipua'aj néijmi'i i maj aráahua'puaj meetyévi'tinya'aj?

²⁴ Jesúس pu a'yan tyihuo'té'exaa tijin:

—Mua'aj xu jéehua tyóoxohuaj, ji'nye caxu jamua'reej je'ej ti tyé'yu'si' i yu'xarij jitze caxu siajta jamua'reej je'ej ti een i ti jin i Dios néijmi'i putyí'uurej. ²⁵ Mati'ij huatájuurej i maj huácuij, camu che' nyejnyei'chen, camu majta i úucaa huiichaj, ji'nye a'yaa mu éenye'ej muá'ju'un mati'ij een i maj tyí'huiire' u tajapuá. ²⁶ Ajta a'íjci jíme' i maj huatájuuritaj i maj meríj huácuij, ¿nyi sequée a'náj jo'jívej i yu'xarij Moisés ti jo'yú'xaca' je'ej ti tyá'xaj i nyúucarij ti i Moisés tu'píj huaséj i ti vivéejmee ti'ij tyátaasima'aj? A'íj pu jitze i Dios a'yan tyaaté'exaa a'íjci i Moisés tijin: "Nyáaj nu a'íin pué'een i hua' Dios, a'íjna i Abraham, ajta i Isaac nyajta a'íjci i Jacob". ²⁷ A'íj pu jin, capu hua' Dios pué'een a'íjma i maj meríj huácuij, sulu a'íjma pu Dios i maj júurij. A'íj xu jin mua'aj je'ej pua'aj tyityojo'vátzij.

A'íjna i nyúucarij i maj jin tyí'ijta ti jéetze' juxie've' (Mt. 22:34-40)

²⁸ Mati'ij jáanamuajri' ti i Jesús tyámua' naa tyihuo'té'exaa, siij ti hua' jitze ajtyáma'can i maj tyihuá'mua'tyej i yu'xarij jitze i maj jin tyí'ijta, a'íi pu huó'namuajri' je'ej maj tyúu'ixaatya'ca'aj, a'íi pu ajtyáxiiriaca' jimi ti'quij a'yan tyataa'íhuo'ri' tijin:

—¿Tyi'tanyí nyúucarira' jéetze' juxie've' i ti jaaxájtaca' a'íjna i Moisés?



© 1996 David C. Cook

San Marcos 12:28-31

29 Jesú斯 pu a'yan tyaaté'exaa tijin:

—A'íjna i nyúucarij ti jéetze' juxie've' a'íi pu a'íin pué'een i ti a'yan yee: "Xáanamuajri', mu siaj Israel jitze ajtyáma'can, a'íjna i tavástara' i Dios a'íi pu siij na'aj pué'een. **30** A'yaa pu tyúuxie've' paj jaaxié've'en i Dios néijmi'i jíme' a'xiéjnyu'caa, pajta néijmi'i a júuricamej jíme', pajta i paj jin ma'úumua'rej, ajta pati'ij pana'aj tyo'huájca'nyej." **31** Ajtáhua'aj pu siij i nyúucarij ti je'tyáa'sej, ti a'yan yee: "Pata'aj a'yan cha'taj pana'aj tyámua' tyéejcha'ij i axa'aj tyévij, a'yájna pati'ij asiij tyi'tyáa'chá'ij." Capu siij ajtáhua'aj i nyúucarij séejre' ti jéetze' juxie've' quee a'íjna i nyúucarij ti hua'puaj.

32 Aj pu'ij a'yan tyaaté'exaa a'íjna i ti tyihuá'mua'tyej i yu'xarij jitze tijin:

—Xá'pui' paj tyaataxájtaca', Maeestro. A'yaa pu tyi'ja'yájna pati'ij tyaataxájtaca', siij pu'uj a'íin pué'een i Dios, capu siij ajtáhua'aj séejre'. **33** Ajta maj jaaxié've'en i Dios néijmi'i jíme' i juxiéjnyu'caa, ajta néijmi'i jíme' i maj jin ma'umuámua're' ajta a'chu ti siij uhuájca'nyej, ajta i tyaj huo'xié've'en i taxa'aj tyeítivee tyati'ij tajfimua'aj tyí'taxie've', jéetze' pu tyí'huiire' i Dios jimi quee tipua'aj néijmi'i tyetyu'támu'vejrita a'íjci jíme' i maj huá'cui'caa na'ríij néijmi'i jíme' jo'maj huaja'tie'raca i ya'muátyee.

34 Ti'ij i Jesú斯 jáamua'reeri' je'ej ti tyu'taxájtaca' a'íjna i ti tyihuá'mua'tyej, ajta tyámua' tyu'taxájtaca' amitéeria'can jíme', a'yaa pu tyaaté'exaa tijin:

—Capáj a' imuáj je'ej je'en jo'tij tyejé'ijtaj i Dios.

Ajta quee che' a'tij óoca'nyajca'aj ti tyi'tij jaata'íhuo'.

¿A'tanyij jitze eeráma'can i Círíistu'?

(Mt. 22:41-46; Lc. 20:41-44)

35 Jesú斯 pu tyihuá'mua'tyajca'aj i tyeyúuj tzajta', aj pu'ij a'yan tyu'ta'íhuoj tijin:

—¿Ji'nye mej mij a'yan tyí'xaj i maj tyihuá'mua'tyej i yu'xarij jitze i maj jin tyí'jta ti i Círíistu' a'íj jitze eeráma'can i David? **36** Ajta a'íjna júuricama'ra' i Dios, a'íi pu ca'nyíjra'aj jaatá' a'íjci i David ti'ij a'yan tyu'taxájtaca' tijin:

I tavástara' pu a'yan tyaaté'exaa a'íjci i nyavástara' tijin:

"Huatyéyixi' i ipuárij japua íiyan i nyamuáca'ta',

'asta nyana'aj quee huo'mué'tin i maj muájcha'íire'."

37 ¿Ji'nye tyí'ríj ti i Círíistu' a'íj jitze eerama'cáantaj i David, tipua'aj i David a'yan ajta jatamuá'muatya'an i Círíistu' tijin "Nyavástara"?

Majta jéehua i tyeítivee i maj jáanamuajri', tyámua' pu tyihuá'ránajchaca' je'ej ti tyí'xajtaca'aj i Jesú斯.

**Jesús pu hua' jitze tyo'ojpuá'rij a'íijma i maj
tyihuá'mua'tyej iyu'xarij jitze i maj jin tyí'ijta**

(Mt. 23:1-36; Lc. 11:37-54; 20:45-47)

³⁸ A'yaa pu i Jesús tyihuá'mua'tyajca'aj tijin:

—Tyámua' xu'uj a'íijma jimi i maj tyihuá'mua'tyej iyu'xarij jitze, ji'nye a'yaa pu tyihua'ráanajchi maj tyí'chajca i síicu'ri ti tyi'catfí'líjmee ajta mej mij tzáahuaty'i'ra'aj jin i tyeítyee huo'tatyójtye'en jo'tij na'aj i cáayej jitze. ³⁹ A'íí mu jahuoo jo'maj ja'rarasez i maj va'cán jin tyityatatyíj, na'ríij tipua'aj metyí'ye'estyaj aja'hua' chi'táj, a'íí mu jahuoonyij jo'tij jo'ojcaj i ti tyihuá'cue'tyej mej mij tyú'cua'nyij i méesaj japua véjri' a'íjci jimi, ⁴⁰ a'íí mu majta tyihuá'ari'racaan néijmi'i a'chu maj caa tyi'lítíj tyí'ijcha'ij i maj antyúujiimua'astariaca' i ucaríjsee, ajta mej mij quee je'ej huojo'sejra a'íí mu á'tijti' metyenyúusima'aj i Dios jimi. A'íí mu mij jéetze! jajpuéetzij muá'ju'un.

A'íjci jime' i ucaríj ti jusíij ti tyu'támu'vejritaca'

(Lc. 21:1-4)

⁴¹ Ajtáhua'aj pu Jesús a'úun jo'tyáavaaca'aj u tyeyúuj tzajta' a'ájna véjri' jo'maj tyajá'mu'vejritacaa, a'íijma pu séjraca'aj i tyeítyee i maj túmii mu'vejritaca'aj. Mue'tíj mu i chíjtyaanyi' jéehua i túmii jucáhua'naa. ⁴² Aj pu'lij siitíl aje'ré'nyej ti jusíijtaca'aj, ti'quij a'íin hua'puácaa ucáahua'xij i túmii ti quee a'chu ará'asej. ⁴³ Aj pu'ij i Jesús huo'tajé a'íjma i maj jamuán huacíj, ti'quij a'yan tyihuo'té'exaa tijin:

—A'yaa nu tyajá'mua'ixaatye' ti a'mújna mu siitíl ti jusíij jéetze! tyu'tá' quee néijmi'i i maj tyu'tá' a'íimaj i chíjtyaanyi', ⁴⁴ ji'nye néijmi'i mu a'íj tyu'tá' i túmii ti hua'vá'ítzil'tyee, ajta a'mújna mu siitíl, mu ti quee je'ej tyéejviicue', néijmi'i pu ucáahua'xij a'chu ti tyí'toova'aj.

Jesús pu jaataxájtaca' ti i tyeyúuj huatyú'uuniyi'huaj

(Mt. 24:1-2; Lc. 21:5-6)

13 ¹Ti'ij iiramá'caj i Jesús i tyeyúuj tzajta', siij ti jamuán jo'chá'canya'aj pu a'yan tyaaté'exaa tijin:

—Maeestro, cásí! huaséj mu tyetyéj ti tyatítilíjmee iiye'ej ti tyiquéetime ajta mu chi'ij naa pu een.

² Jesús pu a'yan tyaaté'exaa tijin:

—¿Nyi petyí'sej mu chi'ij ti viváajma'aj tyu'uj? Néijmi'i pu huatyú'uuniyi'huaj, capu che' séeria'aj ja'mej i jáxu'uj jitze i tyetyéj ti jujapuá tyiquéetime.

**Tyi'tij tì huataséjre'ej i maj jin jáamua'reej tì arí
tímuá' néijmi'i tye'entyipuá'rij
(Mt. 24:3-28; Lc. 21:7-24; 17:22-24)**

³ Mati'l'ij mij a'áa jo'cíj a'lájna a jiríj jitze tì a'yan ty'a'rátjyapuaj tijin Aseitúunajrimi, a'áa tì já'sejre' jo'tij i tyeyúuj ja've'nyee. Ti'quij a'láan jo'tayíxij a'líjna i Jesús, ajta a'líjna i Pedro, ajta i Jacobo, ajta i Juan, ajta i Andrés, a'íi mu jujíme! a'yan tyaata'fhuo'ri' ⁴a'náj tì a'yan tyí'rinyij, ajta tyi'tij tì huataséjre'sij i maj jin jáamua'reej tì arí néijmi'i tye'entyipuá'rij.

⁵ Jesúz pu a'yan tyihuo'té'exaaaj tijin:

—Tyámua' xu'uj mua'aj ti'ij quee a'tij jamuáacuanamuaj.

⁶ Ji'nye mue'tij mu huataséjre'sij i maj nyenyúucaa jin tyi'l'xáataj muál'ju'un, a'yaa mu tijin: "Nyáaj nu a'fin pué'een", jéehua mu mij huá'cuanamuan i tyeítjee.

⁷ Tipual'aj mua'aj seríj a'yan tyí'namuajra yee maj nyo'se' a'lájna ja'hua' na'ríij maj meríj tímuá' huatyóohuisij maj tyúunyo'sitye'ej, caxu tyí'tziínye'ej. A'yaa pu tyúuxie've' tì a'yan atyojo'ré'nyej, ajta capu eextíj a'lájna atyojo'ré'nyesij i xícáara' tì jitzán néijmi'i ty'a'rá'astij. ⁸ Ji'nye séecan mu tyeítjee, majta séecan tyeítjee jamuán tyúunyo'si'tye'ej, majta i maj séej chuéj japua huacháatimee, majta maj séej i chuéj japua huacháatimee, a'íi mu majta tyúunyo'si'tye'ej, ajta pua'maquéj huatóoca'tzij i chuéj iiye'ej, ajta jéehua huatúuri'huaj ja'mej. A'íi pu a'fin pué'een i ta'nájcaj i maj jin jajpuéetzij muál'ju'un.

⁹ Tyámua' xu'uj mua'aj jujíimua'aj tyityahuóocha'iin, ji'nye majamuá'vi'tin a'íjma jimi i maj tyí'ijta, majta jamuaatyávaxi'sij a'lájna jo'maj jóosi'rri. Majamuaatájeevij siaj sij nye jitze ma'can tyihuo'té'exaatye'en a'íjma i tajtúhuan siajta a'íjma i maj rey jin tyityatatyíj, a'yaa pu'ij tyu'táil'riitarij siaj a'íjma nye jitze ma'can tyihuo'té'exaatye'en. ¹⁰ Ji'nye ti'ij quee xu néijmi'i tye'entyipuá'ren, a'yaa pu tyúuxie've' siaj anaquéej néijmi'que' i cháanacaj japua huo'té'exaatye'en i Dios nyucaaj. ¹¹ Siajta quee je'ej tyityóomua'ajc妖 je'ej siaj tyihuo'té'exaatye'ej mati'l'ij jamuá'anvi'tij a'íjma jimi i maj tyí'ijta. A'íj xu huataxáj tyi'tij tì i Dios jamuaata'íjtye'sij siaj sij jaataxáj, ji'nye caxu mua'aj a'fin pue'éenye'ej xá'ju'un i siaj tyu'taxájtaj, sulu a'líjna i júuricama'ra' i Dios. ¹² Séecan mu ju'ihuáamua' tyu'tátuiire'sij mej mij huó'cui'nyij, majta i hua' huásimua' juyójmua' mu tyu'tátuiire'sij, majta i hua'yojmua' pu mu ájvatzij hua' jimi i jutáatastyamua' mati'l'ij mij huá'cui'nyij. ¹³ Néijmi'i mu i tyeítjee quee ja'muaxie'va'aj muál'ju'un a'íjci jime' i siaj nyejitzé ajtyáma'can; ajta a'líjna i tì tyo'táviicue' 'asta na'aj quee néijmi'i tye'entyipuá'rej, a'íj pu huiíre'en.

¹⁴ A'ájna xicáara' jitze tyi'tíj xu séjran ti je'ej pua'aj een, ti xána'vi're' ti tzíinyi're', a'láa mu yo'tyéchesij jo'tij quee a'yan tyiye'tyévijtye', (a'íjna i ti já'jjive', a'íi pu yo'itéej ja'mej), ajta a'íimaj i maj Judea jo'tyú'uucay, miche' jiye'tzín jo'cíxi'in a'ájna jo'tij jiríj jo'quéetimee, ¹⁵ ajta i ti a'áan jo'ojetiyij i juchi'ij japua, che' quee acáyi'can ti'ij tyi'tíj iirál'an u juchi'táj, ¹⁶ Na'ríij síij tyaja'muarie'ej i juví'ra'taj, che' quee ajo're'nyinyiica'an a juchéj ti'ij tyúucaanaa tyi'rájtui'nyij. ¹⁷ Cuíl' xaa a'íimaj i úucaa maj xié'chui'tajmee maj puéjtizj mu muál'ju'un a'ájna xicáara' jitze, majta i maj juyójmua' móoj tzi'tyaa. ¹⁸ Mua'aj xu jahuaviiraj i Dios ti'ij quee a'yan atyojo're'nyinyiica'an a'ájna ti'ij pua'aj huaséevi'ij á'yil'ij, ¹⁹ ji'nye jéehua mu jajpuéetzij muuál'ju'un a'yájna mati'ij quee a'náj tyaapuéjtzitariaca' ti'ij na'aj i Dios tyeetyátaahuaca' i cháanacaj, capu ajta che' a'yan atyojo're'nyesij séej i xicáara' jitze ti'ij a'ájna. ²⁰ Ajta tipua'aj i tavástara' quee a'yan jáa'uurej ti'ij quee che' á'tyeevi'in ti tyoomé'en a'chu pua'an xicáj, capu a'tíj júurij ta'me'nyíche', ajta hua'jime' i tyeítyee i Dios ti arí hua'antyíhuoj, a'íi pu'ríj a'yan jáaruuj ti'ij quee che' á'tyeevi'in.

²¹ Tipua'aj a'ájna i xicáara' jitze a'tíj a'yan tyajá'mua'ixaatye'ej yee: "Cásí!", xaaséj yána'aj huatyéjve i Ciríistu", na'ríij a'yan yee: "Cásí!", xaaséj ma'aj huatyéjve", caxu já'tzaahuatya'aj. ²² Ji'nye séeecan mu yaja'va'ju'uj muuál'ju'un i maj tyí'hue'tacaa, a'íi mu mij tyi'tíj tyu'taséjrataj i tyeítyee jimi mej mij huo'cuanamuan, tipua'aj huatái'riitarej maj a'íjma huácuamuan i tyeítyee i Dios ti arí hua'antyíhuoj. ²³ Tyámua' xu'uj caxu yó'hua'nán. Néijmi'i nu nyeríj jamuáa'ixaa je'ej ti tyi'tíj rinyij.

Ti'ij ajtáhua'aj yava'cányesij a'íjna i ti ajta tyévij jitze huanie'huaca'

(Mt. 24:29-35, 42-44; Lc. 21:25-36)

²⁴ Ajta a'ájna i xicáara' jitze, mati'ij jajpuéetzij muuál'ju'un, capu che' eeráxirij, ajta quee che' huanyéeri'cij ja'mej i máxcirie' jíme', ²⁵ majta uje'cávatzi i xú'ra'vetyee ti'ij ij huatóoca'tzij i tajapuá. ²⁶ Aj xu sij jaséjran i ti ajta tyévij jitze huanie'huaca' ti aje'cáama'aj ja'mej i jéetirij tzajta', naa pu tyámua' tyu'nyéeri'cij ja'mej, ajta néijmi'i jin antyúumua'reeriaj ja'mej a'ájna i xicáara' jitze. ²⁷ A'íi pu'ij hua're'ityixij i maj jahui're' mej mij néijmi'caa tyi'siire'en i tyeítyee i Dios ti arí hua'antyíhuoj, néijmi'caa mu tyisiire'ej i tyeítyee jo'tij na'aj joo'ástimee i chuéj, ajta jo'tij joo'ástimee i tajapuá.

²⁸ A'íj xu jitze tyi'huoo'iteeritye'en i xápua!. Ti'ij antyicua'tyíjme'nyij ánimuaj, ajta ti'ij canyáatira'nyij i xámue'ra', a'íj xu jin jamua'reeren ti arí véjri' i víita'rij. ²⁹ A'yaa pu cha'taj na'aj tipua'aj seríj tyi'tfj a'yan tyi'sejraj, aj xu sij jamua'reeren ti arí véjri'

putyí'ricij a'ájna xicáara' ti jitzán a'yan tye'mej, siajta jamua'reeren ti arí aje'cáama'aj ja'mej i ti ajta tyévij jitze huanie'huaca!. ³⁰A'yaa nu tyajá'mua'ixaatye' ti néijmi'i a'yan tye'mej matí'ij móoj júuricaj i tyeítyee i maj iiye'ej huacháatimee cháanacaj japua. ³¹Néijmi'i pu tye'entyipuá'rij i cháanacaj ajta i tajapuá, ajta i nyenyúucaa capu a'náj antyipua'rij.

³²'Ajta a'náj ti xicáara' jitze a'yan tye'mej nusu a'tzáaj ti a'yan tye'mej, capu a'tíj jamua'reej, camu jamua'reej i maj tajapuá tyí'huiire' nusu i Yójra!. A'íi pu'u'j jamua'reej i nyavástara' i Dios.

³³'A'líj xu jin tyámua' eenye', siajta atanyéjnye'rij, ji'nye caxu jamua'reej a'náj ti a'yan atyojo'ré'nyesij. ³⁴A'yaa xu ti'líj i a'tíj ti mu' jó'yl'muij, anaquéej pu'ij juchi'ij hua'cha'irastre' i maj jimi tyí'muarie' mej mij jáacha'íin i chi'ra'an. A'líjma pu ijcatye'en séej ajta séej mej mij tyu'muárie'en tyi'tíj ti muárie'ria'ra', ajta séej ijcatye'en ti tyí'cha'íij ata' puéertaj. ³⁵Tyámua' xu mua'aj eenye' siajta atanyéjnye'rij, ji'nye caxu jamua'reej a'náj ti uvé'nyesij i ti aja'chej, tipua'aj tyechúmua'risima'caj, na'ríij a'tzáaj jé'ta' tíca', nusu a'tzáaj matí'ij tyí'tyeji'huacaa i tyacuáarie', na'ríij ti'ij huatapuá'riaca', ³⁶ji'nye tipua'aj jije'tzín nu'vé'nyej, nyajta jamuáatyoonyij setyacu'tzísima'caj. ³⁷I nyaj mua'ajmaj já'mua'ixaatye' a'íj nu nyajta huá'ixaatye' néijmi'caa i séecan a'yan tijin: Sióche' xu atanyéjnye'rij.

Tyeítyee mu jaaxá'puí'intarej mej mij jaatyéevi' a'íjci i Jesús (Mt. 26:1-5; Lc. 22:1-2; Jn. 11:45-53)

14 ¹Hua'puaj xicáj pu ooj á'itzeeria'ca'aj ti'líj a'ájna atyojo'ré'nyej matí'ij pua'aj tyí'ye'estyahua'aj a'íjci jíme' i cánaya'xii maj cui'nyij, majta i páan maj cua'caa tiqee cu'ustij. A'líjmaj i maj tyihuá'ijtye' i puaaríij majta i maj tyihuá'mua'tyej i yu'xarij jitze i maj jin tyí'ijta, a'íi mu jahuooca'aj je'ej maj huárinyij mej mij hue'tzij jin jaatyéevi' i Jesús, majta je'en jaajé'caj. ²Ji'nye séecan mu a'yan tyí'xajtaca'aj tijin:

—Catu a'ájna jaatyévi'raj matí'ij tyi'ye'estyáacaj, mej mij quee i tyeítyee huatanyínyu'caj.

Íiti' pu tyi'tíj ti naa tyaarie'ej ja'vá'huaaj a'íjci i Jesús (Mt. 26:6-13; Jn. 12:1-8)

³Ti'líj i Jesús a'ája jo'tyávaacaj a Betania, a'ájna jo'tij ja'chej a'íjna i Simón, i maj majta a'yan jatamuá'muatya'aj tijin, ti Cá'atzaj. Ti'líj i Jesús ooj ajtyequéecaj i méesaj jitze, íiti' pu aje'ré'nyej a'íjci jimi tyetyéj limeetara' pu huajásima'aj, a'íj pu jitze avá'jistij i ti naa tyaarie'ej, nardu jitze ti ma'can tyi'tíj tu'píj, ajta jéehua tyá'najchij. Aj pu'ij i íiti' antyítaaraca' a'íjci i limeetaj, ti'quij ja'vá'huaaj a'íjci i ti naa tyaarie'ej i mu'úutze' a'íjci i Jesús. ⁴Aj mu mij séecan i maj a'úun

je'rátaya'ca'aj jaatájaaxiejvi'ri' a'líjci i íítaj, a'yaa mu tyúu'ixaatya'ca'aj tijin:

—¿Ji'nye een jíme' jahuaejca a'mújcij i ti naa tyaarie'ej? ⁵H'ríitacaj pu maj jáatoonyijche' a'chu huéejcaj anxietyej i túmii ará'aj, mej mij a'líjna jín huo'táhuiire'en i maj quee je'ej tyéejviicue!.

A'lí mu mij je'ej pua'aj tyá'xajtaca'aj a'líjci i íítaj.

⁶Ajta i Jesús a'yaa pu tyu'taxájtaca' tijin:

—Xaatapuá'cij, ¿ji'nye een jíme' setyá'ítziitye'? Tyámua' pu tyi'tíj huáruuj nye jimi. ⁷Ji'nye a'líimaj i maj quee je'ej tyéejviicue' a'lí mu a'náj tina'aj ja'mua jimi séeria'aj muá'ju'un, a'yaa pu'ij tyii'ríitaj ja'mej siaj sij huo'tyáhuiire'en tipua'aj a'yan setyá'xie've'ej, nyajta nyáaj canu a'náj tina'aj ja'mua jamuán séeria'aj na'mej. ⁸A'líjna i íiti' a'yaa pu huaríj je'ej ti tyaatá'iriityej, a'múu pu anaquéej nyacáhuaj i ti naa tyaarie'ej, mati'ij na'vá'nasij. ⁹A'yaa nu tzáahuaty'i'ra'aj jín tyajá'mua'ixaatye' ti jo'tij na'aj i cháanacaj japua jo'maj huojo'té'exaatye'ej i nyúucaria'ra' i Dios, a'lí mu majta huataxájta je'ej ti tyi'tíj huáruuj a'líjna i íiti', a'yaa mu mij tyo'támua'reerij.

Judas pu tyu'tátuiirej a'líjci i Jesús

(Mt. 26:14-16; Lc. 22:3-6)

¹⁰A'líjna i Judas Iscariote, sij ti ajta hua' jitze ajtyáma'can i maj tamuáamuata' japuan hua'puaj ará'asej, a'lí pu a'líijma jimi jo'mej i maj tyeyúuj tzajta' tyi'ijta ti'ij huo'tátuiire'en a'líjci i Jesús.

¹¹Mati'ij jáanamuajri', naa pu huo'tá'aj aj mu mij tya'tóoratziri' maj tyaanájchitye'en a'líjci i Judas, a'lí pu'ij i Judas jahuooca'aj a'náj ti huatá'i'riitarij ti'ij huo'tátuiire'en a'líjci i Jesús.

Tavástara' pu tyihuo'cue'ej a'líijma i maj jamuán huacíj

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹²A'lájna xicáara' jitze ta'nájcaj i maj jitzán tyi'ye'estyaa mej mij jáacua'nyij i páan tiquee cu'ustij, a'lájna mati'ij hua' mu'vejritacaa i cánya'xii, a'líimaj i maj jamuán huacíj mu a'yan tyaatalíhuo'ri' i Jesús tijin:

—¿Jo'nyij muaja'ráanajchi tyej tyi' jól'ju'un, tyajta je'en tyámua' tyú'uurej jo'tyaj i páan já'cua'nyij i tyaj jín jo'támua'reej ti'ij i Dios tyámua' tyitáacha'ij?

¹³Aj pu'ij hua'puácaa huata'lítymaca' i maj jamuán huacíj, a'yan tyihua'ixáatye'ej tijin:

—Séricuj a'lájna a chájta!. A'lá xu a'líj jál'tyoonyij xá'rij ti huátisij jájtyij tu'huájmuua, a'líj xu jamuán ujól'ju!, ¹⁴jo'tij a'líin jo'tyárutyij, a'lúu xu jáahuoonyij i a'líj ti aja'chej, aj xu sij a'yan tyaaté'exaatye'en tijin: "A'yaa pu tyi'xaj a'líjna i Maeestro yee: ¿Jo'nyij nyaja'ta'caa nyaj tyú'cua'nyij hua' jamuán i nyetye'sityeristyamua' tyej tyi' jo'támua'reej

ti'líj i Dios tyámua' tyitáacha'ij?" ¹⁵ A'íi pu'ij jamuaataséjratye'sij ánimuaj i chi'ij ti uhuaré'yoo, pu'ríj tyámua' naa tyú'ruuj, a'lúu xu tyámua' tyú'uurej i tyaj tyí'cua'nyij.

¹⁶ Matí'ij mij ujó'ju' i maj hua'puaj a'ájna a chápita!. A'yaa pu néijmi'i tyá'raj je'ej ti i Jesús tyihuo'té'exaaj, aj mu mij tyámua' tyú'ruuj i maj tyí'cua'nyij i maj jin jo'támu'a'reej a'ájna i xicáara' jitze ti'líj i Dios huó'cha'ij.

¹⁷ Ti'líj arí huatáca'caj Jesús pu jo'tyájrupij u chi'táj majta jamuán i maj tamuáamuata' japuan hua'puaj ará'asej. ¹⁸ Matí'ij meríj tyí'cua'caj i méesaj japua, aj pu'ij i Jesús a'yan tyihuo'té'exaaj tijin:

—A'yaa nu tyajá'mua'ixaatyé' siij i ti ja'mua jitze ajtyáma'can mu siaj nyajamuan tyí'cua', a'íi pu nyéetzij tyu'tátuiire'ej a'íjima jimi i maj tyityatatyij.

¹⁹ Aj mu mij huatóoxaamujrityej, majta je'en huatyóohuij maj jaata'íhuo' a'íjci i Jesús siij ajta siij a'yan tijin:

—¿Nyiquij nyáaj a'fin nyaj pué'een?

²⁰ Aj pu'ij i Jesús a'yan tyihuo'té'exaaj tijin:

—A'íi pu a'fin pué'een siij i siaj tamuáamuata' japuan hua'puaj ará'asej, a'íi pu i páan ájrunya'i a'íjci jitze i túxa'aj nyajamuan. ²¹ A'yaa pu atyojo'ré'nyesij nye jimi je'ej ti tyé'yu'si' i yu'xarij jitze, ajta a'íjna i ti nyéetzij tyu'tátuiire'sij, jéehua pu jajpuéetzij ja'mej. Jéetze' pu jatyahu'i'rihua'caj tiquee nie'huacajche'!

²² Móoche' mu tyi'tya'cue'síma'caj, ti'líj i Jesús páan tyi'líj, ajta ti'líj tyaatatyóotzi'ria'aj i Dios, aj pu'ij ja'antyítaaraca' ti'quij huo'ríipu'uj, a'yan tyihua'ixáatyé'ej tijin:

—Xáacua' a'íjci, a'íi pu nyahue'ra' pué'een.

²³ Ti'líj ta'ij i váasuj tyijáj ajta tyaatatyójtzi'rej i Dios, ti'quij a'íjima huatajányij, néijmi'i mu jaaré'ij i váasuj jitze. ²⁴ A'yaa pu tyihuo'té'exaaj tijin:

—A'íi pu a'fin pué'een i nyaxúure' i nyaj je'ráxire'sij nyej nyij huo'tyáhuiire'en mui'caa, ajta ti'líj i Dios ja'antyipuá'ritye'en i ti jácuaj jin tyal'tóoratzíiri!. ²⁵ A'yaa nu tyajá'mua'ixaatyé' nyaj quee che' ju'quéi'sij a'íjci i úuvaj ja'ra', 'asta a'ájna xicáara' jitze ti'líj i Dios néijmi'que' tyu'tal'íjtaj.

Jesús pu jaataxájtaca' ti i Pedro jaatyáhue'taj a'yan tijin canu jamua'tyej

(Mt. 26:30-35; Lc. 22:31-34; Jn. 13:36-38)

²⁶ Matí'ij tyu'táchuiicaj i maj jin tyaatatyójtzi'rej i Dios, aj mu mij jo'cíj a'ájna Aseitúunajrimi jiríj ti jo'tacá'aj. ²⁷ Jesús pu a'yan tyihuo'té'exaaj tijin:

—Néijmi'i xu mua'aj yo'huá'xij siaj nye jimi tyá'tzaahuatyé!. A'yaa pu tyé'yu'si' i yu'xarij jitze tijin: "A'íj nu je'catan i cánya'xii ti siire',

majta i cánaya'xii mamuj úrutyij." ²⁸ Ajta nyati'iij huatájuurej, a'áa nu nyajtáhu'a'j jamuaja'ajsii're'ej a Galileea.

²⁹ Pedro pu a'yan tyaaté'exaa tijin:

—Tipua'aj néijmi'i meyo'hua'xij maj a jimi tyá'tzaahuaty'e!, canu nyáaj a'yan rinyij.

³⁰ Jesús pu a'yan tyaaté'exaa tijin:

—A'yaa nu tzáahuaty'i'ra'aj jin tyí'mua'ixaatye!, ijíij tíca' ti'líj quee xu jíihuacaj i tyacuáarie', huéicaj paj naatyáhue'taj a'yan tijin capáj nyamua'tyej.

³¹ Ajta i Pedro ca'nyíin pu jin a'yan tyaaté'exaa tijin:

—Tipua'aj a'yan tyúuxieve'ej nyaj ajamuán huámui'nyij, canu muaatyáhue'taj.

Majta néijmi'i i séecan a'yaa mu cha'taj mana'aj tyí'xajtaca'aj.

Jesús pu huatyéenyuj a'ájna a Getsemaní

(Mt. 26:36-46; Lc. 22:39-46)

³² Mati'iij mij jo'cíj a'ájna ja'hua' huastárij tzajta' ti a'yan tya'rátjyapuaj tijin Getsemaní. Jesús pu a'yan tyihuo'té'exaaaj i maj jamuán huacíj tijin:

—Xaará'saj iiye'ej, nyóoche' nu nyáaj huatyéenyuusij i Dios jimi.

³³ Ti'quij áyee jo'ré'nyej, a'íjima pu jo'ví'tij a'íjci i Pedro ajta i Santiago ajta i Juan, aj pu'ij huatyóochej ti huatóoxaamujritye'en ajta je'ej pua'aj jaata'aj i tzajta'. ³⁴ A'yaa pu'ij tyihuo'té'exaaaj tijin:

—Je'ej pu pua'aj nu'asej cuxáa nyamui'nyij. A'yaa xu siooj tyityá'caj, sióoche' xu atanyéjnye'rij.

³⁵ Ti'quij i Jesús eerárraa a'tzúj áyee, aj pu'ij tyítunutaca' a chóota', jájhuaviiri' i Dios tipua'aj a'yan tyí'i'riitan tiqee a'yan atyojo'ré'nyinyica'an a'ájna i xicáara' jitze ti jitzán jajpuéetzij ja'mej.

³⁶ A'yaa pu tyá'huooca'aj i Dios jimi tijin:



© 1996 David C. Cook

San Marcos 14:35-36

—Dios i paj nyavástara' pué'een, néijmi'i pu tyí'lrij muéetzij jimi, tipua'aj petyu'tá'an ti'lj quee náaci'tyij a'ljna i nyaj jin jajpuéetzij na'mej, ajta che' quee a'yan atyojo'ré'nyinyica'an je'ej nyej nyáaj tyá'xie've', sulu pati'lj muáaj tyá'xie've'.

³⁷Aj pu'lj té'ej aje'ré'nyej jo'maj ja'ajtyá'ca'aj i maj jamuán huacíj, a'áa pu'lj huojo'tyoj tipua'aj meríj tyácu'tzij. A'yaa pu tyaaté'exaa a'ljci i Pedro tijin:

—Simón, ¿nyi petyácusij? ¿Nyi pekee tyo'táviicue'ri' paj séej ooraj atányeerij? ³⁸Sióoche' xu atanyéjnye'rij siajta huatyénuunyij i Dios jimi, ti'lj quee tyi'tij je'ej já'mua'uurej. A'yaa xu mua'aj tyá'xie've' siaj tyámua' huárinyij, ajta capu ja'muaca'nyisti' i já'muahue'ra' jitze.

³⁹Ajtáhua'aj pu ujó'mej, a'yaa pu cha'tána'aj tyaatáhuaviiri' i Dios. ⁴⁰Ti'lj aje'ré'nyej ajtáhua'aj pu huo'tyoj metyacu'tzísima'caj, ji'nye cutzíj pu huá'mue'tica'aj. Capu je'ej huá'miteerastya'ca'aj je'ej maj ye'ej tyaaté'exaatye'en. ⁴¹Ti'lj huéeicaj a'yan huaríj, ajtáhua'aj pu ujó'mej, ti'quij ajtáhua'aj aje'ré'nyej tipua'aj meríljj táhua'aj tyácu'tzij, aj pu'lj a'yan tyihuo'té'exaaaj tijin:

—¿Nyi siooj tyácu'tzij siajta juso'pe'? Pu'ríj óoche', pu'ríj tya'rá'aj a'náj maj nyéetzij tyu'tátuiire'ej i nyaj nyajta tyévij jitze huanie'huaca', a'líjma jimi i maj je'ej pua'aj tyí'tyetyeityee.

⁴²Xá'ajhuiixi', che'rej, pu'ríj yaja've'mej i ti nyéetzij tyu'tátuiire'ej.

Matí'lj jaatyéevi' i Jesús majta yo'jáj

(Mt. 26:47-56; Lc. 22:47-53; Jn. 18:2-11)

⁴³Óoche' pu tyi'tyaxáatasima'caj i Jesús ti'lj i Judas, siij ti hua' jitze ajtyáma'can i maj tamuáamuata' japuan hua'puaj ará'asej, a'líi pu aje'ré'nyej majta jéehua i tyeítyee jamuán huajú'ca'aj metyu'chúumij majta ciyéj tyu'líjj. Hua'nyúucaritze' mu a'líjma jimi huajú'ca'aj i maj tyí'ljita i tyeyúuj tzajta', majta i maj tyihuá'mua'tyej i yu'xarij jitze, majta i huáasij. ⁴⁴Ajta i Judas pu tya'tóoratzíiri' je'ej ti ye'ej huárinyij mej mij jáamua'reej a'líjj ti a'líin pué'een i Jesús, a'yan tijin:

—A'ljna i nyaj ji'tyáapui'tzelej, a'líi pu a'líin pué'een, siata'aj jaatyéevi', siajta ja'ajnáan, sia'nají'que'en tyámua' naa.

⁴⁵A'líj pu jin ajtyáxiíriaca' i Jesús jimi ti'quij a'yan tyaatajé tijin:

—Maeestro.

Ajta ji'tyáapui'tzej. ⁴⁶Aj mu mij i tyeítyee jaatyéevi' i Jesús majta ja'náaji'quej.

⁴⁷Aj pu'lj siij ti a'áa jo'tyáavaaca'aj a'líi pu juchúun íjcutaca', ti'lj ij ja'ajtavéjchaca' i naxiéera' i ti jahuiire' a'ljci i ti tyihuá'ljtye' i tyeyúuj tzajta!. ⁴⁸Ti'quij i Jesús a'yan tyihuo'ta'lhuo'ri' i tyeítyee tijin:

—¿Ji'nye een jime' yesetyityavá'ju' xaachúumij siajta ciyéj tyu'líjj siaj sij naatyéevi', cuxáa nyaj náhua'rij pué'eenye? ⁴⁹A'náj tina'aj

nu ja'mua jamuán ajo'tyávaaca'aj nyetyaja'muamua'tyáaj u tyeyúuj tzajta', caxu a'náj naatyéevi!. Ajta ijíij pu a'yan tye'mej ta'aj ij tyalróo'astej je'ej ti tyé'yu'sil i yu'xarij jitze.

⁵⁰Majta a'íimaj i maj jamuán huacíj néijmi'i mu huatoo'uj, aa mu'uj mij yooriéej i Jesús. ⁵¹Ajta síij pu tyamuéej jaavájrasima'aj i Jesús, cáanarij pu jin eerónajca'aj. A'íj mu mij huatyéevi!, ⁵²ajta a'íi pu jaatátoj i cáanarij ti'quij huatoo'uj jo'téechajraa muá'ví'ljj.

Mati'ij yo'ví'tij i Jesús a'íijma jimi i maj tyityatatyíj

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³Mati'ij mij yo'ví'tij i Jesús a'íjci jimi i ti tyihuá'ijtye' néijmi'caa i tyeyúuj tzajta', mati'ij mij néijmi'i tyúusiij i maj tyihuá'ijtye' i puaaríij, i huáasij majta i maj tyihuá'mua'tyej i yu'xarij jitze. ⁵⁴Ajta i Pedro pu imuáj cújta' huama'ca'aj, a'áa pu'ij ja'rá'aj jo'tij ja'chej a'íjna i ti tyihuá'ijtye' i maj tyí'muijhuacaa i tyeyúuj tzajta', a'áa pu ja'ajyíxíj hua' jamuán i xantáaru'uj, oopuístyla'aj i tá'taa jitze.

⁵⁵Majta a'íimaj i maj tyihuá'ijtye' i tyeyúuj tzajta', majta i maj tyityatatyíj, a'íi mu jahuooca'aj tyi'tíj maj jitzán ujpuá'ritye'en i Jesús, ajta camu tyi'tíj huátyo. ⁵⁶Tyij majta jéehua jaahué'taca'aj, camu i séecan jamua'reeriaca'aj, tyi'tíj maj putyí'xajtaca'aj. ⁵⁷Aj mu mij séecan ájhuiixij mati'ij mij hue'tzij jin tyu'taxájtaca!, a'yan tijin:

⁵⁸—Ityáj tu a'yaa tyánanamuajri' ti a'yan tyí'xajtaca'aj tijin: “Nyáaj nu jaatyú'uunaj a'íjci i tyeyúuj i tyeítyee maj ja'ajtaahuaca', nyajta je'en huéecaj xicáj jitze séej ájtaahuaj i tyeyúuj i maj quee i tyeítyee ja'ajtaahuaj.”

⁵⁹Ajta camu néijmi'i jamua'reeriaca'aj tyi'tíj maj pu tyí'xajtaca'aj i séecan majta i séecan.

⁶⁰Aj pu'ij a'íin ájchej a'ájna hua' tzajta' a'íjna i ti néijmi'caa tyí'ijtye' i tyeyúuj tzajta', ti'quij a'yan tyaata'íhuo'ri' a'íjci i Jesús tijin:

—¿Nyi pequee huatányuusij? ¿Tyi'tanyí jin po'tyá'itzee mej mij a' jitze tyí'pua'ritye'?

⁶¹Ajta i Jesús capu avé'nyuuca'aj, capu tyi'tíj huataxájtaca!. Aj pu'ij ajtahua'aj i ti tyihuá'ijtye' i tyeyúuj tzajta' a'yan tyaata'íhuo'ri' tijin:

—¿Nyi muáaj a'íin paj pué'een i Círiístu!, i ti yójra' pué'een i Dios?

⁶²Jesús pu a'yan tyaaté'exaa tijin:

—Nyáaj nu a'íin pué'een. Siajta mua'aj xu nyeséejran i nyaj nyajta tyévij jitze huanie'huaca' nyaj ajcaquée na'mej i muáca'ta' i ti néijmi'i jin antyúumua'reej, siajta nyeséejran nyati'ij aje'cáame'en i jéetirij tzajta!.

⁶³Ti'quij a'íjna i ti tyihuá'ijtye' i tyeyúuj tzajta' ja'antyisújtza'an i jusícu', mej mij jáamua'reej tijin pu'ríj huatanyú'caca', aj pu'ij a'yan tyihuo'té'exaa tijin:



© 1996 David C. Cook

San Marcos 14:60-62

—Capu che' juxie've' ti a'tij je'ej tyá'xajta. ⁶⁴Mua'aj xu seríj jáanamuajri' ti je'ej pua'aj tyu'taxájtaca' i Dios jimi. ¿Ji'nye mua'ajmaj tyajamuá'miteeraste'?

Néijmi'i mu juxa'aj tyu'taxájtaca' majta tyu'tá' ti huámui'nyij.

⁶⁵Aj mu mij séecan huatyóohuij maj jaatyétzi'tzique'muaxi'in, majta jo'tanáá ajíisa' majta je'en ji'tyáva'ra'aj i jumuáca' jíme', a'yan metye'íhuo'raj tijin:

—Huataxáj a'tanyíj mui'tyéjee.

Majta i xantáaru'uj i maj tyí'cha'iij i tyeyúuj tzajta' a'íí mu ja'ráavaxij i nyéerima'ra' jitze.

Pedro pu tyu'tyáhue'taca' a'yan tijin capu jamua'tyej i Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶Ajta i Pedro, a'áa pu jo'tyávaaca'aj jo'tij ja'rájta'cuaj i chi'táj. Aj pu'ij síij íiti' utyájrupij ti jahuiire' i ti tyihuá'ijtye' i tyeyúuj tzajta', ⁶⁷ti'ij a'íj huaséj i Pedro ti jupuistya'ca'aj a'lájna jo'tij já'taa, aj pu'ij ja'raséeraj ja'raa ti'ij ij a'yan tyaaté'exaa tijin:

—Muáaj paj pajta jamuán jo'chá'canya'aj i Jesús, Nazaret ti já'ma'can.

⁶⁸Pedro pu jaatyáhue'taca', a'yan tyi'xáataj tijin:

—Canu jamua'tyej, canu nyajta jamua'reej tyi'ltij paj tyáxajta.

Aj pu'ij iirájraa, a'áa pu je'tyéechaxij a ti ja'pueertaj. Aj pu'ij i tyacuáarie' huajíjhuaca!. ⁶⁹Ti'ij ij ajtáhual'aj i íiti' jaaséj a'íjci i Pedro aj pu'ij séecan huaté'exaaaj a'yan tijin:

—A'múu pu síij a'íin pué'een i ti hua' jitze ajtyáma'can i maj jamuán huaci'ij.

⁷⁰Ajtáhua'aj pu i Pedro jaatyáhue'taca!. A'tzúj a'tyéevi'caj, a'íimaj i maj aja'ré'tya'ca'aj majtáhua'aj mu a'yan tyaaté'exaa i Pedro tijin:

—A'yaa pu tyi'ja'yájna muáaj paj síij a'íin pué'een, ji'nye Galileea paj já'ma'can.

⁷¹Aj pu'ij i Pedro huatyóochej ti nyúucaritze! i Dios a'yan tyihuo'té'exaatye'en tijin:

—Canu jamua'tyej a'íjci i tyáataj i siaj mua'aj jatyáxajta.

⁷²Aj pu'ij arí hua'puaj huajíjhaca' i tyacuáarie', ti'quij i Pedro jo'támua'reeri! je'ej ti tyaaté'exaa i Jesús a'yan tijin: "Tí'ij quee xu hua'puaj huajíjhua i tyacuáarie', muáaj paj huéeicaj naatyáhue'taj." Aj pu'ij tyuuyínyajraa a'íjna i Pedro.

Metyu'tátuii a'íjci i Jesús i Piláato jimi

(Mt. 27:1-2, 11-14; Lc. 23:1-5; Jn. 18:28-38)

15 ¹Tí'ij huatapuá'riaca', a'íi mu tyúsiij i maj tyihuá'ijtye' i puaarij a'íijma jamuán i huásij, majta i maj tyihuá'mua'yej i yu'xarij jitze i maj jin tyí'ijta, majta néjimi'i i maj tyityatatyij. Aj mu mij áyoovil'tij a'íjci i Jesús meetyají'que'ej, mati'ij mij jaatátuii a'íjci i Piláato. ²Piláato pu'ij a'yan tyaata'íhuo'ri' tijin:

—¿Nyi muáaj a'íin papué'een i ti tyihuá'ijtye' i maj Israel jitze ajtyáma'can?

Tí'quij i Jesús a'yan tyaaté'exaa tijin:

—Muáaj paj períj a'yan tyaataxájtaca!

³Majta i maj tyí'ijta i tyeyúuj tzajta', jéehua mu tyaaxájtzi'ri',

⁴Piláato pu'ij ajtáhua'aj a'yan tyaata'íhuo'ri' tijin:

—¿Nyi pequee je'ej tyu'tányuusij? Cásí! jéehua mu a' jitze tyí'pua'ryte'.

⁵Ajta i Jesús capu je'ej tyaaté'exaa, a'íj pu jin quee je'ej jo'támiteeraj a'íjci i Piláato.

Piláato pu tyu'tá' maj jaajé'caj i Jesús

(Mt. 27:15-31; Lc. 23:13-25; Jn. 18:38—19:16)

⁶Mati'ijta tyí'ye'estyaj, Piláato pu a'yan tyeeyí'tihuaj i séej huatátoonyij i ti eetyánami', a'tíj maj a'yan tyaatáhuaviiraj i tyeítyee.

⁷Síij pu tyáati! eetyánami'huaca'aj ti a'yan ántyapuaaca'aj tijin Barrabás, hua' jamuán i séecan i maj tyí'tyacu'caria'aj. ⁸Aj mu mij i tyeítyee aje'ré'nyej, mati'ij mij huatyóohuij maj jaatáhuavij i Piláato ti'ij a'yan huárinyij a'íjma jimi je'ej ti tyeeyí'tihuaj. ⁹Piláato pu a'yan tyihuotá'íhuo'ri' tijin:

—¿Nyi mua'aj a'yan setyá'xie've' nyaj jaatátoonyij a'íjci ti ja'mua tajtúhuan pué'een mu siaj Israel jitze ajtyáma'can?

¹⁰ Ji'nye jamua'reeriaca'aj maj já'chueeria'ca'aj a'íjci i Jesús a'íimaj i maj tyihuá'ijtye' i tyeyúuj tzajta', a'íj mu jin jimi tyu'tátuii. ¹¹ Majta i maj tyihuá'ijtye' i tyeyúuj tzajta', a'íi mu ca'nyíjra'aj huo'ta' i tyeítyee mej mij jaatáhuavijj a'íjci i Piláato ti a'íj huatátoonyij i Barrabás.

¹² Piláato pu a'yan tyihuo'ta'íhuo'ri' tijin:

—¿Arí ji'nye náarinyij a'mújcij jimi mu ja'mua tajtúhuan mu siaj Israel jitze ajtyáma'can?

¹³ Aj mu mij ca'nyín jin huatyejíhuajra a'yan tijin:

—Pata'aj jó'tatan i cúruuj jitze.

¹⁴ Piláato pu a'yan tyihuo'té'exaaaj tijin:

—¿Ji'nye een jime', tyi'tanyí je'ej pua'aj huáruuj?

Majta i tyeítyee majtáhua'aj mu ca'nyín jin huatyejíhuajra a'yan tijin:

—Oótateexi' i cúruuj jitze.

¹⁵ Ajta a'íjna i Piláato, a'yaa pu tyá'xie'va'ca'aj ti tyámua' tyu'tyá'ítzeere'en i tyeítyee jimi, a'íj pu jin jaatátoj a'íjci i Barrabás, ajta ti'íj tyu'ta'íitaj maj je'riá'vaxi'in i Jesús, aj pu'ij huo'tátuii mej mij jó'tatan i cúruuj jitze.

¹⁶ Aj mu mij i xantáaru' yo'jáj a'íjci i Jesús a'ájna a ti ja'rájta'cuaj, aj mu mij néijmi'caa tyísii i xantáaru'uj. ¹⁷ Síicu'ri mu ju'cáachejtye ti po'vij xú'muavi'can jime', majta cúruun jaatyátaavej tzícare'ej ti jin cistíjhauj, a'íj mu mij ju'cárulyti'ri!. ¹⁸ Majta je'en huatýóohuij maj huatyejíhuajra'nyij a'yan tijin:

—Che' júurij a'mújna mu ti hua' tajtúhuan pué'een a'íjma i maj Israel jitze ajtyáma'can.

¹⁹ Majta ciyéj jin ja'vá'va'ra'aj i mu'úura' jitze, majta jaatyétsi'tzique'muaxij, aj mu mij tyítunutacaria'aj mue'cootunáaj, a'yájna cuxáa tyámua' metya'tá'caria'aj. ²⁰ Matí'líj jatyaxáahuataj, aj mu mij je're'chuiiri' a'íjci i síicu'ri ti po'vij xú'muavi' jime', matí'líjta mij a'íj ju'cáachejtye i síicu'ria'ra' matí'líj mij yo'jáj mej mij jó'tatan i cúruuj jitze.

Matí'líj yó'tateexij a'íjci i Jesús i cúruuj jitze

(Mt. 27:32-44; Lc. 23:26-43; Jn. 19:17-27)

²¹ A'áa pu síij tyáati' Cirene ti já'ma'can, Simón ti ántyapuaj táatajra' a'íjci i Alejandro ajta a'íjci i Rufo, a'íi pu a'áa ja'rájraa jo'tij quee a'tfj ja'chej. A'áa pu'ij huaja'antyinájchaca' jo'maj yoojásima'aj i Jesús, a'íj mu mij ca'nyérijj jin huata'íj ti'íj ja'antyichóoj i cúruujra' i Jesús.

²² A'áa mu yo'jáj a'íjci i Jesús, a'ájna a jiríj jitze ti a'yan tyaja'rátjapuaj huá'nyuucaa jime' tijin Gólgota, (Gólgota, a'yaa pu huatóomua'aj tijin Mui'chíj Mu'taj), ²³ matí'líj mij nahuáj jaatanyétzij cuáanye'ej ti á'naxcaj, a'yaa mu jatamuá'muaj a'íjci i cuáanye'ej tijin

miirra, ajta i Jesús, capu ju'qué'ij a'íjci i nahuáj. ²⁴Aj mu mij yó'tateexij i cúruuj jitze. Majta i xantáaru'uj tyetyéj mu jin huóomue'tij mej mij jáamua'reej a'tíj ti ci'tyij i ty'caanaria'ra' i Jesús siij ajta siij.

²⁵Pu'ríj jé'ta' ujmá'caj i xicáj mati'ij yó'tateexij i cúruuj jitze. ²⁶Majta táabla óotatej i cúruuj jitze, a'yaa pu tyé'yu'silhuaca'aj je'ej maj tyi'tíj jitzán tyo'oju'rij a'yaa pu tijin: "Hua' tajtúhuan i maj Israel jitze ajtyáma'can." ²⁷Majta mu hua'puácaa i náhua'rij óotatej, séej mu a'áa jo'tyéjchej i cúruuj i muáca'ta' pujmua', majta séej útata' pujmua'. ²⁸A'yaa pu tyá'raa je'ej ti a'líjna i nyúucarij tyé'yu'si' i yu'xarij jitze ti a'yan tijin: "A'yaa mu tyá'mua'reeriaca'aj ti je'ej pua'aj tyí'tyevistaca'aj."

²⁹Majta i maj aja'tányinyica'aj naa mu tyitye'cámu'vajra'aj majta je'ej pua'aj tyá'xajtaca'aj a'yan tijin:

—Muáaj mu paj a'íin pué'een i paj jaatyú'uunaj i tyeyúuj pajta huéecaj xicáj jitze ja'ajtaahuaj, ³⁰asíij a japua huatányuuchij pajta acájra'nyij a'mújcij jitze mu cúruuj.

³¹A'yaa mu cha'taj mana'aj tyá'xaahuataca'aj i maj tyihuá'ijtye' i tyeyúuj tzajta', majta i maj tyihuá'mua'tyej i yu'xarij jitze i maj jin tyí'ihta. A'yaa mu tyí'xajtaca'aj tijin:

—A'múu pu séecan japua huatanyúj, ajta capu jaayí'tin ti jusíij jujapuá huatányuunyij. ³²Che' acájra'nyij mu cúruuj jitze a'mújna mu Círistu' ti pué'een, ajta hua' tajtúhuan i maj Israel jitze ajtyáma'can, tyata'aj tyij jaaséj, tyajta tyá'antzaahuatye'en.

Majta i maj jamuán óotateehuaca' i cúruuj jitze a'íi mu majta já'xaahuataca'aj.

Tí'ij huamuí' i Jesús

(Mt. 27:45-56; Lc. 23:44-49; Jn. 19:28-30)

³³Tí'ij tyá'rá'aj a'tzáaj tacuaríixpuaj, néijmi'que' pu huariá'tica'riaca' i chuéj japua, ajta á'tyeej ti a'yan tyu'tíca' yáacij jé'ta' ucamá'caj i xicáj. ³⁴Tí'ij yáacij jé'ta' ucamá'caj i xicáj, aj pu'ij Jesús ca'nyíin jin huajíjhуaca' a'yan tijin:

—Eloí, Eloí, ¿lama sabactani? A'íjna i nyúucarij, a'yaa pu huatóomua'aj tijin: Nyavástara!, Nyavástara!, ¿ji'nye een jíme' pej pij nyoho'huaxij?

³⁵Séecan i maj a'áa jo'tyú'uucca'aj, mati'ij jáanamuajri' a'yaa mu tyu'taxájtaca' tijin:

—Xáanamuajri', a'íj pu huatajé i Elías tí'ríij á'tyeej ti tyi'tyávaaca'aj i Dios jimi.

³⁶Aj pu'ij siij aje're'nyej huatéechisima'aj, tyi'tíj pu huátisima'aj ti ta'chíra' a'íj pu'ij huatyáru'nyaxij nahuáj jíme' ti antzíjvi, tí'quij ciyéj jitze ja'antyijí'quej, aj pu'ij a'líjna ájchui tí'ij i Jesús huayé'nyijche' a'líjci jitze i tyi'tíj, a'yan tyi'xáataj a'líjna i a'tíj tijin:

—Setyu'chó've' tipua'aj yatanyéj a'íjna i Elías ti'ij ja'cátoonyij mu cúruuj jitze.

³⁷Aj pu'ij ajtáhua'aj i Jesús ca'nyíin jin huajíjhacá!, ti'quij huamuif'. ³⁸Ajta i tyeyúuj tzajta' cáanarij ti 'tzíjhua pu ujo'tahuíjca'aj, a'íi pu'ij jé'ta' acásujitz'a'an. ³⁹Ajta i tyenyeéntyil i xantáaru'uj ti tyí'litye' i maj anxietyej ará'asej, a'áa pu jo'tyávaaca'aj véjri! jo'tij jóonyeerica'aj i Jesús, a'íi pu'ij jáanamuajri! je'ej ti tyu'jíjhacá! i Jesús, ajta jaaséj je'ej ti tyu'muif', a'yaa pu'ij tyu'taxájtaca' tijin:

—A'yaa pu tyi'jí're'can jíme' a'íi pu a'íin pué'eenye'ej i yójra' Dios.

⁴⁰Séecan mu majta úucaa a' ímuáj jo'tyu'úuj méesejraca'aj, síij pu a'yan ántyapuaaca'aj tijin Maríia Magdala ti já'ma'can, ajtáhua'aj síij Maríia hua' náanaj a'íjci i Santiago ti cíleen ajta a'íjci i José, ajtáhua'aj síij i íti' ti a'yan ántyapuaaca'aj tijin Salomé. ⁴¹A'íi mu i úucaa jamuán huajú'ca'aj i Jesús majta jahuiiria'ca'aj ti'ij a'áa jo'tyávaaca'aj a'ájna a Galileea. Jéehua mu majta séecan i úucaa a'áa jo'tyú'uucca'aj i maj jamuán a'áa jo'ré'nyej a'ájna a Jerusalén.

Matí'ij jaatyá'avaataca' a'íjci i Jesús

(Mt. 27:57-61; Lc. 23:50-56; Jn. 19:38-42)

⁴²Ti'ij huaré'chumua'riaca', tyá'rál'aj a'ájna xícáara' jitze matí'ij tyámua' huóo'uurej, yaa ariá'pu'a'aj pu atyojo'ré'nyesij a'ájna i xícáara' i maj jitzán juso'pii. ⁴³A'íjna i José Arimatea ti já'ma'can, ti ajta hua' jitze ajtyáma'can i maj va'cán jin tyityatatyíj, a'íi pu ajta jacho'va'ca'aj a'íjci xícáara' ti'ij i Dios tyu'ta'íjtaj néijmi'que' i cháanacaj japua, a'íi pu'ij ajo'ré'nyej i Piláato jimi, ti'quij jaatáhuaviiri! i tyévira' i Jesús. ⁴⁴Ajta i Piláato je'ej pu tyo'tóomua'aj ti i Jesús arí huamuif', aj pu'ij jaatajé i hua'tyenyeentyil ti'ij jaata'íhuo' a'chu ti arí á'tyeeví'ca'aj ti huamuif'. ⁴⁵Ti'ij i hua'tyenyeentyil a'yan tyaaté'exaa ti a'yan tyi'ja'yájna, aj pu'ij i Piláato jaatá' a'íjci i José ti ja'cájan i tyévira' i Jesús. ⁴⁶Aj pu'ij i José cáanarij huánaniej ti naa een ti naa tyí'cueenaa, ti'quij ja'ajtajá i mui'chíj ajta je'en je'ré'ijcataca' a'íjci jíme' i cáanarij. Aj pu'ij a'úun yo'tyéetyej jo'maj yo'ojcúunajraa, ajta tyetyéj ti sicíirara' eetyájmua. ⁴⁷Ajta a'íjna i Maríia Magdala ti já'ma'can, ajta síij i Maríia náanajra' a'íjci i José, a'íi mu jaaséj jo'maj je'ej yó'ruuj i mui'chíj.

Jesús pu huatájuuriaca'

(Mt. 28:1-10; Lc. 24:1-12; Jn. 20:1-10)

16 ¹Ti'ij mu jo'mej a'ájna i xícáara' maj jitzán juso'pii, a'íjna i Maríia Magdala ti já'ma'can, ajta i síij i Maríia náanajra' a'íjci i Santiago, ajta je'en a'íjna i Salomé, a'íi mu tyi'tíj huánaniej ti naa tyaarie'ej mej mij jacáhuaatye'en i tyévira' i Jesús. ²A'íjci xícáara' jitze

ta'nájcaj i itéerij, ti'ij oochán eere'nyéesima'caj i xicáj, a'áa mu jólju' jo'tij ja'vá'nami'huaca'aj i mui'chíj, ³a'yaa mu tyúul'ixaaty'a'ca'aj tijin: —¿A'tanyíj uya'ráxiiraj i tyetyéj tì jin eetyánamíl jo'tij jóocun tyej tyij utyájrutyej?

⁴Ajta mati'ij a'áa jo'ré'nyej aj mu mij jaaséj tipua'aj quee che' eetyájmua i tyetyéj. Ajta tyámua' pu tyí'va'caa i tyetyéj tì eetyámuaaca'aj. ⁵Mati'ij utyájrupij jo'tij jóocun, tyamuéej mu huaséj tì a'lúun je'rácatyii muáca'ta' pujmua', catyéevi' pu ucáchajca'aj ajta naa tyí'cueenavi'ca'aj i tì tyí'chajca'aj. Aj mu mij i úucaa tyu'tátziin, ⁶ajta a'íi pu a'yan tyihuo'té'exaaj tijin:

—Caxu tyí'tziiñye'ej. Mua'aj xu a'íj tyáhuoonyij i Jesús Nazaret tì já'ma'can, i tì óotateehuaca' i cúruuj jitze. Pu'ríj huatájuuriaca', capu che' yajá'hua' a'yájna. Cásíl' xaaséj jo'maj yo'ojojéj. ⁷Áricuj sioté'exaatye' a'íjci i Pedro siata'aj i séecan i maj jamuán huacíj, a'yan tijin: "A'íi pu a'áa jooméj a'yájna a Galileea tì'ij ajtáhua'aj jamuájsiire'en jájcuan, a'áa xu yé'sejran, a'yájna tì'ij arí tyajamuáalixaa."

⁸Aj mu mij iirahuáachajra i úucaa, ji'nye metyóoviveesima'aj, majta tyí'tziiñya'ca'aj. Ajta camu a'tíj huaté'exaaj i juyéj jitze, ji'nye metyí'tziiñya'ca'aj.

Jesús pu huataséjre a'íjci jimi i Maríia Magdala tì já'ma'can (Jn. 20:11-18)

⁹A'íjci xicáara' jitze ta'nájcaj i séej iteerij tì'ij i Jesús huatájuuriaca', tì'ij tapuá'risima'caj a'íj pu jimi anaquéej huataséjre i Maríia Magdala tì já'ma'can, i maj tzajta' séria'ca'aj i tyiyáaru'uj i maj aráahua'puaj ará'axcaa i Jesús tì huo'tamuárij. ¹⁰A'íi pu ujó'mej tì'ij huo'té'exaatye'en a'íijma i maj jamuán huacíj i Jesús, i maj juxaamuijrrity'a'ca'aj majta juyiinyaca'aj. ¹¹Majta a'íimaj mati'ij jáamua'reeri' tì i Jesús huatájuuriaca' ajta i Maríia arí jaaséjraca'aj a'íjci i Jesús, camu ja'antzaahuaj.

Jesús pu huataséjre hua' jimi i maj hua'puaj i maj jamuán huacíj (Lc. 24:13-35)

¹²Ti'quij Jesús ajtáhua'aj seequéj tyu'taséjre hua'puácaa jimi i maj a'áa joojú'ca'aj i juyéj japua jo'tij quee a'tíj já'chajca'aj. ¹³A'íi mu mij ujó'ju' mej mij huo'té'exaatye'en i séecan, camu majta hua'antzaahuaj a'íijma i maj hua'puaj.

Tyi'tíj tì i Jesús huo'ta'íj a'íijma i maj jamuán huacíj (Mt. 28:16-20; Lc. 24:36-49; Jn. 20:19-23)

¹⁴Ti'ij arí jéetze' huachúmua', Jesús pu huatóosejrataca' a'íijma jimi i maj tamuáamuata' japuan séej ará'asej, mati'ij móoj a'íimaj

ajtyetyá'caj i méesaj jitze. Aj pu'ij hua'ajtyá'xij a'íjcí jíme' i maj jatyánaamuaj i ju júuricamej majta quee tyá'tzaahuatya'ca'aj, ji'nye camu huá'tzaahuatya'ca'aj i maj jaaséj ti arí huatájuuriaca!. ¹⁵A'yaa pu tyihuo'té'exaaj tijin:

—Séricuj néijmi'que' i cháanacaj japua siahuo'té'exaaty'e néijmi'caa i tyeítyee i nyúucaria'ra' i Dios. ¹⁶A'tíj ti tyá'antzaahuatye'sij ajta huái'huaj, Dios pu tyaatú'uunyi'raj, ajta i ti quee tyá'antzaahuatye'en, a'íi pu jajpuéetzij ja'mej. ¹⁷A'yaa mu tyeeyí'tihua'aj muá'ju'un i maj tyá'antzaahuatye'en, nyenyúucaritze' mu huo'tamuáritye'sij i tyiyáaru'uj i maj hua' tzajta' séejre' i tyeítyee, majta séej jíme' i nyúucarij tyi'xáataj muá'ju'un, ¹⁸cú'cu'see mu muarie'en i maj tyú'cha'vecaa, ajta camu je'ej huá'uurej, na'ríij huá've'rij mu'cáaye'en, capu ajta je'ej huá'uurej, ajta tipua'aj a'íijma mua'ajtamuárie'xi'in i maj tyí'cucui', tyámua' mu rinyij.

Jesús pu tyíraa i jútaye' tajapuá (Lc. 24:50-53)

¹⁹Tí'ij a'yan tyihuo'ixáatya'aj, a'íjna i tavástara' Jesúis pu tajapuá jó'vi'tichiihuaca' tí'quij muáca'ta' i Dios ja'ajcáayixij. ²⁰A'íi mu mij i maj jamuán huacíj ma'úrutyixij mej mij néijmi'que' huo'ré'ixaaty'e'en i nyúucaria'ra' i Dios, ajta i tavástara' pu huá'huiiria'ca'aj, ajta jaséjrataca'aj ti a'yan tyi'ja'yájna je'ej maj a'íimaj tyí'xajtaca'aj a'íj hua'séeratya'aj i maj jin tyámua' tyo'taséj.